

WANTOK

NIUSPEPA BILONG YUMI OL PAPUA NIUGINI STRETI 30 YIA NAU

32 pes

Namba 1,361

Wik i stat long Fonde Julai 27, 2000

70t

Insait

Hevi bilong ol tisa straik
-pes 2

Ol ripot long palamen
-pes 3

Gavana Ambane egensim pamuk lo -pes 7



Lukim ol toksave bilong senses insait

YAKAM KELO i raitim

GAVMAN i kisim bikpela toktok long tokaut long wanem as tru na eksekutiv siaman bilong Pacific Finance kompani grup bai kisim K3.6 milien long wanpela yia long wok bilong em.

Siaman bilong Pacific Finance kompani grup em Rimbink Pato na em i bos bilong Pato loya kompani. Na dispela em kompani grup we PNGBC beng, Motor Vehicle Insurance Trust (MVIT) na Agrikalsa Beng i bung wantaim aninit long wanpela siaman tasol.

Ol pepa i soim olsem pe bilong Mista Pato i olsem K300,000 long wanpela mun we em i bin kisim pinis K300,000 tupela taim pinis na K344,526.51 long tripela mun pinis.

Tasol Praim Minista Sir Mekere Morauta i tok dispela mani i no winim K7 milien olpela Gavman bilong Bill Skate i bin baim Dokta Perouj Hamidian Radlong kam wok wantaim Gavman. Tasol long Trinde aste, Sir Mekere i tokaut olsem em bai givim ful ripot long dispela toktok

Ombudsmen i no bel gut long K3.6 milien pe bilong Pato

long palamen long Fonde tude o Fraide tumoro.

Sief Ombudsmen Komisina Simon Pentanu i tokaut olsem dispela pe bilong Mista Pato i mas bihainim lo (Seksan 216A bilong mama lo) we opis bilong Salaris na Rinumeresen Komisin i mas skelim pe na wok bilong dispela wokman na tokim palamen. Dispela em long ol bikpela gavman kompani na opis olsem.

Mista Pentanu i tok maski ol dispela kompani grup i stap redi long salim aninit long praivetaisesen program, tasol nau yet ol i stap aninit long nem bilong gavman wankain olsem Eda Ranu, Telkom, Air Niugini na Post PNG.

Gavman i makim ol man long go pas long ol dispela wok olsem na pe na alawens bilong ol em pablik rekot na Palamen i mas go pas long en, Mista Pentanu i tok.

Sief Ombudsmen Komisina i tok ol dispela kompani em kompani bilong ol pipel na pablik tasol i save baim potnait na alawens bilong ol

wokman. Olsem na bikpela asua nau em pablik i no save long wanem kain pe tru Mista Pato i kisim long wok long ol dispela kompani.

Mista Pentanu i tok ol pipel bilong Papua Niugini i mas save wanem kain wok tru em Mista Pato i save mekim long kisim dispela bikpela pe. Bikos i gat lo i stap long skelim na stretim dispela kain pe.

Mista Pentanu i tokaut tu olsem Ombudsmen Komisin i bin stapim Mista Pato na lo kompani bilong em long i no ken mekim wanpela kontrak wok o bisnis wantaim Gavman inap 5-pela krismas bikos long ripot bilong em (Mista Pato) insait long Kens Kosevetri ripot we Mista Pato i bin edvaisa bilong POSF.

Tasol Gavman i no mekim wanpela eksen o bihainim toktok bilong Ombudsmen Komisin na kisim Mista Pato na givim wok long em yet.

Plantu yunion lain olsem PNG Tred Yunion Kongres (PNGTUC), Amalgamated Wokas Yunion na Benka yunion i egensim tru dispela na askim. Praim Minista long tokaut

kliu long wanem as na ol i mekim olsem.

Gavman i makim Rimbink Pato olsem eksekutiv siaman bilong Pacific Finance Grup ov kompani. Wanem rot ol i bihainim long makim em Praim Minista i tok long mekim ripot bihain. Na wanem rot ol i kamapim long baim dispela kain bikpela potnait em tu bai Praim

Minista i tokaut bihain.

Tasol ol ripot i tok dispela pe bilong Rimbink Pato i bikpela tru winim pe bilong siaman o ol menesing dairekta bilong ol bikpela Beng long PNG na tu long Australia, winim tu pe bilong ol menesing dairekta bilong ol bikpela maining kompani long PNG na Orogen Minerals tu. Na dispela em i bikpela pe tru bilong ol top eksekutiv insait long Osenia rijon olsem Saut Pasifik, Australia na Nu Silan.

Ol tisa bai wetim 2001 baset

HELEN REI i raitim

OL TISA insait long kantri bai wetim baset bilong neks yia 2001 long kisim ol alawens na pe i go antap we ol i wok long pait long en insait long dispela yia.

Nesanel Edukesen Seketeri Peter Baki i tok taim em i glasim ol samting, baset bilong neks yia bai inap long stretim ol alawens na pe i go antap bilong ol tisa.

Mista Baki i tok sapos ol tisa i no amamas long yia 2001 baset we i sut long ol samting ol i pait hat long en, ol i ken kisim industriel eksen o straik tasol dispela i no gutpela rot long bihainim taim ol toktok long dispela hevi i stap namel long ol grup we toktok i go het yet.

Em i tok Edukesen Minista Dokta John Waiko i makim maus bilong Nesanel Gavman taim em bin tokaut kliu long lukluk na stretim wari bilong ol tisa long dispela samting long taim bilong lonsim Papua Niugini Tisa Asosiesen ripot long wok bilong ol tisa las yia.

Mista Baki i tok pei i go antap em ol bai skelim long ol toktok namel long PNGTA na Tising sevis Komisin.

Em i tok mak long wok we ol tisa i

wokim bai skelim pei i go antap we ol bai kisim. Na sapos gavman na kantri i gat mani long peim ol tisa, dispela wok long apim pe na alawens bai kamap tru tru.

Mista Baki i tok taim dispela i kamap, Gavman i mas lukim olsem em i kamap na go het long olgeta yia.

Em i tok taim ol i stretim ol toktok long dispela samting, i moabeta long ol i tingim raits bilong ol pikinini we i save stap long lukaut bilong ol tisa.

"Yumi mas luksave sapos Gavman na kantri inap long peim dispela mani.

"Tru samting we ol tisa i wok long pait long en i gutpela. Tasol pasin long ol dispela husat i wok long kamapim hevi long ol pikinini i nogut", Mista Baki i tok.

Em i tok baset bilong dispela yia i no inap long karamapim singaut bilong ol tisa. Na em i tok i no gutpela long fosim ol tisa long wokim ol disisen we ol bai sori long kikbek bilong en long bihain taim.

Mista Baki i tok, tru ol i luksave long rait bilong ol tisa long autim wari bilong ol ol wan wan tisa yet i mas wokim ol disisen na i no ol narapela i fosim ol.



Asaro madmeri tu ya!

(Raitim) Goroka memba Henry Smith wantaim Dem Josephine Abaijah na Ledi Roslyn Morauta i sanap wantaim ol Asaro madmeri long So bilong Isten Hailans meri. Foto: FRANCIS BENNY, PMs Media.

Nestlé MILO IKEN WOKIM GUTPELA SAMTING LONG YU

Ol nius ripot wantaim WENCESLAUS MAGUN

PLIS BIDAT

MOSBI

Plis Komisina, Plis Minista na Praim Minista i no mekim pasin bilong traime long bagarapim narapela olsem Eking Oposisen Lida, Peter Peipul i bin tok ol i bin mekim long Oposisen Lida, Bill Skate, Minista bilong Plis, Mathias Karani i tok. - Mista Karani i tok, toktok Mista Peipul i bin mekim, olsem ol dispela lida i bin mekim pasin bilong traime long bagarapim Mista Skate we i lukim ol plis i bin holim pas em na putim em long kalabus em i no tru.

Mista Karani i tok aninit long Mama Lo bilong kantri em i nogat wanpela pawa aninit long Plis Fos Ekt long suvim nus i go insait long wok bilong Plis Fos, taim ol i karim aut wok bilong ol olsem Mama Lo i tokim ol long mekim.

Em i tok nogat wanpela bilong ol (plis komisina, praim minista na em yet) i gat pawa long stapim ol plis long mekim wok bilong ol bilong lukim gutpela pasin i mas kamap.

Mista Karani i tok plis komisina, praim minista na em yet i soim bikpela rispekt long Mista Skate na i laik bai sik bilong em i pinis na em i ken kam bek long mekim wok.

TARI

Lo na oda hevi long Sauten Hailens Provins em i okey, Plis Minista Mathias Karani i tok. Em i tok, Sauten Hailens i gat ol risos olsem wel we PNG inap kisim planti helpim long en na long dispela as, gavman i no inap larim lo na oda i bagarapim dispela provins.

Em i tok gavman i givim namba wan luksave long Sauten Hailens long lukim olsem olgeta ol risos projek i mas wok gut na ol lokol pipel i roken bagarapim wok bilong ol.

Mista Karani i tok, em i bin go toktok wantaim ol pipel bilong Magarima, Mendi taun, na ol arapela ples na tokim ol pipel long noken bagarapim sindaun bilong ol yet.

Em i tok tu olsem Plis Dipatmen i skulim pinis wanpela plis skuad na salim ol i go antap long Sauten Hailens long wik i go pinis bilong stretim ol hevi bilong lo na oda.

MADANG

Plis Komisina, John Wakon i tokim ol plis long Madang long klinim na stretim Kusbau bareks.

Em i bin givim strongpela tok lukaut i go long ol plis long Madang long lukautim gut ol gavman haus bilong ol.

Mista Wakon i tok insait long narapela lukluk raun bilong em i go long Madang em bai sekim sapos ol plis long Madang i harim o sakim maus bilong em.

Long wankain taim, Plis Minista Mathias Karani i tok, Plis Komisina John Wakon i save long hevi bilong ka eksiden we Gavana bilong Madang, Jim Kas i bin bungim tupela wik i go pinis.

Mista Karani i tok, plis i mekim wok painim long dispela hevi na bai stretim bihainim lo bilong dispela kantri.

Lo bilong kompensesen, Mista Karani i tok, em i samting bilong Gavana Kas na ol famili bilong bisnis man bilong Simbu Alois Kiangua husat i bin dai long dispela eksiden.

K726.5 milien bilong baim ol tisa em antap tumas, Dokta Waiko i tok

MINISTA bilong Edukesen, Dokta John Waiko i tok askim bilong ol tisa long gavman i mas hapim pe bilong ol i go antap long 200 pesen (%) em i antap tumas na i no tru.

Dokta Waiko i tok nau yet i gat 27,000 tisa i tis long olgeta hap bilong kantri. Em i tok insait long baset bilong dispela yia, gavman i bin givim K476.5 milien long edukesen dipatmen.

Em i tok 70 pesen (%) bilong dispela mani (K476.5 milien) i go long pe bilong ol tisa tasol.

Dokta Waiko i tok, sapos gavman i bihainim askim

bilong ol tisa long hapim pe bilong ol i go antap long 200 % em i olsem gavman i mas painim narapela K250 milien long putim i go antap long K476.5 milien. Dispela bai kamap olsem K726.5 milien long olgeta yia.

Dokta Waiko i tok gavman bilong Sir Mekere na Zeming i luksave long krai bilong ol tisa long lukim pe bilong ol i mas go antap. Tasol bilong ol tisa long askim long hapim pe bilong ol i go antap long 200 (%) em i no tru.

Em i tok gavman i gat K1 bilien baset long dispela yia. Na taim gavman i skelim dispela mani, gavman i bin givim

K476.5 milien long dispela yia i go long edukesen dipatmen bikos gavman i bin givim namba tu prairiti long edukesen dipatmen long baset bilong gavman long dispela yia.

Olsem na em i tok dispela kain askim ol tisa i wok long sanap strong long en na i kamapim ol straik em i no tru na tu i antap tumas.

Dokta Waiko i tok ol tisa i mas luksave olsem sapos gavman i go het na hapim pe bilong ol i go antap long 200 (%), planti ol arapela dipatmen tu bai askim long gavman i hapim pe bilong ol. Na long kain taim, we Nesenel

Gavman i nogat mani, gavman i no inap bekim olgeta dispela askim, Dokta Waiko i tok.

Dokta Waiko i bin tokaut long dispela bihain long sampela nius ripot i kamap olsem olgeta tisa bilong Hailens rijen i risain.

Dokta Waiko i tok i kam inap long Tunde em i no kisim wanpela pas o ripot we i tokaut long nem bilong ol tisa husat i bin straik. Em i tok em i bin harim long nius tasol olsem ol tisa i bin straik tasol em i wet yet long kisim wanpela ripot i kam long Papua Niugini Tisa Asosiesen (PNGTA) hailens rijen opis, long tokaut olsem dispela nius ripot em i tru.

Ol tisa mas go bek na tis, Dokta Waiko i tok

OLGETA tisa long Papua Niugini i mas go bek long skul na tis, na wetim disisen Tisa Sevis Komisen, Dipatmen bilong Pesenel Menesmen, Salari na Kondisens Monitoring Komiti, na Papua Niugini Tisa Asosiesen bai mekim sampela taim long dispela wik o neks wik, Minista bilong Edukesen, Dokta John Waiko i tok.

Dispela kibung i kamap bihainim askim bilong ol tisa long gavman i mas hapim pe bilong ol i go antap long 200 pesen (%).

Dokta Waiko i tok gavman i luksave long askim bilong ol tisa long wanem, gavman i no bin luksave long ol tisa long las 25 yia na olsem gavman i mas mekim sampela samting long harim na stretim wari bilong ol tisa nau.

Em i tok gavman i wok long glasim wari bilong ol tisa na i wok long glasim wanem rot em i gutpela long mekim.

Dokta Waiko i tok wanem djsisen gavman i mekim nau, i mas redi long bihainim long narapela faipela yia o ol yia i kam bihain.

Em i tok sapos gavman i pasim tok long hapim pe bilong ol tisa, gavman i mas redi long bihainim dispela disisen long ol yia i kam bihain na i no nau tasol bikos ol tisa i tok long straik.

I kam inap long dispela wik, Dokta Waiko i tok, em i amamas wantaim ol toktok Tisa Sevis Komisen, Dipatmen bilong Pesenel Menesmen, Salari na Kondisens Monitoring Komiti, na Papua Niugini Tisa Asosiesen i mekim na em i bilip ol bai kamap wantaim sampela gutpela disisen.



Taim bilong singsing ...

• (lephan) Rijinol memba bilong Milen Be provins Dem Josephine Abajjah wantaim meri bilong Praim Minista, Roslyn Morauta i danis bilong gaden wantaim ol mama bilong lsten Hailans las wik long bikpela Kalsarel De bilong ol meri long lsten Hailans provins. *Poto Francis Benny PM's Media*

14,800 tisa tasol i rejista long PNGTA, Dokta Waiko i tok


MINISTA bilong Edukesen, Dokta John Waiko i tok i gat 27,000 tisa long PNG, tasol 14,800 tisa tasol i rejista olsem fainensel memba bilong Papua Niugini Tisa Asosiesen (PNGTA).

Tasol em i tok aninit long Tisa Sevis Komisen Ekt Seksen 95, olgeta tisa i ken straik sapos ol i gat gutpela as bilong straik.

Em i tok aninit long dispela ekt, gavman i ken luksave long straik bilong ol tisa na painim rot bilong stretim wari bilong ol.

Long wankain taim em i tok, ol tisa i mas luksave olsem i gat 27,000 tisa long kantri na moa long wan milien skul pikinini na samting olsem foa milien papamama husat i gat rait bilong ol tu.

Dokta Waiko i tok samting olsem wan milien skul pikinini husat i skul long elementeri i go long gred 12 i gat rait long kisim save. Antap long dispela, Dokta Waiko i tok, moa long foa milien papamama bilong ol pikinini i skul tu i gat rait long lukim olsem ol



• Dokta John Waiko.

pikinini bilong ol i kisim save.

Em i tok gavman i mas kisim wari bilong planti ol manmeri. Long kain hevi olsem, (olgeta tisa pasim tok long straik) em i tok, gavman i luksave long wari bilong ol tisa, tasol long wankain taim, gavman i gat wok bilong lukautim moa long wan milien pikinini na tu moa long foa milien papamama.

Kas givim K40,000 bilong em yet long famili bilong Kiangua

MADANG Gavana Jim Kas i bin givim K40,000 bilong em yet i go long ol famili bilong Alois Kiangua husat i bin dai tupela wik i go pinis insait long wanpela birua bilong ka, Gavana Kas i bin bungim long Madang olsem bel kol mani.

Edministreta bilong Madang, Clant Alok, i tokim Wantok olsem dispela mani, i no kam aut long mani bilong provinsel gavman.

Mista Kas i tok tu olsem em i no ronowe long han bilong lo na ol plisman. Em i tok, plis komisina yet i save long dispela hevi na i tokim em olsem plis bai sasim em bihain long Palamen kibung.

Mista Kas i tok tu olsem sapos ol memba bilong Madang Provinsel Asembli i laik holim vot i nogat bilip long rausim em, ol i mas bihainim lo bilong Provinsel na Lokol Level Gavman.

Em i tok tu olsem dispela hevi i stap long han bilong plis na i moa gutpela ol provinsel memba i mas wokbung wantaim em na bringim sevis i go long ol pipel bilong Madang na maski long pilai politik.

WANTOK

All departments. Phone: 3252500 - Fax: 3252579
P. O. Box 1982, Boroko, NCD, Papua New Guinea.

Publishing Weekly, Wednesday, for
Word Publishing Company Ltd.

Printed and Published by Anna Solomon of Bittern Place, Corralons, at Allotment 2, Section 209, Spring Garden Road, Honiara, for Word Publishing Co. Ltd.

General Manager and Group Editor in Chief:
Anna Solomon
Sales, Advertising Manager:
Jocko Oberleuter

Editor of Wantok:
Yakam Kelo.

Papers distributed by air throughout PNG.
Available by air mail subscription within Papua New Guinea and overseas
Email address:
word@global.net.pg

Advertising deadlines, Display bookings: Tuesday midday. Camera ready copy: Tuesday midday. Classified Advertising: Tuesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Mekere wanbel long rausim poka masin

YAKAM KELO i raitim

WOK painimaut i soim olsem Gavman i mas rausim poka masin long kantri, memba biktok Mosbi Saut Ledi Carol Kidu i tokim palamen long aste.

Ledi Kidu i tok em i kamapim wanpela wok painimaut we i soim olsem planti lain i save pilai poka masin i laikim dispela masin i mas stop.

Em i askim Gavman tu long i no ken sanapim ATM masin bilong kisim mani insait long ol klap na ples bilong pilai poka masin. Dispela em wan-

pela bikpela hevi we ol manmeri i save lusim mani long pilai na yusim kat long kisim mani gen na pilai yet. Na olgeta mani i save pinis.

Ledi Kidu i tok poka masin i kamapim planti hevi long sindaun bilong famili na komyniti na planti hevi na trabel i kamap pinis. Olsem na Gavman i mas skelim na stapim dispela masin.

Praim Minista Sir Mekere Morauta i tokaut olsem gutpela wok painimaut bilong Ledi Kidu i kamapim tru ol bagarap na nogut bilong dispela samting.

Sir Mekere i sapatim toktok olsem dispela masin i no

helpim ol manmeri na i no kamapim wanpela gutpela samting long kantri.

Em i tok bai Gavman i sindaun na glasim ol toktok na kamap wantaim wanpela komiti bilong lukluk insait long dispela hevi na stapim poka masin sapos ol i ken.

Nau em i laik yusim ol mani poka masin i save pulim long kamapim ol kos na program bilong helpim tingting bilong ol manmeri husat i save pilai dispela gem olgeta taim long ol i ken stat lusim.

Em i sapatim na tok bai gavman i wok strong insait long dispela toktok bilong Ledi Carol Kidu.

Ol Sios no laikim lo bilong pasin pamuk

PAPUA Niugini Kaunsel Ov Sios na Caritas PNG i tok strong olsem ol i no sapatim toktok bilong Gavana bilong Morobe, Luther Wenge long kamapim lo bilong pasin pamuk long Papua Niugini.

Ol i tok lo bilong pasin pamuk i no inap stapim HIV/AIDS. Ol i tok edukesen awenes em wanpela rot we i ken helpim long stapim HIV/AIDS na gavman i mas lukluk long strongim dispela.

"Gavman i mas askim em yet.

Bilong wanem pasin pamuk i stap long PNG? Wanem as bilong dispela sik? Gavman i glasim wari bilong ol pipel bilong yumi o nogat? Wanem pesen bilong ol pipel bilong PNG i mekim pasin pamuk long lukautim laip bilong ol? Yumi glasim ol arapela hevi pasin pamuk inap kamapim long laip bilong ol pipel bilong yumi tu o nogat?" Jenerel

Seketeri bilong PNGCC, Misis Sophia Gegeyo i tok.

Olgeta dispela toktok i kamap bihain long Gavana bilong Morobe, Luther Wenge i tokim Palamen long kamapim lo bilong pasin pamuk olsem wanpela rot bilong stapim sik HIV/AIDS long kantri bihainim ripot bilong Helt Minista Ludger Mond long HIV/AIDS long Palamen las wik.

Ol lain i nogat laisens na i gat gan bai kisim bikpela mekim save

WENCESLAUS MAGUN i raitim

MINISTA bilong Plis, Mathias Karani i tokim Wantok long dispela wik olsem em i gat tingting long glasim gen lo bilong gan na kamapim ol nupela lo bilong givim bikpela mekim save i go long ol lain i gat gan tasol i nogat laisens.

Em i tok, em i gat laik long hapim ol yia long kalabus i go long 5-pela yia wantaim strongpela mekim save.


Mista Karani i tok dispela nupela lo bai i no inap tok orait long kisim kot fain. Nogat. Husat man o meri i gat gan na i nogat laisens, Mista Karani i tok, ol i mas go stret long kalabus.

Mista Karani i tok em i paitim toktok pinis wantaim plis komisina long dispela toktok na nau yet ol i wok long glasim lo bilong gan.

Mista Karani i tok nau long dispela taim, lo bilong gan, long kantri em i no strong tumas long givim bikpela mekim save long ol lain i gat gan tasol i nogat laisens.

Em i tokaut long wanpela bilong ol kain lo olsem i stap insait long 'Firearms Act Seksen 27. Dispela lo i tok, husat man o meri i gat wanpela 'High Powered' (strongpela) gan, tasol i nogat laisens bai baim K400 o i go kalabus i no moa long foapela mun.

Mista Karani i tok ol kain lo olsem i mas



• Mathias Karani.

senis na ol lain i brukim kain ol lo i mas kisim moa taim long haus kalabus wantaim strongpela mekim save.

Em i tok dispela lo bai stapim lo na oda hevi na tu ol pait long hailens na strongim developmen long kantri.

Mista Karani i tok tude long PNG, ol lain i gat laisens bilong pistol em 2,023 manmeri, raifel em 1,067 manmeri, na sot gan em 21,024 manmeri.

Dispela namba em i tok, i no karamapim ol lain i gat pistol, raifel, sot gan na ol arapela strongpela gan tasol i nogat laisens.

Nogat wanpela ansa long mani i sot

PRAIM Minista Sir Mekere Morauta i tok Papua Niugini i gat panti hevi tru maski kantri i gat planti risos bilong pulim mani.

Sir Mekere i tok mipela i nogat save long sevim risos tasol mipela i oltaim laik kaikai tasol na long dispela as, planti mani i save lus nabaut na kantri i save sot long mani long mekim ol wok bilong sevim pipel na kirapim kantri.

Sir Mekere i tok hevi bilong mani i sot long kantri i nogat wanpela ansa tasol long en. Nogat. I gat planti hevi olsem, nogat gutpela menesmen, nogat gutpela plen, gavman i no sanapim wanem em bikpela samting long stretim pastaim na wanem em liklik na bai stretim bihain na ol arapela hevi moa.


Em i tok bikpela hevi em i lukim i olsem sapos mipela i mas sanapim wanem bikpela wok na samting bilong stretim i mas kam pastaim na bihain wanem i anint i ken bihainim long lista bilong gavman taim em i laik skelim mani long baset o, kirapim wanem wok insait long kantri.

Praim Minista i tok sapos mipela i sanapim ol samting long lain na bihainim bai ol wok bilong mekim gutpela plen na kamapim gutpela menesmen bai bihainim gut. Na dispela inap sanapim gutpela rot bilong kantri i bihainim long nau na planti krismas i kam bihain tu.

Sir Mekere i mekim dispela toktok long bekim askim bilong Gavana bilong Sandaun provins John Tekwie long em i laik save wanem as tru tru long hevi bilong mani na bisnis i pundaun long Papua Niugini taim kantri igat planti risos tru olsem oil, gol, kopa, kopi na planti moa.

Mista Tekwie i tok kantri inogat wanpela poin long sot long mani tasol bilong wanem as tru na mani save sot na kantri i save bungim hevi olgeta taim.

Praim Minista Sir Mekere Morauta i tok i nogat wanpela ansa tru long dispela askim tasol em i bilip dispela lukluk bilong em inap kamapim sampela gutpela rot bilong daunim sampela bilong ol dispela hevi long sait bilong mani na ekonom i insait long kantri.



SENSES Direkta Mista John Kalamoroh husat em i pikinini bilong Manus, i narabait tru long asples bilong em.

Em i tok aste long Pot Mosbi olsem hap bilong Papua Niugini i was olsem Manus, wok bilong 2000 Nesenel Populeisen Senses bai i isi tru.

Mista Kalamoroh i hamamas long Mista bikos em i kisim pinis olgeta senses kwetepa pepa bilong Manus.

Long Sande bilong Rimembarens Dei long wiken las wik, provinsel senses kodineita bilong Manus, Mista Joe Hilarai, i bin kisim balus i go long Pot Mosbi wantaim olgeta senses pepa bilong Manus.

Bihain long Tunde taim Rimembarens Dei long wiken i pinis, Mista Hilarai i bin i go ming wantaim Mista Kalamoroh long senses hetkwota long Wards Strip insait long Waigani na i bin givim senses ripot bilong Manus i go long Mista Kalamoroh.

Manus i pes provins long pinisim olgeta wok bilong senses na ol i bin brukim rekot stret bikos ol i bin kauntim olgeta manmeri pikinini bilong Manus bipo long Sarere Julai 15, dei bilong kaunting bai i stop.

Olsem na Mista Hilarai wantaim senses tim bilong em i bin stap malolo tasol long las wik na dispela wik taim ol wanwok bilong ol long ol arapela hap bilong Papua Niugini i wok long hatim na brukim bun bilong ol long senses mop-ap opareisen.

Long mop-ap opareisen, ol senses wokmanmeri i go bek ken long kauntim ol pipel ol i no bin kauntim long taim bilong senses long Sande Julai 9 i go inap long Sarere Julai 15.


Dispela wok i bin stat long Sande Julai 16. Senses mop-ap insait long ol taun bai i pinis long 12 kilok nait long dispela Sande Julai 30.

Long ol ples kanaka na ol rurel eria, i gat 3-pela mo wik bilong senses mop-ap opareisen. Mop-ap opareisen bilong ol bai i pinis long 12 kilok nait long Sande Ogas 13.


Mista Kalamoroh i tok olsem olgeta manmeri pikinini insait long kantri i mas wok yet wantaim ol senses wokmanmeri bilong ol long pinisim gut 2000 Nesenel Populeisen Senses.

• Gavman bilong Papua Niugini na Gavman bilong Australia i sapatim 2000 Nesenel Senses.





NIUGINI AILAN NIUS



Saut Bogenvil pipel i sot long kaikai

A. T. Bogenvil i stap nau long hevi sot long kaikai bikos bikipela...

...bagarapim ol gaden kaikai. ...bianti ol skul i no bin op bikos...

...wara i pasim wokabaut bilong ol sumatin na ol tisa. Bikipela ren i stap nau long ol ples...

...sem Buin, Siwai na Nagovis na i kamapim bagarap tru long ol gaden kaikai. Ol rot na tu skul bilong ol sumatin.

Ol ripot i kam long saut Bogenvil i toklong Siwai eria bikipela ren tru we i no bin stop i bin kamap long tripela...

...de na dispela em long Sarere Julai 15, Sande namba 16 na Mande namba 17.

Dispela i bin kamapim ol taitwara we i bin karim ol gaden kaikai na tu wara i pulap long ol gaden na bagarapim olgeta samting. Tasol i laki na nogat man i kisim bagarap long dispela taim nogut.

Ol rot tu i bagarap i stap na dispela i mekim hat ol trak i bihainim rot long Siwai i go na i kam long Buin, Arawa na Buka. Solwara tu i bagarap na dispela i mekim ron long sip na ol motobot i go i kam long saut Bogenvil i hat long dispela taim. I bin hat tu long balus i pondaun long Tonu ples balus long las wik.

Ol ripot i tok pastaim bagarap bilong bikipela ren i kamap, ol pipel long Siwai distrik i bin wok long bungim hevi long kaikai i sot long wanem ol binatang i bagarapim ol kaukau na ol i no inap long karim gut kaikai.


Dispela i kamap taim ol liklik binatang olsem ol senflai i sindaun long ol lip kaukau na ol i putim pekpek long ol na rop kaukau i no inap long karim kaikai. Dispela samting i kamap long sampela krismas nau tasol ol Dipatmen bilong Praimeri na Ialpstok (DPI) i no wokim wanpela samting yet long en.

Orait, ol pipel bilong Siwai i bin stap long dispela hevi na nau bikipela ren i skruim hevi i go moa. Ol ripot i tok wanem liklik kaikai i stap em olgeta i sting bikos wara i bagarapim.

Bikipela reni save bagarapim ol gaden kaikai na hevi long kaikai i save sot long dispela taim bilong yia long Saut Bogenvil i no nupela samting.

Na sampela lain husat i wari long dispela samting i tok i muabeta long ol DPI lain, ol distrik manesa na ol siefs na ol bikman insait long ol komyuniti i sindaun toktok na kari-maut ol aweanes long toksave long ol pipel long redi gut long dispela taim nogut. Long dispela aweanes, ol DPI opisa na ol bikman i ken tokim ol pipel wanem ol kaikai i gutpela long planim kaikaim long taim bilong bikipela ren na taim bilong hangre.

Wantok niuspepa i no bin inap long kisim moa toktok long ol atoriti long dispela samting long Buka administresen opis.



• Motobot i karim ol skul sumatin na ol biklain wokman long Kokopau go bek long Bogenvil Skul na wok long Buka Ailan sait.

Komyuniti singaut long gavman long strongim lo na oda long Bogenvil

SINGAUT i go long ol atoriti long putim ol plis na strongim ol wok bilong lo na oda insait long Bogenvil.

Na tu putim ol lika laisens lo o lo bilong lukautim ol strongpela dring insait long provins.

Dispela i bihainim planti hevi long lo na oda i wok long kamap insait long Bogenvil.

Wari i stap insait long planti komyuniti iong Bogenvil long planti yangpela man husat i lusim pait na nau i sindaun nating long ples.

Na singaut i go long ol atoriti na gavman long givim wok o ol liklik projek we ol dispela yangpela man i ken go insait long ol.

Singaut i go tu long ol atoriti long mekim samting long stapim pasin bilong karim ol ofensiv wepon o ol samting we i ken bagarapim narapela long en wantaim olsem sap naip na sarif bikos taim ol yangpela i dringim hombru, ol i save katim wanpela arapela o bagarapim ol narapela wantaim ol dispela sap nai, sarif na tamiok.

Plantu meri na ol mama, ol komyuniti lida na ol bikman i autim dispela wari bikos long dispela taim sindaun i wok long kamap gut long Bogenvil na planti ol lain husat i bin stap insait long pait i lusim bus na sindaun insait long ples, ol nogat samting long wokim na ol i go insait long pasin bilong wokim na dringim hombru na kamapim hevi.

Ol mama, ol meri na ol narapela man i wok long stap wantaim pret taim ol yangpela i dring hombru na yusim ol sap samting taim ol i gat hevi o birua wantaim narapela.

Ol ripot i tok nau taim ol atoriti i rausim tambu long strongpela dring long Bogenvil we ol bin putim yet long 1990 taim hevi i go nogut, moa hevi i wok long kamap bikos ol no putim ol lo bilong kon-

trolim rot bilong salim ol strongpela dring olsem bia.

Long sampela hap long Bogenvil nau, ol i wok long salim ol botol o ken bia long ol stoa olsem ol sof dring. Na prais bilong wanpela ken o botol em long K5 na dispela i antap tumas.

Ol ripot i tok tru ol Kaunsil ov Siefs i putim lo long ol lain husat i dringim na wokim trabel long ples wantaim K50 sas, ol yangpela i go het yet long wokim, dring na kamapim trabel.

Ripot i tok ol pipel i laikim bai kot sistem i kirap bek long givim mekim save long ol dispela lain husat i brukim lo bikos long dispela taim, planit bilong ol i kilim dai narapela mani sap raun fri na i no kisim taim long hevi.

Ripot i tok ol plis i mas sruim gut wok long daunim hevi long spak pasin wantaim hombru na dispela i wok long skruim hevi we i stap pinis long planti yia moa.

olik balus kampani i ken go insait long Bogenvil na resis wantaim Air Sankamap long givim gutpela sevis.

Dispela em bikos taim dispela wanpela Air Sankamap balus i bungim hevi o em i go long sevis, ol pipel bilong bikiples Bogenvil i save kisim taim long wet long Buka long wanpela o tupela wik na painim narapela rot long i go na i kam long Buka.

Long sait bilong siping sevis, tupela sip bilong Peter Sharp em Ailan Kwin na Atols Kwin i save mekim ron bilong ol long olgeta wik long Lae, Rabaul na Buka. Na stat tasol long Epril, MV Beumaris bilong Nu Ailan Siping i save mekim ron long Rabaul i go olgeta long bikiples Bogenvil wantaim ol stoa kago bilong ol bisnis man bilong Siwai eria. Em i save karim tu ol pasindia husat i laik go long Buka na ol bikiples hap long Bogenvil.

Sip bilong Bogenvil Provinsel Gavman MV Sankamap we i save ron long olgeta hap bilong provins i bia go long draidok long Kens Australia long mun Mas bilong dispela yia na i stap yet long hap bikos i nogat mani long peim ol wok ol i wokim long en long hap.

WANTOK
NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

BIABIA SPAK NOGUT TRU LONG LAE LODS...

HEY, LEWAA.. Hic! MI GAT LAIK YA! (Hic) PLISS WAN SANS OZ? (Hic!)

EM WOK LONG GRIS LONG WANPELA MERI NA OL LAIN BILONG G EM I KAM NA LAIK PAITIM BIABIA...

RAUKIM EM LONG POS NA PAITIM EM!!

BIABIA HOLIM POS STRONG TRU, OL I LAIK RAUKIM EM NA PAITIM EM TASOL MAN YAH I STRONG TRU...

EM I ORAIT, LUSIM EM.. WAN SANS!

TAIM OL I LUSIM BIABIA NA GO, BAGA LUSIM HAN NA SO-OFF STRET...

EM WEI BLONG EN! SAPOS YU LAIK GAVMAN I STRONG, YU MAS SANAP STRONG OLSEM MU...

TASOL BIHAIN LIKLIK.. OLGETA PEN I KAMBEK NA BAGA HAP INDAI.

Bogenvil pipel laikim gutpela siping sevis


VERONICA HATUTASI i raitim

SINGAUT i go long gavman na ol atoriti long Bogenvil long kamapim gutpela siping sevis long ailan.


Long ol rpt we Wantok i kisim, planti pipel long olgeta hap bilong Bogenvil i laikim bai i gat moa siping sevis i go long olgeta hap bilong ailan bikos ol rot i no gutpela yet. Na ol pipel i laik kisim ol samting olsem kakau na kopra i go long ol maket long Buka, rabaul na ovasis.

Antap long dispela tu, sip i wanpela rot we i sevisim gut ol pipel long dispela taim long karim ol kago bilong stoa, ol marasin na ol arapela saplain bilong helt na edukesen sevis na tu bilong ol manmeri i kalap long en taim ol i laik skruim wokabaut insait long ailan na tu ilong ol ausait ples insait long PNG.

Ripot i tok long dispela taim tu, ol i amamas long sevis we Air Sankamap balus i save givim long fali i go long planti hap long bikiples Bogenvil tasol i moa beta sapos ol papa bilong dispela balus kampani i putim tupela balus long wok long ailan. O moa yet, sapos narapela lik-



SEPIK NIUS



Ol meri Sandaun no laikim lo bilong pamuk pasin

SCOTT WAIDE i raitim

KATOLIK Womens Asosiesen bilong Vanimo i agensim toktok bilong Morobe Gavana, Luther Wenge, long kamapim lo bilong pasin pamuk.

Presiden bilong asosiesen, Imelda Leki i tok, kain toktok Mista Wenge i mekim, i soim ples klia ol kain tingting sampela man long Papua Niugini i gat long ol meri.

"Ol i lukim mipela olsem ol samting nating," em i tok. "Wanpela man i ken yusim wanpela meri na taim em i les long em, em i lusim em na i go kisim narapela."

Misis Leki i sapatim singaut bilong Caritas PNG na PNG Kaunsel Ov Sios husat i tok olsem kain lo olsem bai go het long bagarapim sindaun bilong ol meri long kantri long kain taim olsem nau we ol man i save luk-

daun long ol meri.

Katolik Womens Asosiesen bilong Vanimo wantaim sapat bilong Vanimo Daiosis i bin tok-tok strong long toktok bilong pasin pamuk. Oj i bin holim pinis tupela protes mas, namba wan taim long 1998, na narapela long Mas dispela yia.

Misis Leki i tok, nau long dispela taim, taim rot bilong Vanimo i go olgeta long Jayapura long boda taun bilong Indonesia, pasin pamuk, i go antap tru insait long Vanimo na tu ol ples klostu long Vanimo.

Em i tok sapos gavman i kamapim lo bilong pasin pamuk, dispela bai helpim ol ausait bisnis manmeri long wokim ol haus pamuk insait long provins.

"Mipela i kisim pinis ol meri i brukim lo na i kam long Indonesia. Ol i kam long hia olgeta wik wantaim ol man bilong mipela husat i maritim tupela

meri, wanpela bilong PNG na narapela bilong Jayapura," Misis Leki i tok.

Em i tok tu olsem nau long dispela taim, PNG i nogat ol gutpela sevis bilong painim aut sik HIV/AIDS.

Em i tok asosiesen i sapatim tu toktok bilong Bisop bilong Vanimo, Cesare Bonivento, husat i tok, samting olsem 20 pesen bilong ol kondom i no gutpela olsem planti ol pipel i ting olsem kondom em i gutpela na i ken abrusim sik HIV/AIDS.

Em i tok maski lo bilong pasin pamuk i kamap, o ol manmeri i yusim kondom, pasin bilong pamuk wantaim moa long wanpela man o meri bai go het long kamapim sik HIV/AIDS.

Katolik Womens Asosiesen bilong Vanimo i wok long redim wanpela petisen pepa long givim long praim minista long dispela toktok.

Namba 8 skul i op long namba 2 aniveseri bilong Sunami

MOA olsem 500 manmeri i bin bung long Wuipom long Wes Kos bilong Aitape long opim Nimas Kome Memorial Skul na tu makim namba tu yia bilong tingim husat i kisim bagarap na dai long Sunami birua long Julai 17, 1998.

Ol manmeri i bin kam long ples olsem Japan, Is Niu Briten, Bishop bilong Aitape, ol lain makim PNG kaunsel ov Sios, Provinsel Edministreta, Lokel Level Gavman na olgeta manmeri bilong ples.

Dispela seremoni i bin stat wantaim singsing tumbuna bilong welkamim ol manmeri na bihain 5 minit nogat nois bilong tingim olgeta lain manmeri na pikinini husat i bin dai long dispela birua tupela yia i go pinis.

Nimas viles em i wanpela bilong 4-pela viles we i bin sanap long Sisano. 105 manmeri i bin dai long taim sunami i bagarapim ples. Inap olsem 600 manmeri bilong Nimas i muv i go na nau i stap long Wuipom we dispela skul i op.

Skul i gat 3-pela dabol klasrum na 5-pela haus bilong ol tisa. Nau yet i gat 85 sumatin i stap long dispela skul. Ol lain manmeri long Kobe insait long Japan givim mani bilong sanapim dispela skul.

Suzuki Ryuta bilong Koibe long Japan i bin kam namba tu taim bilong em long Wuipom i tok ol manmeri bilong Kobe na Wuipom i gat strongpela poroman i stap.

Mista Ryuta i tok: "Ol pipel bilong Kobe tu i bin kisim wankain bagarap taim graun i guria na bagarapim ol. Mipela i tingim bek dispela birua we i bin bagarapim mipela nogut tru na dispela as mipela laik helpim tru taim mipela harim olsem graun guria wantaim sunami i bagarapim ples long hia."

Dispela graun we skul i sanap nau long en i bin go fri long skul bikos ol komyuniti lida i no laikim dispela pasin bilong kros pait long graun we i wok long kamap long narapela ol senta bilong ples solwara i bagarapim.

Sandaun Provinsel Edministreta Maran Nateleo i tok Gavman bilong Sandaun i luksave long Nimas Kobe Memorial Skul na bai helpim skul long wok mentenens na arapela wok

kamap bilong skul.

Mista Nataleo i tok: "Ol komyuniti bilong Wuipom i givim dispela graun fri i go long skul na dispela i soim olsem ol i gat bikpela tingting long wok olsem wanpela komyuniti. Mi laik tok amamas tu i go long olgeta wok yupela i bin mekim bilong kamapim dispela skul. Yupela yet i kamapim dispela skul we bai lukautim yupela long bihain."

Nimas Kobe skul i stap long graun we bipo i bin i gat bus tasol. Ol manmeri i bin klinim dispela ples long han tasol bilong sanapim dispela skul. Liklik Haus sik (eid pos) i no op yet bikos olpela Praim Minista Bill Skate husat inap go opim dispela i no bin kamap long dispela bung.

Komyuniti lida bilong Wuipom Paul Saroya i tok tenkyu i go long pipel bilong olgeta hap graun husat i helpim long sanapim dispela skul.

Mista Saroya i tok: "Mipela i amamas na pilim inap long dispela helpim mipela i kisim. Sampela pipel i no inap kam na makim dispela speseol de, mi bilip olsem spirit bilong ol i stap wantaim mipela long hia nau."

Mista Saroya i tok bikpela hevi nau em long ol wara tenk long nupela ples ol i kamapim tasol em i tok ating helpim bai kamap hariap na olgeta manmeri i ken stretim narapela samting bilong sindaun gut long ples.

Long dispela wankain taim, planti tausen maneri insait long Wes Kos bilong Aitape i bin bung long olgeta liklik hap bilong kamapim memorial sevis i go long planti tausen lain husat i bin dai tupela yia i go pinis.

Dei tru bilong tingim dispela manmeri husat i dai i bin kamap long Sande na Santu Ignatius Haus Lotu long Aitape na NBC redio i bin kamapim brodkas long dispela. Inap olsem 500 manmeri i bin go long wanpela Katolik lotu long Arop na i bin gat planti arapela sevis olsem i bin kamap wantaim narapela ol sios long olgeta hap bilong ples we i bin painim birua.

Planti arapela i laik makim dispela de ol yet na holim liklik lotu bilong ol yet long tingim bek moa long 2,500 manmeri husat i bin dai taim sunami i bagarapim ol long 7 kilok long apinuin bilong Julai 17, 1998.

Nimas Kobe Komyuniti skul i op

LONG Julai 17, ol ples long Sissano i bung long wanpela Misa long tingim ol lain bilong ol i bin dai long sunami long Julai 17, 1998.

Ol pipel bilong Warapu, Malol, Ramo, na Sissano i bung long Avera long opim Nimas Kobe Komyuniti Skul na aid pos bilong Wipom komyuniti.

Ol bikmanmeri husat i kamap long dispela bung em long Bisop Austin Crapp bilong Aitape Daiosis, Ryuta Suzuki bilong Kobe Japan, na Sophia Gegeyo bilong PNG Kaunsel bilong Sios.

Ol arapela bikman i kamap tu em long bisnis man, Robert Parer, Provinsel Edministreta, Maran Nataleo, Aitape Distrik Edukesen Edministreta, ol lain bilong Salvesen Ami, na Wol Visen.

Long dispela taim nogat wanpela politisen i bin kamap maski ol i bin kisim askim pas long kamap long dispela bung. Ol dispela memba em long Eddie Saweni, Gavana John Tekwie na Oposisen Lida, Bill Skate.

Ol Kobe Kaunsel Ov Sios long Japan i bin putim mani i go insait long kirapim Nimas Kobe Memorial Skul. Mani i kam long CDS na NCCA Austrelia em ol i bin yusim long mekim aid pos.

Ryuta Suzuki i kisim ples bilong Reveren Ken Kusachi husat i dai long Januari 20, 2000 bihain tasol long em i kam lukim Wipom, i bin opim dispela nupela skul.



• Ol pipel bilong Barapu i yusim senso long katim plang na wokim haus bilong ol long nupela Barapu bihain long Sunami i bagarapim olpela ples bilong ol, Foto: WENCESLAUS MAGUN.

TOKSORI

Las wik stori long Aitape eniveseri. Dispela stori no bilong ADAM ELLIOTT. Em ripot bilong memba Eddy Saweni. Bikpela sori tru long wanem belhevi i kamap. EDITA.



WIN! WIN! WIN!


TOYOTA HILUX 4WD TO BE WON!

AND 25 PEOPLE TO WIN K1,000 EACH

DRAWN ON 15th SEPTEMBER 2000




SEND IN ANY 3 EMPTY WRAPPERS OF HI-WAY HARDMAN OR HI-WAY BEEF IN AN ENVELOPE WITH YOUR NAME AND ADDRESS TO: EMTV P.O. BOX 443 BOROKO, NCD.



SAUTEN



RIJON



• Piksa i soim fran bilong Palamen haus we ol i planim flawa i soim piksa bilong Kumul o Bird of Paradise. Dispela wantaim olgeta arapela wok i kamap long Palamen i bilong redi long Independens selebresen. Foto: ISSAC IKUAVI.

Ol Mekeo mama mekim namba wan raun long haus palamen

OL Wimens grup bilong Mekeo long ples Inauaia i kisim K2,000 i kam long memba bilong Kairuku Hiri Moi Avei na rijinol memba bilong Sentrel provins Ted Diro long Trinde aste long palamen haus.

Apa Ngiku wimens grup i bin mekim wapela raun i go long haus palamen long Trinde aste taim Spika bilong Palamen Bernard Narokobi i bin askim ol long kam.

Dispela em i olsem wanpela senis raun we Mista Narokobi i bin go wantaim Moi Avei na ol Sentrel lida long opim wanpela haus lotu long Mekeo long dispela yia.

Planti bilong ol dispela meri i namba wan taim tru bilong ol long lukim haus palamen o go insait na sindaun lukim we ol memba i save sindaun na toktok long ol hevi bilong pipel na kantri na mekim disisen.

Insait long dispela amamas raun bilong ol i go lukim palmaen, ol i askim rijinol memba bilong Sentrel provins Ted Diro long helpim ol sanapim gutpela wara saplai long ples bilong ol. Bikos wara i wanpela bikpela hevi ol mama i save bungim long ples olgeta taim long sindaun bilong ol.

Mista Diro i tokim ol olsem taim gutpela taim we ren i stop bai ol wokman bilong Woks i ken wokim gut rot bai ol memba i ken tingim long stretim ol kain sevis olsem i go long pipel. Tasol Mista Diro i tok em i no lusim tingting na em bai sanap yet long helpim ol mama long dispela askim bilong ol.

Lida bilong dispela wimens grup Josephine Efi i tokim Mista Diro olsem em bai sanap yet na bihainim dispela askim na toktok bilong Mista Diro.

Swokim askim kompensesen long Is Awin kem

YAKAM KELO i raitim

MEMBA bilong Not Flai Kala Swokin i askim Gavman long baim kompensesen long ol pipel bilong em long givim graun bilong ol long ol refiuji bilong Wes Papua long sindaun long en insait long Is Awin kem.

Mista Swokin i tromoi dispela askim i go long Praim Minista Sir Mekere Morauta olsem klostu 10-pela krismas ol pipel long Wes Papua bin kam stap long Is

Awin refiuji kem long Westen provins. Tasol Gavman i nogat graun bilong putim ol dispela lain manmeri long en.

Olsem na ol papagraun i larim ol dispela lain manmeri i sindaun long en inap nau.

Mista Swokin i tok Gavman i mas lukim dispela na baim ol papagraun bilong Is Awin kem sampela kompensesen mani long dispela.

Memba i tok sapos ol pipel bilong Is Awin i no bin orait na givim graun bilong ol long kamap olsem refiuji kem, ol

Wes Papua lain manmeri husat i brukim boqa i kam insait long Papua Niugini bai go nabaut long olgeta arapela provins na ol taun nabaut we inap kamapim planti hevi long Gavman. Tasol ol i kam na sindaun isi na Gavman i no kisim wanpela hevi long dispela.

Em i askim Praim Minista olsem inap long Gavman bilong em i ken putim dispela singaut o askim bilong ol pipel bilong em i go insait long baset bilong neks yia 2001.

Praim Minista Sir Mekere long bekim bilong em i tok em i no bin save long dispela toktok o wanem komplemen we i bin kamap long sait bilong kompensesen long dispela graun long Is Awin refiuji kem.

Olsem na em bai larim dispela hevi i go long han bilong ol rait opis stret long lukluk long en na toksave long em bihain.

Ol rait opis i go pas long dispela refiuji kem em Provinsal Afeas na Lokol Gavman opis.

Dibara askim long mani bilong wok turis

Memba bilong Rigo Dibara Yagabo i askim Kalsa na Turism Minsta Andrew Baing long tokaut sapos i gat plen na mani bilong ol pipel i ken strongim wok kalsa na turis long ples bilong ol wanwan.

Mista Yagabo i tok em i harim na lukim ol toktok na wok bilong Mista Baing long wok bilong Turism na kalsa na em tu i laik strongim dispela wok long ilektoret bilong em long Rigo insait long Sentrel provins.

Em i tok sapos gavman i gat mani na baset bilong sapotim

kain wok olsem long strongim na kirapim kalsa insait long ples wanwan, em i laikim bai gavman i tokaut bai ol i ken save.

Mista Yagabo i tok ilektoret bilong em long Rigo i gat planti gutpela rot bilong pulim na na strongim wok turis na kirapim strong wok na pasin bilong kalsa. Na olsem em i ting gavman i mas tokaut long sapot na wok bilong ol long dispela bai ol ples pipel i ken gat sans long dispela progrem insait long viles level.

Minista Andrew

Baing i tok tru Ministri bilong em i sot long mani tasol em i ting i gutpela long ol pipel i mas gat dispela kain tingting na plen long kirapim ol wok bilong turism we ol i ken wokim ol liklik ges haus na ol plen olsem bilong pulim mani long en bihainim pasin kalsa tu wantaim.

Mista Baing i tok turism em bikpela bisnis insait long wol na i save pulim na kamapim bikpela mani tru. Olsem na i gutpela long ol pipel i gat kain tingting bilong wok turism.




Tablebird Kwikkai 900 gr	K5.25
Dosifits Nappies	K12.75
Roots Rice 1 kg	K1.37
Snowwhite Bleach 500ml	K1.48
Cold Power 200gr	K1.33
Globe Corned Beef	K2.79
Paradise Hiway Hardman 125gr	K0.40



Weet Bix 375 gr	K3.45
Mortein Mosquito coils	K .95
Flame Plain Flour 1 kg	K1.11
Maggi Noodles 85 gr	K .50
Rosella Tomato Sauce 300ml	K1.90
Gental Toilet Rolls	K0.53
Sunshine Milk 1litre	K1.39

Planti moa kaikai prais i go daun long en!

Ph: 325 7566, 325 0863 Fax: 325 7096



HAILANS NUIS



Moran Wel Fil bai wetim tok orait bilong Minista

JOIN Ventja kampani ol i kolim long Sentrel Moran Developmen projek bai developim Moran Oli Fil insait long Sauten Hailans provins, Petroleum na Maining Minista Fabian Pok i tok.

Projek ya i karamapim PDL 2 na PPL 138 laisens eria.

Mista Pok i tokaut long dispela samting taim em bin givim progres ripot long dispela samting i go long palamen long dispela wik.

Mista Pok i tok Moran Oil Fil em namba tri wel fil insait long kantri bihain long Kutubu Fil we i bin stat long kamapim wel long 1992 na Gobe we i bin stat long kamapim wel long 1998.

Minista Pok i tok Moran fil i karamapim tupela laisens eria. Em long PDL2 we Kutubu Fil i stap insait long en na Petroleum Prospekting Laisens 138 (PPL 138). Chevron i lukautim PDL 2 long nem bilong wanpela kampani grup tasim Esso i lukautim PPL 138 long makikm em yet na Oil Ses kampani.

Ol bin painim Moran wel Fil long 1996 na bihainim dispela, ol i painim foapela moa hul bilong wel we ol i drilim yet long nau.

Minista Pok i tok bihainim ol ripot long ol wok painimaut long ol wel ya, ol i painimaut olsem Moran Wel Fil projek i gutpela long go hetim na bai i kamapim mani long en.

Em i tok i no long taim i go pinis, ol kampani ya i putim aplikesen ripot long ministri bilong em olsem ol i redi long go hetim projek ya.

Em i tok dipatmen bilong en bai lukluk na glasim aplikesen na sapos olgeta samting i stret, Minista yet bai givim tok orait bilong en long dispela samting.

Minista Pok i tok Moran Fil em wanpela hatpela prijek long karim ol wok painimaut na kirapim. Olsem na em bin kisim foapela krismas long kamap long dispela hap we em i stap long en tude.

Minista i tok planti wari i kamap long Moran Wel Fil long ol nesanel, provinsal na ples lida, ol pablik na tu ol papagraun. Na em i tok dispela toktok we em i mekim long nau bai kiarim tingting bilong ol long Moran Wel Fil.

Lo bilong pamuk nogut, PaterAmbane tok

YAKAM KELO i raitim

KAMAPIM Lo bilong oraitim pasin pamuk insait long kantri em wanpela slek pasin tru Gavman i laik mekim, Gavana bilong Simbu provins Pater Louis Ambane i tok.

Long palamen las wik ol memba i bin toktok planti long kamapim lo bilong oraitim pasin pamuk insait long kantri. Dispela em long traim daunim hevi bilong ol kain kain sik nogut olsem AIDS we i wok long kamap bikpela insait long kantri.

Ol lida i ting sapos dispela lo bilong oraitim pasin pamuk i kamap, bai ol manmeri i yusim ol marasin, kondom na ol klipela rot bilong bihainim. Bikos long nau, ol manmeri i save mekim nabaut na i no yusim ol marasin na kondom stret na sik nogut olsem AIDS i kamap bikpela insait long kantri.

GAVANA bilong Simbu Pater Louis Ambane i tok Gavman i no ken tingting long kamapim kain lo olsem bikos ol i laik traim daunim ol sik nogut. Bikos dispela kain lo em i olsem wanpela slek na les pasin bilong Gavman long daunim as tru bilong hevi we sik nogut i wok long kamap long en.

Pater Ambane i tok wanpela bikpela tingting tasol em Gavman i mas lukluk strong nau long wok bilong strongim ol manmeri.

Em i tok Gavman i mas lukluk long strongim wok bilong sios, edukesen na ol progrem we i save kirapim ol manmeri long mekim gutpela wok na ol samting bilong lukautim laip na sindaun bilong ol i go gutpela.

Olgeta Hailans Gavana bai bung gen

Namba tu bung bilong ol Hailans gavanoas bai kamap long 1 na 4 long mun Ogas long toktok long samting we i wok long kamap long ol Hailans provins na traim stretim dispela ol hevi.

Dispela bung bai kamap long Maunt Hagen na bai bungim olgeta Gavana bilong 5-pela provins wantaim.

Siaman bilong ogenaising komiti na olupela Primia bilong Westen Hailans Philip Kapal i tok long dispela wik olsem dispela kain bung em i gutpela samting long olgeta pipel bilong hailans rijon bikos planti wokmani na pipel bilong dispela kantri i stap long hailans rijon.

Mista Kapal i tok: "Mipela i mas stretim na strongim ekonomi long yumi na bilong kamapim dispela kain samting i gutpela long yumi bungim ol lida long kamapim ol plen."

Em i tok dispela bung bai i no kamapim olgeta hailans provins olsem wanpela tim tasol, em bai helpim ol lida long lukim wanem kain hevi i wok long stap insait long ol provins olsem lo na oda na arapela bikpela samting na kamapim tingting bilong stretim.

Gavana bilong Westen Hailans, Pater Robert Lak i tok i gutpela long holim ol dispela kain bung bikos dispela bai helpim long stretim sampela bikpela samting we i wok long kamap insait long rijon.

Gavana Lak i bin tok olsem dispela miting i bihainim wanpela miting we i bin kamap bipo long dispela yia insait long Goroka.

Em i tok sampela bilong ol bikpela samting ol bai tok long

en i bin kamap pinis long Goroka tasol nau bai ol i traim pinisim dispela ol plen na tingting ol i kamapim na toktok long stretim hailans haiwe.

Ol bai toktok tu long lo na oda na sait bilong gavman laik kisim kontrol long kopi.

Gavana Lak i bin tok olsem dispela em sampela bilong ol bikpela samting we ol i bin toktok pinis insait long Goroka tasol dispela taim bai ol i strongim dispela ol toktok na painimaut wanem samting ol i mas mekim na pinisim stret.

Gavana Lak i bin tok olsem Hailans Haiwe em i namba wan samting bai ol i toktok long dispela bung bikos em i laip lain bilong olgeta manmeri insait long rijon na wanem hevi i kamap long dispela rot bai bagarapim tru olgeta bisnis haus na manmeri insait long olgeta provins.

"Mipela bai toktok strong long dispela samting bikos olgeta samting olsem risos na bisnis i stap long hailans i stap long strong bilong dispela haiwe," Gavana Lak i tok.

Em i tok mipela i gat planti risos mipela i save givim i go long dispela kantri na Nesanel Gavman i mas tingting long dispela na lukluk long dispela hailans haiwe na stretim.

Gavana laik i singaut tu long olgeta manmeri bilong hailans husat i stap na wok insait long Maunt Hagen long kam bung na harim wanpela open bung bai kamap long Ogas 4 na ol i ken harim wanem kain tingting olgeta hailans lida i gat bilong stretim ol dispela hevi na kampim nupela senis insait long hailans rijon.



• Ol Gavana bilong 5-pela hailns provins i bung long sanap wok wantaim long stretim ol hevi insait long hailans rijon. Stori na piksa: TIMOTHY AIMS.

2000 CENSUS ADVERTISEMENT

OKSAPMIN, YARSI, TELEFOMIN CENSUS MISSION ACCOMPLISHED, PLEASE SEND THE PICK UP CHOPPER OVER, PLEASE ACKNOWLEDGE OVER!

I CAN PICK UP SIGNALS, CAN YOU SEE ANYTHING DOWN THERE...

YES!

WHAT CAN YOU SEE?

CLOUDS!

2000 National Census Hotline

Ol i no kaunim yu? Em i no let. Apim telefon tasol na ringim Fri kol
Census Hotline - 180 1000

Givim adres bilong yu. Mipela bai kam na kaunim yu.

Kaunim mi tu!



MADANG NIUS



Skul long taim bilong ol mama



• Ol meri Kamba i putim wangepela drama long stori bilong namba wan skul i kamap long ples bilong ol. Foto: Opis bilong Jacob Wama.

Rausim blek baket long Nabasa na Niutaun

MEMBA bilong Madang, Jacob Wama, i gat bikpela laik long rausim ol blek baket toilet long Madang taun.

I no longtaim i go pinis, em i bin givim 500 septik toilet long ol lain i stap long Nabasa na Niutaun bilong Madang taun long rausim ol blek baket.

Madang Open Join Distrik Baset Praioriti Komiti i bin tok orait long dispela Septik Toilet Projek.

Mista Wama i tok, wok bilong putim samting olsem 500 septik toilet long haus long Nabasa na Niutaun, nau i go het.

Em i tok, Niutaun i gat 300 baket toilet long ol haus na Nabasa i gat 200 baket toilet long ol haus we em i gat laik long rausim olgeta na senisim wantaim septik toilet.

Mista Wama i tok em i givim kontrak i go long ol lokol kontrakta long stat wokim ol septik toilet long ol dispela 500 haus long Nabasa na Niutaun.

Mista Wama i askim ol lain husat i kisim septik toilet long lukautim gut dispela sevis na tu lukautim ol wokman husat i wok long dispela projek.

Em i tok wok bilong wokim ol septik toilet i stat pinis long Niutaun.

Em i tok, longpela taim i bin go pinis, we ol lain i stap long Madang taun i bin yusim ol baket toilet long rausim ol pipia bilong ol. Em i tok Madang Taun Interim Komisen i bin kisim sampela wok man long rausim ol dispela toilet baket.

Tasol Mista Wama i tok dispela em i no gutpela. Em i tok Madang Taun i mas bihainim ol developmen senis i wok long kamap long ol taun na sili long kantri na olsem pasin bilong yusim ol baket toilet o pit toilet em i mas stap olgeta.

Mista Wama i tenkim Join Distrik Baset Praioriti Komiti long luksave long dispela projek na givim tok orait long kirapim.

Givim sans long Kas, Wama i tok

MEMBA bilong Madang, Jacob Wama i askim ol memba bilong Madang Provinsel Asembli long givim sans long Madang Gavana, Jim Kas long stretim hevi i kamap long wangepela birua bilong ka eksiden we i lukim Alois Kopengua i dai.

Mista Wama i tok em i no gutpela long lukim ol lida bilong Madang i putim hevi long Gavana Kas long dispela taim, taim dispela hevi i wok long stap.

Em i tok sapos i gat lo i tok orait long senisim gavana orait dispela i ken kamap tasol em i moa gutpela ol memba bilong provinsel asembli yet i noken kirapim toktok long rausim Gavana Kas long opis.

Mista Wama i askim ol memba bilong Madang Provinsel Asembli long noken suvim nus i go insait long kamapim wangepela vot i nogat bilip

long rausim Mista Kas kwik.

Em i tok larim Gavana Kas yet i mas tokaut long wanem disisen bilong em long dispela taim bilong bikpela hevi we em i karim.

Long wankain taim Mista Wama i tok, em i amamas long lukim gutpela pasin ol memba bilong Madang Provinsel Asembli i bin mekim pinis long wok bung wantaim na i nogat pasin bilong bruk bruk na em i laikim dispela pasin i mas stap yet.

Mista Wama i tok nau long dispela taim em i laikim Gavana Kas i mas stretim hevi bilong dai bilong Mista Kupongua wantaim ol famili bilong em.

Ripot i kam long opis bilong Mista Wama i tokaut olsem bodi bilong Mista Kupongua i stap yet long Mosbi Jenerel Haus Sik.

Madang taun matmat i pas

MATROM JOHN i raitim

MADANG taun matmat i pulap na nau Madang taun kaunsel i pasim na, askim ol famili bilong ol man o meri i dai long Madang long kisim bodi bilong ol famili memba bilong ol i go long ples bilong ol na planim.

Taun Enjinia, Norman Kunewai i tok taun matmat i stap namel long taun na nau dispela spes i pulap pinis. Em i tok liklik spes i stap nau em ol i makim bilong planim bodi bilong ol plis manmeri na ami na ol lain i gat bikpela namba long provins.

Mista Kunewai i tok tu olsem kaunsel i givim tok orait tu long ol lain i gat gutpela toktok long wanem as ol i no inap kisim bodi bilong famili bilong ol i go long ples bilong ol na planim.

Em i tok ol gutpela toktok olsem, ol lain i dai i mas stap longpela taim tru long Madang taun, o sapos ol pipel long ples i no laikim bodi bilong dai man o meri i go long ples bilong ol.

Mista Kunewai i tok nau yet, kaunsel i wok long painim graun bilong kamapim wangepela nupela matmat.

Em i tok ol i kamapim pinis toktok

wantaim ol papa graun bilong Furan ong baim sampela hap graun klostu long Madang ples balus tasol toktok i no stret yet.

Mista Kunewai i tok hop sapos olgeta toktok i stret, ol bai yusim dispela blok graun long kamapim wangepela nupela taun matmat.

Em i tok Madang Provinsel na Lokol Level Gavman bai putim mani long wokim disela nupela taun matmat.

Mista Kunewai i tok tu olsem kaunsel i gat wok long stretim tu olpela Jemen matmat klostu long taun maket.

Em i tok long planti yia dispela olpela matmat i save lukim ol turis long Jemeni na Australia i kam long lukim.

Em i tok ol i bin wokim dispela matmat namel long 1890 na 1900. Las man ol i planim long dispela matmat em long 1920. Ol Jemeni i bin yusim dispela matmat long taim ol i bin bosim PNG. Bihain ol Australia i yusim bihain long namba tu wol woa.

"Mipela bai stretim ol matmat, stretim graun bilong matmat na banisim. Tasol mipela i mas gat mani long mekim dispea," Mista Kunewai i tok.

PAPUA NEW GUINEA'S SILVER JUBILEE

School Essay Competition



About the Competition

Category 1:	ALL STUDENTS IN GRADE 3 & 4.		
Essay Topic:	"Who was the Prime Minister 25 years ago?" Tell us more about him.		
Essay Length:	200 Words		
Prizes:	1st prize: K300.00	2nd prize: K100.00	3rd prize: K50.00
Category 2:	Level 1 ALL STUDENTS IN GRADE 5 & 6 Level 2 ALL STUDENTS IN GRADE 7 & 8		
Essay Topic:	"What is Independence and what it means to me?"		
Length of Essay:	500 words minimum		
Prizes:	1st prize: K500.00	2nd prize: K250.00	3rd prize: K125.00
	awards to each level		
Category 3:	Level 1 ALL STUDENTS IN GRADE 9 & 10 Level 2 ALL STUDENTS IN GRADE 11 & 12		
Essay Topic:	"How would you see PNG's Growth in the next ten (10) years?"		
Essay Length:	1000 words minimum		
Prizes:	1st prize: K1000.00	2nd prize: K500.00	3rd prize: K250.00
	awards to each level		

Send entries with full contact details including the name of your school and current grade to:
National Events Secretariat
Morauta Haus, P.O. Box 639, WAIGANI, NCD.

Entry into the competition will be deemed as acceptance of the terms and conditions. The Judges' decision will be final.

All entries to be received by 25th August, 2000 no later than 4:00pm on the date.

Winners will be notified by the National Events Secretariat.

Lae Nius

Inagen skul i kisim nupela senis i kam

EDUKESAN rifom insait long Papua Niugini i wok long kamap isi isi long olgeta hap bilong kantri.

Long Julai 22, 2000, Indagen Komyuniti Skul long Kabwum distrik, Morobe provins i bin opim na tokaut long skul i ken kamap top ap praimer skul. Indagen Komyuniti Skul i kamap namba 4 top ap skul insait long Kabwum distrik.

Memba bilong Kabwum Ginson Saonu i tokaut long top ap na opim nupela dabol klasrum na tupela haus tisa na skul laibreri long dispela taim.


Em i tokim oi pipel long wok bung namel long ol pipel, bod, tisa na ol lida bilong ples, kaunsil na nesanel lida long strongim dispela top ap skul bai em i kamap gutpela na sevim ol pikinini long wok bilong kisim save long rit na rait.

Planti taim oi lida yumi makim ol long sevim yumi na taim ol i laik wok yumi pipel yet i pilai planti wok politiks na jeles na stopim ol wok divelopmen na sevis olsem, Mista Saonu i tok.

Mista Saonu i tokim ol pipel bilong Indagen long lainim o luksave long tripela top ap skul we i kamap pinis insait long Kabwum distrik na statim na wokim gut top ap skul long Indagen.

Memba bilong Kabwum i givim K3,000 long skul long baim ol samting bilong skul na kamapim wanpela klasrum o haus tisa.

Ol lida bilong Indagen eria i tok bikpela amamas long memba i kamap long opim ol nupela skul bilding na tokaut long top ap bilong skul.



Mista Saonu i toktok long ol pipel bilong Indagen taim em i opim top-ap skul laibreri na haus tisa las wiken.

Poahom fama statim rais bisnis

MOROBÉ Gavana Luther Wenge long Tunde i givim K10,500 i go long Poahom ples famas long helpim rais projek bilong ol.

Dispela mani em bai i go long rentim wanpela wea haus long Lae long ol famas i ken mekim dispela wok bilong rais bisnis.

Dispela weahaus em kos bilong em i stap olsem K1,750 long wanwan mun na mani Gavana Wenge givim bai lukim samting olsem 6-pela mun olgeta bai dispela mani ol i ken yusim long rentim dispela haus.

Siaman bilong Poahom rais asosiesen Charles Singema husat i bin kisim dispela sek mani i tok dispela haus bai helpim tru ol fama long dispela rais projek bilong ol kamapim mani.

Em i tok dispela tu bai helpim ol long sanapim hap Edministresen sistim we i ken helpim grup bilong long mekim bisnis.

Ol lain long Poahom ples i bin statim rais projek long las Desemba long laik bilong ol yet wantaim nogat sapot i kam long Gavman. Wanpela helpim tasol ol i kisim em long Ripablik ov Seina na Divisen bilong Praimer Industri.

Namba wan haves bilong ol em

long Mas long dispela via long 6 hekta rais fil we ol i kisim 24 ton rais.

Ol i pekim rais long 1 kilogram beg we lebol bilong em i rid olsem. "Our Rice" (Rais bilong Yumi) na salim long K1.30 log wanwan beg. Samting olsem moa long K11,000 ol i bin mekim long dispela sels bilong ol.

Long tok amamas Mista Singema i tok olsem ol i soim long Gavana olsem Papua Niugini i ken kamapim rais bilong ol yet long kantri bilong ol.

Gavana Wenge i tok em i amamas tru long helpim long wanem ol dispela lain long ples i no wetim gavman long helpim ol tasol i go yet long mekim dispela projek.

Em i tok amamas long ol i tok dispela i soim tru laik bilong ol long mekim samting we kaikai bilong em i kamap na givim helpim i go long ol em i stret olgeta.

"Mi salutim yupela long hatpela wok bilong yupela na bai mi helpim yupela long mekim dispela bisnis i groa," Wenge i tok.

Dispela sek em ol i mekim i go long Huon Real Estate long karamapim dispela rent long 6 mun we bihain long dispela bai ol viles lain yet bai go het long rentim ples long mani ol i mekim.

Smith askim K2 milien bilong Menyamya projek

FRANCO NEBAS i raitim

NAMBA tu Gavana bilong Morobe provins Cornelius Smith i singaut i go long Morobe Edministresen long tokaut long em long Nesanel Gavman gren bilong ol kaunsil i go long ol wanem projek.

Smith i tokaut olsem moa long K2 milien we Nesanel Gavman i bin givim long via 1997 baset bilong Morobe provins kaunsil projek em edministresen i givim i go long arapela ol projek.

Em i askim edministresen long wanem ol projek stret dispela mani ol i putim i go na bilong wanem bihain long baset i bin pas.

Ol projek we em i laik save em insait long distrik bilong em Menyamya mani i no bin go long dispela ol projek.

Ol projek we mani inap long

go long em, K50,000 baset long Wapi Lokol Levul Gavman Kaunsil pawa jeneret a K4,242 long Menyamya Rurel pawa program, K52,451 long Yakepe Tsewi rot na K4,356, long Menyamya Hai Skul na arapela ol projek.

Long wanpela leta em i raitim i go long Morobe Edministreta Ainea Sengero long mun Jun 30,2000, em i kamapim dispela hevi bilong em na i kisim tok olsem bai edministresen bai givim lukluk long dispela ol projek olsem namba wan long 2000 baset.

Tasol i kam inap nau mani i no i go yet long ol dispela projek mekim Smith long kisim dispela hevi go long Ombudsmen Komisin long lukluk long we dispela ol mani i bin i go.

Long wankain taim yet wanpela edministresen opisa i tokaut olsem dispela muv bilong namba tu Gavana em politikal.

Dispela opisa (i no laik long givim nem) i tok askim bilong Mista Smith long we dispela ol fans i go em yet i mas save long wanem em i bin memba bilong Join Distrik Praioriti (JPDC) na Baset Praioriti Komiti (BPC) husat yet i bin tok long wanem ol projek dispela ol fan bai i go.

Dispela opisa i tok K2 milien Nesanel Gavman Grens long 97 baset bin kam leit bihain long baset bilong ol i pas we ol i putim i go long 98 baset.

Tasol dispela i kam bihain long ol JPDC na BPC i makim ol projek we ol ting em i nambawan we i ken sevim ol pipel we dispela ol mani i go tru.

Mista Smith em yet i bin wanpela memba long dispela komiti na long wanem em i kirap gen na askim dispela baset we em i bin pasim, dispela opisa i tok.

Wantok long dispela taim i no inap long kisim toktok bilong Edministreta Sengero.

Mare ples kisim gutpela wara saplai

MARE ples ausait long Lae nau i no inap gat hevi moa long wokabout long longpela hap long painim wara.

Bikpela tok tenkyu i go long Luteran Developmen Sevis Ekstensin Program, yangpela didiman long kamapim dispela wara projek.

Yangpela didiman i bin go pas long kamapim dispela projek we het bisop bilong Evangelikal Luteran Sios long Papua Niugini Dokta Wesley Kigasung yet i bin opim long las wiken.

Dokta Kigasung i tokim ol pipel taim em i opim dispela wara saplai long lukautim gut dispela sevis long wanem wara em i bikpela samting long laip bilong

man.

"Wara em i bikpela samting long yumi olgeta manmeri bilong dispela graun na wantaim dispela kain sevis yumi mas traim long lukautim gut em i tokim ol.

Distrik Edministreta bilong Huon Distrik Gut Gorgom husat tu bin stap long disela seremoni i tokim ol pipel olsem dispela kain komyuniti helpim em nambawan tru long komyuniti developmen olsem na dispela kain projek yupela ol ipel mas lukautim gut. Plen bilong dispela projek i bin kamap long 1994 tasol long hevi bilong mani dispela projek i no bin kamap inap long leit Epril we projek i bin ops na pinis long pinis bilong mun Me.

Samting olsem 36 wara tep ol i putim we i ken nau helpim moa long 2,1000 pipel we i save wokabout moa long 5 kilomita long painim gutpela klin wara long kuk na kaikai na dring.

Moa long K10,000 ol i bin spendim long dispela projek tasol long hevi bilong mani ol i spendim olsem K41,200, we yangpela didiman yet i spendim 50 pesen long dispela total. Arapela helpim i kam long ol arapela lain olsem memba bilong Huon Tukapel Masani.

Dispela projek em ol lain long divisen bilong Luteran Developmen Sevis yet i bin disainim na kamapim.

PHONE: (675) 472-3912

FAX: (675) 472-3919

IMPACT SIGNAGE PNG

- COREFLUTE SIGNS
- METAL SIGNS
- DUMPER STICKERS
- T-SHIRTS
- STUBBY COOLERS
- BILLBOARDS
- BUNTINGS
- POINT OF SALE

SIGNAGE

FOR ALL YOUR PRINTING NEEDS

P.O. Box 3705, Lae, M.P. 411, Papua New Guinea - Email: impact@global.net.pg

PNG em i no ples bilong ol pamuk, Pater Ambane i tok

WENCESLAUS MAGUN i raitim

"LONG kamapim lo bilong pasin pamuk long wanpela kantri olsem Papua Niugini, em i no stret. Dispela bai strongim pasin pamuk o (To legalise prostitution for a country like PNG is not called for. It will encourage prostitution)," Gavana bilong Simbu, Pater Loui

Ambane i tok.

Pater Ambane i tokim ol nius manmeri long Palamen long dispela long las wik bihainim toktok bilong Gavana bilong Morobe, Luther Wenge, long kamapim lo bilong pasin pamuk long kantri.

Pater Ambane i tok, yumi mas tokim ol pipel long tok tru bilong sik HIV/AIDS. Em i tok long kamapim wanpela lo bilong pasin pamuk,

em wanpela les pasin bilong stretim dispela hevi.

Em i tok long ai bilong God, pasin pamuk em i no gutpela pasin. Em i tok i gat planti stori long buk baibel i tokaut long dispela.

Pater Ambane i tok PNG em i wanpela kristen kantri, na olsem yumi mas lukim long ol arapela gutpela rot bilong abrusim sik

HIV/AIDS we ol sios, non gavman ogenaisesen na ol arapela grup i skulim. yumi long abrusim sik HIV/AIDS.


Em i tok taim yumi skulim gut ol pipel long tok tru bilong sik HIV/AIDS, ol i ken gat strongpela na gutpela tingting long tok 'nogat' long pasin pamuk we i opim dua bilong sik HIV/AIDS.

Pater Ambane i tok tu olsem tok-

tok bilong yusim kondom em tu i no gutpela. Em i tok watpo i gat planti kondom long wol tasol sik HIV/AIDS i wok long kamap bikpela.

Em i tok long abrusim sik HIV/AIDS, man na meri i mas yusim dispela presen God i givim ol bilong kamapim pikinini insait long marit laip na maski long mekim pasin pamuk.

Yunaited Sios glasim ol hevi ol meri i save bungim



• Ol mama bilong Not Mosbi Seket bilong Yunaited Sios i kisim skul long Sioni Kami Memoriel Sios tu wik i go pinis. Foto: HELEN REI.

HELEN REI i raitim

SAMTING olsem 200 meri bilong Not Mosbi Seket Meri Felosip i bing bung na kisim wanpela wan wik skul long Sioni Kami Memoriel Sios long Boroko tu wik i go pinis.

Dispela em i namba wan taim ol i ronim kain skul olsem bihainim wanpela intanesenel konferens long Samoa.

Het tok bilong dispela skul

em, "Holi Spirit Samapim Mipela Wantaim," na ol i kisim dispela het tok long konferens long Samoa.

Astingting bilong dispela skul em long helpim ol meri long luksave long ol hevi ol meri i wok long bungim long dispela taim, we i bagarapim rait bilong ol na ol pikinini, ol toktok bilong ol meri na ol pasin bilong kros pait, sik AIDS na ol meri, ol meri wantaim ol envairomen, trangu pasin na kamap lapun.

Meri bilong Reveren Alu Daniel bilong Gerehu Yunaited Sios, Fonga Daniel i tok, ol meri i tok sori long pasin nogut ol i save mekim long ol pikinini.

Ol i tok tu olsem ol i no mekim planti samting tumas long lukautim rait bilong ol pikinini.

Misis Daniel i tok dispela skul i opim ai bilong planti ol meri long luksave long ol samting ol i no bin save gut long en na ol i tok dispela skul bai helpim ol

long senisim ol pasin ol i save mekim long ol pikinini.

Pasto Suckling i tok hevi bilong mani na ol sosel hevi wol i bungim tude, em ol arapela hevi wan wan manmeri i save bungim tude.

Em i tok tu olsem God wanpela tasol i save long man moa long man o meri yet i save long ol yet. Na taim man o meri i no bihainim laik bilong God, ol inap mekim ol disisen bihainim laik bilong bodi bilong ol.

Pasin bilong givim samting nating, i bagarapim divelopmen, Sir Mekere i tok

PRAIM Minista, Sir Mekere Morauta, i tokim ol memba bilong Yunaited Sios long Is Mosbi Seket olsem, pasin bilong givim samting nating long ol pipel o (handout mentality) i bagarapim divelopmen long Papua Niugini.

Sir Mekere i tok i gat wanpela tok i tok: 'Helpim yu yet, na Heven bai helpim yu.'

Em i tok, edukesen em i no wanpela samting ol i save lainim long skul o koles tasol. Nogat. Em i wanpela samting ol pipel i save lainim olgeta taim long laip bilong ol long luksave long olgeta samting long laip bilong ol yet na long wol ol i stap long en.

Sir Mekere i tenkim Yunaited Sios long skulim ol pipel long ol gutpela pasin wantaim skul bilong God na tu ol teknikel skul wantaim. Em i tok dispela tupela skul i mas go wantaim long dispela taim, taim kantri bilong yumi i wok long bungim ol kain kain hevi long dispela taim.

Em i tok tu olsem laip bilong ol famili long PNG i wok long bungim planti kain kain hevi bikos long hevi bilong mani kantri i wok long bungim long dispela taim.

Sir Mekere i tok tu olsem planti hevi i wok long kamap long kantri bikos kantri i wok long bungim ol kain kain senis we i wok long kamap long dispela taim.

Em i tok mani em i as bilong planti ol hevi long wanem tude, ol pipel bilong PNG i wok long yusim mani long baim wanem samting ol i gat laik long kisim.

Em i taim ol i wok, ol i mas kisim pe, taim ol i laik go long skul, ol i mas baim skul fi, taim ol i laikim ka, ol i mas baim long mani, na olgeta ol arapela samting bilong laipstail i wok long senis bikos long senis long ples laip i go long taun laip.

Tasol Sir Mekere i tok i luk olsem ol lain i stap long taun i mas lukluk i go bek long laip bilong ples na kisim skul long ol pipel i stap long ples.

Em i tok skul bilong ol pipel long ples em i skul bilong helpim arapela arapela. Em i tok, taim man i go painim abus long bus o long solwara, taim man i kisim kaikai long gaden, ol i save skelim liklik liklik i go long olgeta lain insait long komyuniti.

Sir Mekere i tok ol pipel long taun i mas lainim dispela skul na holim pas.

Em i tok olsem wanpela sosaiti, PNG i lusim we bilong em. Ol na i luk olsem, PNG i mas gat wanpela nupela visen long go het gen.

Sir Mekere i tok tu olsem taim ol pipel bilong PNG i tingting long pulimapim haus na laip bilong ol long samting bilong dispela graun, long wankain taim, ol i mas pulimapim laip bilong ol long grasias bilong God.

Caritas PNG sapatim praim minista long kamapim gan lo

CARITAS PNG wanpela marimari grup bilong Katolik Sios long Papua Niugini i sapatim Praim Minista Sir Mekere Morauta long kamapim gan lo long kantri.

Ol i tok dispela lo bai stapim pasin bilong yusim gan long PNG.

Ol i tok, ol i sapatim tru dispela toktok bilong praim minista na ol i askim palamen na komyuniti long sapatim.

Insait long wanpela ripot i kam long Nesenel Dairekta bilong Caritas PNG, Bruda Graeme Frawley i tok planti ol lain insait long komyuniti stat long ol loman i go long ol politisen, na i kam long ol grasrut pipel, i gat bikpela wari long pasin bilong kisim gan long PNG taim ol manmeri i nogat laisens.

"Kantri bilong yumi i no inap i gat gutpela

sindaun sapos ol gan na pasin nogut i go wantaim long dispela kantri," Bruda Frawley i tok.

Em i tok long kamapim bel isi na gutpela sindaun, pastaim yumi mas rausim as bilong kros na pait na ol gan i wok long bihainim dispela ol pasin nogut, we kantri bilong yumi i wok long bungim.

Ol nius wantaim WENCESLAUS MAGUN

Akoitai laikim gavman stretim ol maining agrimen

MEMBA bilong Sentrel Bogenvil Sam Akoitai i askim Gavman long glasim gen ol maining agrimen ol i mekim wantaim ol papagraun bilong ol ples we i gat ol maining i stap.

Mista Akoitai i tok sapos Gavman i no luksave long dispela hevi

na i no mekim wanpela samting nau long stretim ol maining agrimen wantaim ol papamama bilong ples we i gat ol maining, bai i gat ol bikipela hevi i kamap olsem long Panguna kopa main long Bogenvil.

Em i tok hevi long

Bogenvil i bin stat pastaim long toktok bilong maining; Em i tok long stat bilong dispela hevi, Francis Ona i bin kirapim pait long hevi bilong Panguna maining. Dispela hevi i surik i go bikipela na nau toktok bilong independens i kamap.

Mista Akoitai i tok dispela pait i lukim 15,000 pipel i lusim laip bilong ol pinis.

Tasol Mista Akoitai i tok i nogat bikipela wok i kamap long Bogenvil. Em i tok aninit long Sir Michael Somare, ol lida bilong Bogenvil i kam bung wantaim.

Sir Michael bai tokaut long hevi bilong Tolukuma main


MINISTA bilong Maining na Bogenvil Afeas, Sir Michael Somare i tok Palamen olsem em bai painimaut sapos kampani i wok long Tolukuma main long Sentrel provins i gat laisens long mekim wok bilong ol i go het yet o nogat.

Sir Michael i tokaut long dispela taim em i bekim sampela askim bilong memba bilong Gollala Ajax Bia taim em i askim dispela kwesten long Palamen las wik.

Mista Bia i sutim tok olsem

kampani i no sainim kontrak gen wantaim papagraun bihain long kontrak bilong ol i pinis long 1998. Tasol ol i wok long mekim wok yet.

Mista Bia i sutim tok tu olsem marasin bilong kukim gol we i bin pundaun long bus bilong Gollala i wok long bagarapim wara, na kilim ol pis na i no gutpela long ol pipel long dring bihainim ripot i kam long Green Peace International we wanpela niuspepa i bin raitim long las wik.



• Sir Michael Somare.


Zeming i tok Ministri bilong em i nogat mani

DEPUTI Praim Minista na Minista bilong Agrikalsa na Laivstok Mao Zeming i tok Ministri bilong em i nogat inap mani long karimaut ol wok didiman long dispela yia.

Em i tok dispela i fosim dipatmen bilong em long rausim ol wokmanmeri bilong en long 400 i go daun long 270 long dispela yia.

Long wankain taim em i tok amamas long Gavman bilong Saina long putim mani i kam long PNG long helpim ol wok didiman insait long kantri.

Mista Zeming i tok Gavman bilong Sir Mekere i luksave olsem agrikalsa em i wanpela bikipela sevis eria na Gavman bai skelim moa mani i go insait long dispela dipatmen long 2001 baset taim ol i glasim ol polisi bilong agrikalsa long baset bilong nupela yia.



• Mao Zeming.

Sir Mekere bai glasim hevi bilong Simbu Holdings

PRAIM Minista Sir Mekere Morauta i tokim Palamen olsem em bai sekim wok bilong Simbu Holdings na toksave long Palamen gut long hevi bilong dispela kampani.

Sir Mekere i tokaut long dispela taim em i bekim sampela askim i

kam long memba bilong Suave Yauwe Riyong long ol hevi i karamapim Simbu Holdings we klostu 6-pela Lokol Level Gavman kaunsil bilong Simbu i gat sea long dispela kampani.

Sir Mekere i toktok liklik olsem Angco em

Investment Corporation i bin kirapim tasol nau wanpela Papua Niugini man i kamap papa bilong dispela kampani.

Tasol em i tok em bai mekim gut wok painimaut na givim bek gutpela ansa long Mista Riyong sampela taim bihain.

Skate i pinis long haus sik

OPOSISEN lida Bill Skate i kamaut pinis long haus sik bihain long em i bin bungim hevi long bodi bilong em tupela wik i go pinis.

Long ripot dispela wik Mista Skate i tok dispela sik bilong em i bikipela na inap kamapim bikipela hevi long laip bilong em. Tasol em i amamas tru long gutpela wok ol dokta na nes i mekim long sevim laip bilong em.

Long wiken Mista Skate i tok em i laik kisim sampela malolo wantaim famili bilong em inap bodi bilong em i strong long go bek wok.

Tasol Mista Skate i tok taim em i stap long haus sik, em i lukim tru bikipela wok na hatwok bilong ol

dokta na nes na hevi bilong haus sik we kaikai i sot na planti sikmanmeri i save slip hangre.

Mista Skate i tok dispela em i wanpela sori na hevi samting long gavman i mas lukluk long en na wok klostu insait long hevi bilong haus sik long stretim dispela hevi.

Tasol em i tok ol dokta na nes bilong Papua Niugini i save wok gut na strong tru wankain olsem olsem ol arapela dokta na nes long arapela bikipela kantri long ovasis.

Sik Mista Skate i kisim em ol i kolim Hat Atek o hevi long lewa o kilok bilong bodi.

Gavman bai sekim gut wok bilong Agrikalsa Beng

PRAIM Minista Sir Mekere Morauta i tokim Palamen las wik olsem olpela Gavman i bin bungim Agrikalsa Beng wantaim Papua Niugini Benking Kopresen (PNGBC) bikos Gavman i luksave olsem i bin gat planti paul pasin i kamap we ol opisa bilong Beng i save givim dinau mani long ol lain bilong ol yet.

Sir Mekere i tok dispela hevi i bin bagara-


pim tru astingting bilong Agrikalsa Beng bilong givim dinau mani long ol pipel bilong ples long kirapim ol liklik agrikalsa bisnis bilong ol.

Em i tok wantaim tingting bilong praive-taisesen o Gavman i tingting long salim ol Gavman bisnis, Gavman bai glasim gut olgeta samting insait long ron bilong Agrikalsa Beng pastaim long Gavman i

salim.

Em i tok Gavman i tingting long givim Agrikalsa Beng long han bilong wanpela institusen, givim ol risos na larim ol i wok bilong ol yet we ol politisen i noken gat pawa o kontrol long ol.

Sir Mekere i tokaut long dispela taim em i bekim sampela askim bilong memba bilong Okapa, Castan Maibawa long Agrikalsa Beng.



Ol memba bilong Volentia Sevis Ogenaisesen (VSO) i wok hat long penim wanpela klasrum long Amoron Viles Laip Skul long Madang provins.

WANTOK

NIUSPEPA BILONG YUMI OL PAPUA NIUGINI STRET

Ol tisa, nes na plis i gat bikpela wok tru

GAVMAN nau i gat planti singaut bilong apim pe na stretim ol hevi bilong ol tisa, plis fos na ol nes insait long Papua Niugini.

Singaut bilong ol plisman wantaim ol nes i no nupela. Ol i bin mekim dispela singaut sampela krismas i go pinis insait long yunion o asosiesen bilong ol tasol ol gavman bipo i kam i no bin mekim wok o stretim ol dispela singaut hariap.


Inap nau gavman i ken pilim tru olsem planti hevi i kamap bikos i bungim tu ol nupela singaut na hevi bilong ol tisa i kam antap wantaim.

Dispela em wanpela bikpela salens tru bilong gavman na dispela i givim bikpela piksa tru long gavman olsem taim kain hevi o singaut olsem i kamap long wanpela grup o ol woklain bilong gavman, wok bilong harim na stretim i mas kamap hariap. Bikos yu no save, nogut narapela singaut na hevi olsem bai kamap gen long neks yia. O nogat neks yia bai taim nogut bilong hevi long mani o ol arapela bikpela hevi we i save kamap long kantri.

Gavman i sanap long wok bilong lukautim kantri na ol pipel. Olsem na em i mas yusim gutpela tingting na rot bilong stretim ol hevi bilong pipel. Na i no ken harim na isi isi long en na toktok long maus tasol na wok tru i nogat.

Nau ol tisa i givim bikpela salens tru long gavman long apim pe bilong ol. Sapos ol tisa i straik, tru tru bai ol pikinini i kism taim nogut long skul bilong ol. Na ol papamama i no laik lukim dispela bikos ol papamama i save lusim mani olgeta yia long baim skul fi bilong pikinini i go skul. Olsem na ol i no laik lukim ol tisa i straik na pikinini bilong ol i no go skul. Gavman i mas stretim dispela hevi long stretpela na gutpela rot bilong gutpela disisen na amamas i ken kamap nau na bihain tu. Sapos ol tisa i straik, bai i no gat skul. Sapos ol nes i straik, ol sikmanmeri i no inap kisim marasin. Sapos ol plisman i straik, bikhet pasin bai kamap ples klia nabaut nabaut. Olgeta lain ya i gat bikpela wok tru long kantri.

• **Orchid Lodge** long Enga provins em wanpela ples malolo yu ken kaikai gut na kisim gutpela malolo.



Ramu main bai stat long 18 mun taim, Sir Michael i tok

WENCESLAUS MAGUN i raitim

WOK bilong kirapim US\$ 840 milien o klostu K3 bilien Ramu Nikel na Kobalt main long Madang provins bai stat long 18 mun taim sapos olgeta wok i ron gut, Minista bilong Bogenvil Afeas na Mining, Sir Michael Somare i tokaut aste long Gavman Haus.

Sir Michael husat i bin amamas tru long witnessim tok orait pepa bilong Mining Developmen Kontrak na Spesel Mining Lis, we Gavana Jenerel, Sir Silas Atopare i sainim wantaim Menesing Dairekta bilong Highlands Pacific Limited, Ian Holzberger, na Ekting Menesing Dairekta bilong Oregon Minerels, Francis Kaupa long Gavman Haus i tok, em i givim olgeta sapot bilong em long lukim dispela projek i mas kirap kwik.

Sir Michael i tok, Ramu main em wanpela main tasol long PNG, husat inap bringim samting olsem K200 milien long wan wan mun insait long 20 o 40 yia laip taim bilong dispela projek i kam long kantri na kamapim moa long 1000 wok.

Em i tok taim Ok Tedi i gat samting olsem 10-pela yia tasol i stap bipo long wok bilong dispela main i pas na tu Misima na Lihir,

i gat samting olsem 5-pela yia moa bipo long dispela ol projek i pinis, gavman i amamas tru long lukim Ramu Nikel na Kobalt main i kirap.

Sir Michael i amamas tu long Ramu projek long wanem em i tok, dispela em i namba wan mining kampani long wokim fektori bilong nikel na kobalt long kantri.

Mista Holzberger i tok, nau ol bai wetim praim minista long makim wanem taim em i redi long sainim Memorandum Ov Agrimen wantaim ol papagraun, Madang provinsel gavman, na HPL. Dispela bai kamap long Madang taim praim minista i makim taim.

Mista Holzberger i tok tu olsem, HPL nau i gat wok bilong painim namba tri patna long wok bung wantaim ol long dispela projek na painim mani long kirapim dispela projek.

Em i tok tu olsem olgeta toktok namel long kampani wantaim ol papagraun, Luteran Sios long Basamuk, na Dick Hagon long Kurumbukari graun em i stret.

Mista Holzberger i tok HPL i bin baim pinis eksploraesens laisens bilong Kurumbukari graun long Dick Hagon na HPL bai lukluk long stretim olgeta arapela wari bilong ol papagraun bipo long wok bilong main i kirap.

Nakmai laik stretim sindaun bilong ol liklik manmeri

BIKPELA tingting bilong Clement Nakmai, nupela Gavana bilong Wes Nu Briten em long helpim ol manmeri bilong ples long kamapim gutpela sindaun.

Gavana Nakmai i bin tokaut olsem gavman bilong em bai wok hat long lukim olsem dispela tingting i karim kaikai.

Em i bin tokim palamen olsem as tingting bilong developmen long provins bilong em long lukim olsem wanwan manmeri long ples i mas i gat ol sevis mani inap long baim long dispela taim we mani i bikpela samting na olgeta samting em i mani.

Em i tok Wes Nu Briten inap long lukim sampela bikpela senis i kamap long 1980 i kam inap long 1990 bikos provins i bin salim planti timba. Inap long i gat sevis olsem rot, bris, hausik na arapela ol samting tasol i nogat dispela i stap insait long provins tude. Nogat wanpela rot em provinsel gavman i kamapim bilong givim wok bisnis i go bek long ol pipel bilong ples na nau timba bilong provins i hariap tru long pinis tasol i nogat wanpela senis tru i bin kamap insait long provins long sait bilong developmen.

Gavana Nakmai i tok Gavman bilong em bai traim long helpim ol liklik manmeri long ples i lukim sampela senis i kamap long sait bilong wok bisnis, stretim rot bilong ol pipel i ken lukautim bisnis bilong ol yet, wok bilong agrikalsa i ken kamap bikpela long sait bilong lukautim enimel na kisim pis long solwara na lukluk long arapela ol projek we i ken kamap long viles level.

Em i tok Gavman bai traim long givim wankain sevis i go long manmeri insait long ol viles na lain long taun wantaim na kamapim gen wanpela dinou mani plen we i bin kamap bipo wantaim Agrikalsa ben na givim helpim i go long manmeri o grup husat i kisim tok orait long join provinsel baset plening na prairiti komiti.

Em i tok ol bai kamapim wanpela risos senta bilong givim trening na skul long ol manmeri long ples bai ol yet i ken kisim save na stretim sindaun bilong ol long ples.

Gavana Nakmai i tok em bai traim givim mani bilong ol i ken kamapim wanpela stadi bilong painim aut wanem kain samting ol autsait bisnis o grup i ken kamapim bilong helpim ol lain manmeri long ples i ken helpim ol yet na kamapim gutpela sindaun.

Em i tok Gavman bilong em bai traim kamapim rot bilong ol manmeri i noken baim tumas long autsait tasol kamapim ol rot bilong kamapim olgeta samting insait long provins na i no inap tromoi mani autsait long kisim ol samting. Mani bilong provins tu bai kamap bikpela tu long dispela rot na takis bilong sampela sevis inap kamapim bikpela mani bilong provins.

Em i tok kantri i gat planti samting tasol ol Gavman i save traim lukluk long bikpela maket bilong ovasis na i no save tingting long kamapim ol liklik rot bilong ol manmeri long ples i ken kamapim mani na helpim ol yet.

Em i tok gavman bilong em bai kamapim wanpela strongpela polisi long lukim olsem ol manmeri i kisim trening long helpim narapela manmeri long ples i kamapim wanem kain tingting ol i gat.

Em i tok planti trening bai kamap long distrik na komyuniti level long givim skul long ol manmeri na dispela i ken helpim ol yangpela manmeri long stap long ples na lukautim wanem samting ol i gat na i no pulim lain i go long ol taun na siti.

Mista Nakmai i tokim palamen tu olsem bai kisim helpim long ol bisnis senta, vokesnol skul na traim kamapim ol dispela polisi bilong em na long go wantaim olgeta dispela samting bai i gat plen bilong lukautim mani, stretim we bilong kisim dispela mani planti arapela rot bilong lukim olsem dispela ol tingting i karim kaikai.

Em i tok gavman bai kamapim rot bilong lukim olsem pipel long ples i gat rot long kisim helpim long Gavman long sampela projek we Provinsel Gavman i tingting long kamapim.

Esia maket gat bikpela laik long ol samting ol i wokim long diwai kokonas

PEKU PILIMBO i raitim

DIWAI kokonas i gat planti yus bilong em, stat long diwai yet bilong em, ol lip na kokonas pikinini.

Olsem na long dispela taim, kantri i wok long i wok long toktok wantaim Senta bilong Developmen ov Industri (CDI) long kirapim wanpela fenitja fektori we bai yusim ol as bilong kokonas long mekim ol samting.

Ekting Prinsipel bilong Timba na Forestri Trening Kolis long Lae Vagi Levo i tok em i putim pinis wanpela ripot i go long CDI long traim kirapim dispela join bisnis vnetja.

Yuropien Yunien i fandim CDI. Na CDI i wanpela ogemaisesen we i save helpim ol kantri long ol tet wol kantri long Afrika, Karibien na Pasifik (ACP) wantaim ol mani long kirapim ol liklik wok bisnis long helpim ol i go hetim gut laip bilong ol.

Mista Levo i tok planti ol kokonas plantesen insait long kantri i lapun pinis na ol i ken yusim ol dispela kokonas long mekim ol fenitja.

Em bin tok planti lain i laikim ol samting we ol i wokim long kokonas na i gutpela long yusim ol lapun kokonas diwai long mekim samting taim ol i planim ol nupela diwai kokonas long kisim ples bilong ol.

Mista Levo i tok em i putim pinis ripot i go long CDI na em bai wetim etvais na helpim long teknikal sait na tu painim fanding helpim long go hetim projek ya.

Em bin tok ol karimaut ol wok stadi long ol provins insait long kantri we i gat planti kokonas long ol olsem long Madang, Sentrel, Is na Wes Nu Briten. Mista Levo i tok ol i karimaut pinis ol tes taim ol i katim ol olpela kokonas long Madang na ol i lukim olsem i gat nit long kirapim projek ya.

Em i tok ol fenitja na ol arapela samting we ol i wokim long diwai kokonas i gutpela na ol kantri long Esia i laikim tu ol dispela samting

Indonesia i stap yet long hevi

Indonesia

Hevi long Indonesia i wok long go het yet long planti hap. Na ol ripot i tok lidasip bilong Presiden Abdurrahman Wahid i slek na em no givim gutpela stia long lukautim kantri.

Antap long hevi long Is Timor na Wes Irian, Ambon Ailan insait long Maluku we ol i kolim tu long Spais Ailan em wanpela long ol ples we trabel i wok long bagarapim ples na ol pipel.

Ol ripot i tok hevi long lo na oda i go bikipela na ol militeri we i save sanap sambai long helpim daunim ol hevi ya i go narakain long Ambon, biktaun bilong Maluku. Hevi long Ambon i stap namel long ol Muslim na Kristen lotu lain we nau ol i birua long wanpela arapela. I kam inap nau, planti tausen pipel i dai pinis na ol samting i bagarap taim moa pipel yet i kisim hevi na bagarap.

Ami i gat samting olsem 13,000 lain bilong em i stap long Maluku Ailans. Ol ripot i tok planti bilong ol i sapotim ol Muslim paitman we ol ripot i tok i gat namel long 6,000 na 10,000 long en. Planti bilong ol dispela paitman i bilong not Java we i go kamap long not Maluku na Maluku i no long taim i go pinis.

Long ol ripot, ol sinia ami lain i tokaut olsem ol nogat ansa long hevi long Maluku we i wok long go bagarap moa long dispela taim. Lida bilong ol Jihad Muslim Ja'far Umar Thalib i no haitim tasol em i tok ol lain bilong em bai biruaim yet ol Kristen viles. Ripot i tok ol militeri i save sapotim ol paitman insait long provins na dispela em i mak bilong

lo na oda hevi i go nogut na tu wok bilong militeri long Indonesia i slek. Na (militeri) i no wok long stap wantaim olsem wanpela yunaitet grup na i bru bruk.

Tasol Difens Minista bilong Indonesia Juwono Sudarsono i tok em sampela lain na seksen long militeri tasol na i no olgeta i wok long tek sait na sapotim ol pait grup.

Hevi long Indonesia i stap olsem:

- Hevi long lo na oda long Wes Timor we samting olsem 120,000 refuji bilong is Timor i stap long ol refuji kem yet.

- Hevi long Aceh we ol paitman i kukim tupela wel teng long las wik na

- Ol ripot we i tok Komanda bilong arpi Tyasno Sudarto i stap insait long wanpela wok nogut bilong wokim ol giaman mani na ol arapela moa.

Bihainim ol ripot bilong sampela saveman, ol politikel hevi we i wok long kamap nau long Indonesia em i asua bilong no gutpela lidasip bilong Presiden Wahid bikos em no givim kliapela stia long kantri.

Ripot i tok taim Mista Wahid i bin winim sia long kamap olsem lidaman bilong Indonesia, planti pipel long Indonesia i bin amamas bikos ol i t9ing planti gutpela senis i kamap. Tasol nau ol i lukim olsem Mista Wahid i no redi tumas long dispela bikipela wok long givim gutpela lidasip stia long kantri. Maski em i gat narapela sans long soim lidasip bilong em, taim i wok long sot tasol kanti i no inap long bru bruk na pondau.

Indonesia i pulap kapsait tu long timba!

Indonesia:

Iligel somil i lainim na pulapim Wara Baro klostu long Saut Kalimantan. Dispela em sentrel eria we bikipela timba bisnis i stap long en. Tasol korapsen o pasin bilong wokim ol dil i no gutpela long kisim mani inap long bagarapim dispela bisnis.

I kam inap long 1998, Gavman bilong Indonesia i bin lusim US\$5.2 bilien insait long faivpela krismas bikos long pasin bilong yusim nogut na i no lukautim gut mani. Na dispela pasin tu long katim ol bikbus na diwai bai bagarapim ol bus na diwai bilong Indonesia insait long 10-pela krismas.

Ripot i tok bihainim pondau bilong Suharto gavman, planti ol asples lain i wok long katim na salim ol diwai long laik bilong ol yet.

Gutpela neiba

Amerika:

Eitpela strongpela kantri long wol we ol i kolim ol long Grup Eit i bung long Okinawa, Japan long tok-tok long ol bikipela samting na hevi we i wok long kamap long wol long dispela taim. Na rot we ol dispela strongpela kantri i ken painim long dainim ol hevi na wari samting.

Presiden Clinton i bin go stret long G8 Bung long Okinawa bihain taol em bin stap insait long Midel Is pis bung long Jerusalem long traime stretim hevi namel long Israel na ol Arab kantri.

Okinawa em ples we bikipela pait i bin kamap long Wol Wo 2. Na inap long 1972, Okinawa i bin stap long lukaut bilong Amerika. Nau samting olsem 26,000 militeri

pesenel bilong Amerika i stap yet long Okinawa. Tasol Presiden Clinton i bin tok Amerika bai daunim mak long ol lain bilong em i stap long Okinawa.



• **Presiden Bill Clinton na pikinini meri bilong em Chelsea.** Piksa i kam long WEEKEND AUSTRALIAN niuspepa.

Musik rok sta o pait lida?

Fiji:

Raskol, paitman lida? Nogat mi kruseda, Speight i tok.

George Speight man husat i bin go pas long Fiji ku o hevi long kantri na kisim kalabus ol palamen lida long tupela mun i laik senisim piksa bilong em na kamap gut.

Sindaun malolo na stori wantaim sampela sapota bioong em long pulsait long Fiji, em bin tok olsem em no laikim nem olsem paitman, raskol o man nogut maski ol toktok i kamap olsem em i laik kamapim hevi long bagarapim Olimpik gems, bikipela pilai we ol kantri long wol bai i stap insait long en long Sidni Australia klostu taim.

Ol Gavman bilong Australia na Nu Silan i bin putim tambui long Mista Speight long go long dispela kantri ya tasol long Fiji yet, ol bin givi em amnesti we i min olsem otoriti long kantri bin lusim ol rong na hevi we em bin kamapim na em i no inap long kalabus.

Ol ripot i tok Mista Speight i tok samting em i wokim na em i sanap long en em i wokim long helpim raits bilong ol asples Fiji pipel long en.

Wantaim sanglas na sindaun isi long pulsait bilong Sentrel Hotel long Suva long kaikai brekfas, Speight i bin luk olsem wanpela musikman na i no wanpela pait lida. Sentrel Hotel em ples we ol foren niusman i stap long en na kamap bilong em long dispela hotel wantaim ol toktok em i mekim i kirap nogutim planti bilong ol husat i lukim olsem Speight i laik senisim piksa na lusim pait lida piksa i go long gutpela politisen.

Em i skruim tok olsem em bai askim ol arapela asples grup long Saut Pasifik na tu long ol Aborijini bilong Australia long sapotim em na wokim samting long bagarapim Olimpik Gems ya.

Ol ripot i tok as tru long nupela Presden bilong Fiji Ratu Josefa iloilo i skruim gen swering in seremoni bilong ol kabinet memba bilong interim gavman i no long em i sik tasol em bikos em i bihainim maus bilong Mista Speight.

Ol tokwin i go olsem inap bai namba tu ku i kamap olsem dispela long 1987 bikos Mista Speight bai kamap lida olsem Sitiveni Rabuka i bin wokim na em bin ronim kantri insait long 13-pela krismas.

NIU
PELA

Toothpaste bilong PNG Stret!




Strongpela, waitpela helti tit na gutpela smel
long liklik prais tasol - nau em bai givim yu
Colgate Strongpela Tru Smael.



OFFICE OF RURAL DEVELOPMENT

Yia 2000 districk developmen program grant



Project olsem




Gavman bilong Papua Niugini i kirapim wok bilong kamapim rot bilong gutpela sindaun long wanwan distrik na developim na helpim long kirapim ol project inap long kamapim gutpela sindaun.

Opis bilong Rural Developmen i singautim olgeta lida husat i laikim moni bilong kirapim rural project long salim aplikasin bilong ol ikam Joint Distrik Plenin na Budget Priority Committee.

Long yia 2000, olgeta project imas istap longpela taim na ol manmeri i kisim gutpela helpim.

Opis bilong Rural Developmen bai lukautim ol projects Gavman i helpim long kirapim bilong helpim lokol komyunfiti bilong yuml insait long olgeta wanwan Distrik bilong Papua Niugini.

Kampani o grup husat igat laik long aplai imas ringim lokol Distrik Administreta bilong ol o ringim Opis bilong Rural Developmen.



- ✓ Wof
- ✓ Bris
- ✓ Han rot
- ✓ CIS building
- ✓ Polis building
- ✓ Liklik ples balus
- ✓ Haus bilong tisa
- ✓ Aid pos na Klinik
- ✓ Rural wara supply
- ✓ Rural pawa supply
- ✓ Administresin building
- ✓ Haus bilong Helt wok manmeri
- ✓ Elementary na Primary classrooms

Long moa toksave ringim:

Office of Rural Development
P. O. Box 1100
WAIGANI N.C.D.

Telefon : 328 8380
Fax : 328 8361



Hailens redi long pilai long Arafura Gems

HAILENS BASKETBAL RIPOT

HAILENS Basketbal Konferens bai makim kantri long Arafura Gems long 2001 long Darwin, Australia.

Presiden bilong Hailens Basketbal Konferens Paul Limpia i autim dispela long anuel jenerel miting bilong ol long Mt Hagen. Na semtaim tu em i tok olsem sinia mens skwat bai makim Hagen long Kool All National All Star challenge long Pot Mosbi. Dispela basketbal sempionsip ya bai kamap long Oktoba 4-6.

Long dispela gem bilong All National All Star salens, Mista Limpia i tok wanpela tim bilong Australia na Nu Silan tu bai stap insait long dispela sempionsip.

Dispela skwat bilong 50-man na meri em ol bai daunim i go long 24, long Arafura Gems na tu All National Kool Stars sempionsip.

Skwat bilong HBC senia em ol i makim long rijonel basketbal salens we i bin kamap

long Kundiawa long mun Me.

Limpia i tok "Nupela straktsa long salim rijonel tim i go long Arafura em long larim ol pilaia i kisim intanesenel ekspersiens long pilai ovasis. I gat straktsa nau i kamap pinis we i givim sans long ol pilaia long rijonel level long go pilai long ovasis long kain tonamen olsem Arafura.

Em i save olsem PNG tu bai salim wanpela nesanel tim i go long Osenia Gems. Ol sampela meri hailens long dispela skwat ya em Margaret Koko, Josepha Andia, Grace Maipson, Regina Kamiac na Lyn Ako. Na ol man em Timothy Mako, Mike Hogling, Saki Jack, Dick Harry na Humphrey Jeffrey.

Insait long dispela miting, ol i makim tu ol nupela eksekyutiv bilong Hailens Basketbal Konferens. Dispela ol lain opisel bai holim wok inap 4-pela yia olgeta.

Ol opisel em Limpia (presiden), Iga Salilium (vais presiden), B Koko (sekretari), Agnes Morris (tresera), Alphonse Yer (Legal Edvaisa) na Philemon Tony (junia hetkosa).

Noken pilai politiks long sofbal

PNG SOFBAL RIPOT

PAPUA Niugini Sofbal Federesen (PNGSF) i mekim strongpela tok lukaut long ol memba asosiesen long noken pilai politiks wantaim sofbal.

Presiden bilong PNG Sofbal Federesen Nelson Paulias i mekim dispela tok tok taim ol i stapim namba 6 junia nesanel sofbal sempionsip long Lae. Sempionsip ya sapos long kamap long las wiken.

Sekretari bilong Lae Sofbal Asosiesen Paul Pasen i tok las wiken olsem dispela sempionsip ya bai

go het maski ol eksekyutiv bilong sofbal federesen i stap o nogat.

Pasin i tok Federesen i no mekim guppela tok save long dispela tonamen long kamap na dispela em as ol i no laik holim sempionsip.

Paulias i tok dispela kain pasin tasol i ken bagarapim tru guppela nem bilong sofbal. Nem bilong sofbal i save guppela stret na i save winim rekot bilong arapela ol spot insait long kantri.

"No gat wanpela asosiesen i ken kisim ol nominesen fi long ol asosiesen. Na dispela em ol i brukim lo. Ol asosiesen i noken kisim na tromoi mani

taim ol i no kisim guppela toksave," Paulias i tok.

"Mipela i tingting long givim strongpela mekim save long ol tim, na mipela bai wetim tasol taim bilong miting long Pot Mosbi, na mipela ol eksekyutiv i ken toktok long dispela ol samting..

Wankain miting i bin kamap bipo long nesanel sempionsip taitle long Rabaul long taim bilong Ista.

Lae Sofbal Asosiesen i wok long traim long bagarapim guppela nem bilong sofbal taim Rabaul i winim olgeta wok bilong Federesen las tu yia.

Simbu winim Noten Zon junia taitel



• Ol mangi Simbu i soim tropi ol i winim long Noten Jon Anda 17 sempionsip.

COCA COLA ANDA 17 LIG RIPOT

SIMBU i wilwilim Madang 10-0 long gren fainel bilong Coca Cola Noten Zon Anda 17 ragbi lig long Ron Albert oval long Madang las wiken.

Ol boi i kisim taitel bikos ol i laik winim tru dispela ragbi lig sempionsip resis.

Insait long 10 minit, ol boi Madang i gat guppela sans tru long putim namba wan trai tasol ol i no holim gut bal na lusim we ol Simbu i kisim.

Simbu i save long slek bilong Madang na i pasim toktok strong long traim winim gem ya.

Ol boi Hailens nau i kamapim strongpela pilai tru long kamapim guppela takol na tu strongpela ran.

Winga bilong Simbu Tine

Kawage i putim namba wan trai bilong dispela gem. Konvesen i no insait na skoa i sanap 4-0.

Bihain long dispela ol Madang i strong. Ol i kisim bal na ran i go 30 minit na skorim wanpela tri tasol referi i tok dispela em fowat pas.

Dispela nau i kirapim stret skin bilong ol Angras. Ol i stat long tromoi bal i go i kam na laik brukim difens bilong Madang.

Skoa i stap 4-0 inap hap-taim.

Insait long namba tu hap, ol Madang i mekim sampela toktok o komplet olsem Simbu i putim planti ol pilaia krismas bilong ol i abrusim 17. Tasol ol opisel bilong dispela miting i no mekim wanpela samting.

Insait long 20 minit bilong namba tu hap, Simbu i putim namba tru trai bilong ol. Dispela trai i kam yet long Kuna Gul na Ricky Steven i kikim konvesen na skoa nau i sanap 10-0.

Ol Madang i no wari. Ol i taitim bun i go na klostu ol i putim trai tasol ol Simbu i stapim em stret long trai lain.

Junia Developmen episa Joe Tokam i tok olsem dispela tonamen em long helpim ol yangpela save gut long pilai ragbi lig taim ol i yangpela yet. Na taim ol i go pilai long primia gret, ol bai save.

Em i mekim bikpela tok tenk yu i go long ol lain husat i helpim long holim dispela tonamen na bikpela toktok i go long Coca Cola.

Tupela spot bodi i mas wok bung: Kumbakor

PNG SPOTS KOMISIN RIPOT

MINISTA bilong Horn Afeas Andrew Kumbakor i singaut i go long PNG Spots Komisin na PNG Spots Federesen long wok bung-wantaim long kamapim strong wok bilong spot insait long kantri.

Kumbakor i lukautim wok ministra bilong Spots i mekim dispela toktok taim em i opim namba wan mit-

ing bilong PNG Spots Komisin Bot miting long las wik.

Em i askim tupela spot bodi, long traim kamapim guppela wok bung namel long tupela na lukautim wok bilong spot.

"PNG Spots Komisin i mas tingting long kirapim polisi na PNG Spots Federesen em long karim aut program," minista i tok.

Mista Kumbakor i autim

amamas bilong em long guppela wok tupela spoting bodi i mekim long dispela yia.

Em i tok olsem sapos dispela tupela bodi i mekim dispela wok, ating spots insait long kantri bai muv fowat tasol.

Dispela miting ya tu i mekim long Minista i tok welkam long ol nupela memba bilong Bot insait long kantri.

Ol eksekyutiv i kilim soka

ELVIS MATHEW i raitim

WANPELA askim i go nau long ol klub insait long Wewak Soka Asosiesen (WSA) long bung na holim miting na askim eksekyutiv bilong WSA long risain.

Astingting bilong dispela eksen em bikos nau yet planti samting insait long WSA i no ran gut. Na i luk olsem wanpela o tupela man tasol i wok long ranim WSA long laik, tingting na stail bilong em o tupela.

Askim ya i kam long Ambrose Gwarakai, wanpela biknem soka man na papa bilong wanpela klub insait long WSA.

Gwarakai i tokim Wantok olsem askim bilong em long ol klub long rausim eksekyutiv bilong SWA i bihainim ol samting we nau yet i wok long kamap na stap long WSA. Em i tok planti samting i no ran gut na stret na ol klub i mas tingting nau long kamapim guppela na stretpela disisen long guppela bilong soka insait long Wewak.

Gwarakai i tok i luk olsem WSA i nogat eksekyutiv. Olsem na wanpela man o tupela man we i no memba bilong eksekyutiv i wok long ranim ol gem na administresen wok bilong Wewak soka.

Em i tok em yet olsem papa bilong nupela klub, Minal Tikaolu insait long Wewak em i no save husat tru i presiden bilong WSA na tu husat tru i wok long go pas long ranim na lukautim ol gem long ol wiken.

Em i tok WSA i gat bikpela hevi nau long dispela taim na olgeta klub mas luksave

WEWAK SOKA RIPOT

long dispela hevi na i mas bung wantaim na kamapim guppela na stretpela disisen long gutnem bilong soka na ol soka mana na meri husat i wok long pilai long WSA.

"Mi lukim olsem eksekyutiv bilong WSA i nogat moa laip. Gems Komiti bilong WSA tu i dai pinis. Na wanpela referi i wok long ranim na ol gem long wiken. Dispela i no stret. Gems Komiti bilong WSA i sapos long ranim ol gem na i no wanpela referi," Gwarakai i tok.


Em i tok long luksave bilong em nau yet, i gat nupela kain stail bilong ranim ol gem i kamap. Em i tok sapos wanpela tim i laik pilai em i baim tasol K5 graun fi na dispela referi husat i wok long ranim ol gem i makim wanpela tim na dispela tupela tim i pilai. Ol gem i no kamap bihainim dro we Gems Komiti wokim. Em i tok stretpela dro i stap tasol long dispela referi i wok long wokim dro bilong em yet.

Gwarakai i tok asua bilong ol eksekyutiv i wok long kilim soka insait long WSA. Em i tok sapos ol eksekyutiv i nogat taim long mekim wok bilong ol orait ol i mas tokaut stret na ol menesmen bilong klub i ken makim ol nupela lain long kisim ples bilong ol.

Em i tok WSA i gat ol guppela soka pilaia. Tasol ol eksekyutiv bilong asosiesen i wok long bagarapim na kilim interes bilong planti ol guppela yangpela pilaia.



IKEN WOKIM GUTPELA SAMTING LONG YU



FUN RUN POTOS



IKEN WOKIM GUTPELA SAMTING LONG YU

Rabaul Guria go pas long SP Kap

SP KAP RIPO

RABAUL Guria nau i go pas long SP Kap lata bihain long em i wilwiliim Lae Bombers 20-8 long wiken.

Win bilong Guria i rausim Enga Mioks long namba wan ples wantaim 12 poin. Mioks nau i sindaun long namba tu ples wantaim 11-pela poin tasol.

Tumbe husat i no winim wampela gem i kam inap las wiken i mekim save stret long ol boi Kundiawa Warriors 25-22 long Dickson oyal long Kundiawa. Maski em asples, ol boi mid-Waghi i no poretim ol banara na spia na mekim save long ol Warriors.

Mioks i bai wantaim Goroka Lahanis na Pot Mosbi Vipers.

Insait long arapela gem namel long Mt Hagen Eagles na Mendi Muruks, tupela tim i dro 4-4. Dispela gem i kamap long Mendi.

Kepten na fulbek bilong Mendi Muruks Ruben Ruing i skorim dispela trai na bihain ol i givim man of the match awot. Gem long Kundiawa i wok long strong tru inap long las minit we Waghi Tumbe i skorim trai na win.

Gavana bilong Enga Peter ipatas husat i sponsorim dispela tupela tim i bin kamap long lukim tupela i pilai strong.

Kepten bilong Warriors Randal Kaupa i go pas long kamapim gutpela pilai na tim bilong ol i go pas long skoa 16-12 long hapt taim. Ol trai ya i kam long Thomas Kale, Toby Baka na David Samuel.

Kaup a i kikim ol kovesen. Trai bilong ol Tumbe i kam long Peter Dai na James Minga who is kisim man of the match awot long Kundiawa.

Gem i no pinis yet tasol ol Warriors i no tingting gut na pilai na Dai, Ding Wii, Repi Kewa na Masa Kumiye i wok long kamapim gutpela pilai na winim bikipela graun bilong Tumbe.


Samting olsem 15 minit i go insait long namba tu hap, Warriors i no holim pas skoa na givim i go long Tumbe.

Bikipela fowat bilong Tumbe i kisim wampela lus bal na go putim senta trai.

Francis Passingan i kisim na abrusim Warriors 18-16.

Ol sapota bilong Warriors i sapta strong na ol i kamapim sampela gutpela pilai i kam long Kaupa, Siwi Takai, Paul Nombri na Grai Sine.

Tasol Joe Kuli bilong Tumbe i putim wampela senta trai na bihain Passingan i kikim wampela fil gol na dispela i daunim pawa bilong Warriors. Ol Warriors i bekim wampela trai i kam long hapbek Terry Kama tasol dispela i no inap na Waghi Tumbe i winim namba wan gem bilong ol.



• Frederica Siwin husait go pas long helpim Telikom long winim PNGFA nesenel kap sempionsip long Lae. Hia em i resis wantaim pilaia bilong Kojio Buka long namba wan gem. Tupela i dro 1-1.

Telikom winim nesenel klab sempionsip

FRANCO NEBAS i raitim

DIFENDING nesenel klab sempion, Telikom Pot Mosbi, i winim bek taitel namba tri taim bihain long ol i autim ANZ Yunivesiti 2-1, long gren fainel bilong PNG Futbol Asosiesen nesenel klab soka taitel long Mande.

Telikom i soim tru pawa bilong em taim ol i nekim namba wan birua, ANZ Yunivesiti bilong Pot Mosbi.

Fainel ya i kamap long graun we bikipela ren i kamdaun na bagarapim ples pilai.

Telikom i winim olgeta arapela gem, tasol ol i no laik tumas taim ol meri Kojio bilong Buka i dro wantaim ol 1-1.

Bihain long olgeta gem i pinis, Telikom i pilai wantaim seken tim bilong arapela pul. Blu Kumuls na rausim trausis bilong ol 3-0 long go long gren fainel. Yunivesiti i strong moa na autim Buka 1-0 long bungim Telikom.

Gren fainel i kamapim stret paia long Sir Ignatius Kilage stadium. Ol Telikom husat i save gut long pilai bilong ol i kamapim gutpela gem stret.

Long dispela as tasol na Frederica Siwin trikim ol difenda bilong Yunivesiti na setim Nelly Taman long hetim bal i go insait long umben.

Tasol dispela ol Yuni i no wari. Ol i wok long putim moa presa insait long eria bilong Telikom tasol ol i popaia liklik we

PNGFA RIPO

taim Telikom i tanim difens i go long aten long eria bilong Yuni we wampela paul i kamap.

Referi Paul Pondo i givim penalti long Siwin na em i pairapim umben bilong Yuni gen na skoa i sanap 2-0.

Dispela skoa i sanap i go hap taim.

Long namba tu hap, gem i no stat kwik bikos ol referi i no kisim pe bilong ol. Ol i toktok wantaim ol PNGFA opisel orait bihain ol i statim gen gem.

Insait long namba tu hap nau, Yunivesiti i kambek strong long taim levelim skoa tasol difens bilong Telikom i strong tru. Ol difenda ya em Judith Sauto, Rose Seves na Susan Virani.

Tasol ol Yuni i no wari ol i suvim het yet na Pondo i givim ol wampela dairek penalti bihain long wampela paul pilai i kamap long penalti boks. Tasol Margaret Aka bilong Telikom i no wanbel long dispela disisen bilong referi na Pondo i givim em ret kat na rausim em long pilai.

Straika bilong Yuni Serah Gewawbing i kisim dispela penalti na skorim gol 2-1. Ol i pilai strong tru tasol taim i sot na Telikom i win.

Telikom i winim K2000, Yuni K1000, Blu Kumuls K500 na Kojio Buka K500. Nelly Taman i kisim top gol skora, Annette Kora i kisim bes difenda na Noleeyn bilong Kojio i kisim Pilaia bilong tonamen.

PNGFA i no soim rispek long Morobe na LFA

YAKAM KELO i raitim

PAPUA Niugini Futbol Asosiesen (PNGFA) i no ronim soka stret long gutpela na stretpela pasin insait long kantri, olpela PNG soka pilaia na administreta John Peka i mekim dispela tok-tok.

Long makim pes bilong Lae Futbol Asosiesen (LFA) vais presiden John Peka i tok pasin Papua Niugini Futbol Asosiesen (PNGFA) i mekim long i no singautim wampela memba bilong LFA long stap wantaim Lahi komiti long lukautim nesenel klap taitel bilong ol meri long wiken.

Peka i tok olgeta komiti long las wiken tonamen em ol Lahi tasol na i nogat wampela LFA opisel i stap insait we i soim tru olsem PNGFA i no sanap stret antap long nem bilong kirapim soka insait long Papua Niugini.

Olgeta taim wanem nesenel soka tonamen i laik kamap long Lae siti, LFA na Lahi i save bung wantaim long lukautim dispela tonamen long pastaim. Tasol nau dispela pasin i senis olgeta na em i no gutpela tru long groa na spirit bilong soka insait long kantri, Peka i tok.

Jenerel Seketeri bilong PNGFA Ivan Ngahan wantaim het opis bilong PNGFA i stap long Lae. Tasol olsem wanem tru na PNGFA i abrusim LFA.

LFA olsem wampela olpela na biknem soka asosiesen insait long kantri na i gat nem na luksave long lukautim planti bikipela nesenel na intanesenel tonamen long bipo long taim bilong planti biknem na ol olpela soka sta bilong PNG.

Peka i tok em i nogat komplek o tingting nogut egensim ol komiti bilong Lahi husat i go pas long lukautim pilai long las wiken. Tasol bikipela bel nogut tasol em long wanem as tru na PNGFA i no luksave long LFA.

Em i tokaut tu olsem PNGFA i nogat luksave o rispek tu long Morobe provinsal gavman o

Morobe administresen o Lae Siti Atoriti long singautim wampela mausman i go opisel witenesim dispela sempionsip bilong ol meri.

Morobe provinsal gavman na administresen i save sapotim soka insait long kantri wantaim mani long salim PNG skwat i go long ovasis tonamen o sapotim long developmen bilong PNG skwat long trening na ol kain helpim. Tasol las wiken tasol i soim olsem PNGFA i no luksave na soim rispek long dispela.

LFA i bin larim soka fil bilong en (LFA Pak) i stap nating long las wiken long lukautim sampela gem bilong ol meri sapos Lahi i bungim hevi long dro na ol gems.

Mista Ngahan i tokaut olsem PNGFA i no laik givim baksait long LFA. Em i tok LFA em wampela memba tu bilong PNGFA na mipela i amamas tru long ol i save sapotim wok bilong nesenel bodi.

Sekretari i laik tok klia olsem bipo ol i givim tonamen i go long wanwan senta, ol i save skelim sapos dispela senta em i nap o nogat.

Las yia, LFA i holim PNGFA Kap we i kamap gut tru. Olgeta opisel bilong LFA i go pas na ol i kisim wanwan ausait man long sapotim wok bilong ranim tonamen.

Lahi i winim wok long holim nesenel klab sempionsip bilong ol meri. Na presiden Moses Demas yet em i tonamen dairekta na em i makim ol help man bilong em long lukautim dispela tonamen.

Ngahan i tok strong olsem PNGFA i no givim baksait long LFA. Em i tok nau em i taim bilong ol, na larim ol i ken mekim wok.

Dispela sempionsip ya i ran gut tru, na LFA i noken wari tumas.

PNGFA nau i laik skelim wok bilong holim ol nesenel soka tonamen i go long olgeta hap bilong kantri. Sapos wanem provins o asosiesen i laik holim soka tonamen i mas aplai na PNGFA i ken skelim.

Wara Tanget winim Madang Distrik Soka taitel

MICHAEL KIURAM i raitim

OL MANGI Wali husat i save pilai long Wara Tanget i soim tru olsem ol i ken pilai soka taim ol i wilwiliim stret Jant-Mawan 5-3 long grenfainel b ilong Madang Distrik Soka tonamen long wiken.

Long stat bilong dispela grenfainel, Koi Dado bilong Wara Tanget i traim lek tasol golkipa bilong Mawan i was gut na rausim bal. Tasol ol Wara Tanget i no wari na traim olgeta stail long traim brukim umben bilong birua tim.

Orait ol boi bilong Gogol Wara i kala olsem pis karuwa na solapim umen bilong Wara Tanget taim Bernard Daniel i kailim bal long lek kais na sutim bal i go stret abrusim golkipa bilong ol boi Wali.

Tasol ol boi Wali i kirap bek hariap tumas na Peterson Mathew i bekim dinau. Ol nboi Wali i pait strong gen an Isaac Mathew wantaim Jason Adin i pairapim umben bilong ol Jant-Mawan gen.

Ol Jant Mawan i luksave olsem ol i mas wok bung wantaim olsem na taim Wara Tanget asua insait long eria bilong em yet, ol boi Jant Mawan i kikim sans gol.

MADANG DISTRIK SOKA RIPO

Dispeal asua gol i kam long Stanis Gufino. Orait ol boi Mawan i kamapim wankain asua tu taim Luke Yanuewe i holim bal. Referi Bonny Pongo i givim Asua kik i go long Yawain Bewaru bilong Wara Tanget. Bewaru i kik antap tumas na golkipa bilong Jant-Mawan i paitim i go aut.

Tasol taim yu skelim gut, tupela lain hia bai yu save olsem ol Jant Mawan i gat ol gutpela pilai bikos ol i hevi olsem ol buldoza bilong ol Siapan. Tasol ol i no yusim gut ol pilai man gut long namel na fran. Ol boi Wara Tanget em ol i kisim papa long yan na kakaruk bilong Yagaum. Ol tu i save kikim bal na ran olsem ol papa kakaru na ol i no givim sans long ol boi bilong Mawan.

Ating ol boi Wali i mas tok olsem "Elaga Walia-yobon Duguna o" na tok i stret taim Peterson Mathew i hukim bal na tromoim i go insait long umben bilong ol lain Jant-Mawan.

Taim ol Wara Tanget kambek long malolo, ol pasim tok na Isaac Mathew i pairapim namba foa gol bilong ol. Na

bai yumi tok wanem, em i wali stail bilong soka. Ol Wali bilong Nambai na Gogol i skelim bilum yam.

Ol lain Jant-Mawan i traim ol kainkain rot tasol "em i hat tumas. Olsem Wass Kadoi i tok. Ol boi Wara Tanget i surkim bal i go na kalabusim insait long banis bilong Mawan. Ol Mawan i painim haty tumas long rausim bal na taim ol boi Wara Tanget i pilai olsem kakaruk, ol Jant-Mawan i paul Robin Amos i pairapim umben bilong em yet. Em na ol boi Wara Tanget i tok "zu zet nau"

Long dispela Madang soka pilai resis we i bin stat long Julai 21 na pinis long Julai 24, ol pilaia bilong Madang Distrik, Transgogol, Saut na Not Ambenob i bin kam bung long salens ya.

Wara Tanget nau inap kam na pilai insait long ol soka bilong Madang Soka Asosiesen insait long taun kompetisen wantaim ol klab.

Amele One i winim namba tri ples na Kein One i kamap namba foa ples.

Stail mangi Jason Adin i kamap top skora na ol i makim em long kik insait long soka tonamen we bai kamap long Lae.

NCD Hoki sempionsip i kamap gut tru

NCD HOKI HIPOT

TONAMEN dairekta bilong NCD Hoki Sempionsip Kaluwin Potuan i amamas tru long dispela sempionsip i ran gut tru.

Dispela em i namba tri NCD sempionsip we i stat long Sande na pinis wantaim gren fainel long Mande Remembrance De.

Sempionsip ya i pulim planti famili long kam pilai, sapotaim ol papa na mama, o pikinini na sampela i kam long sapot tasol.

Ol tim i resis em (mens) sinia white, sinia marun, elite, junia na veterans. Na ol meri divisen em sinia white, sinia marun, elite na junia.

Potaun i tok olsem sempionsip i bin stat gut na pinis gut. I nogat wanpela bel hevi long pait samting i kamap.

Ol tim i bin pilai gut tru long soim ol kain stail bilong ol long

pulim bai na tu long atenk.

Long gren fainel bilong meri, gem ya i bin stap namel long sinia white na elite.

Ol yangpela elite pilaia olsem Belinda Magalu, Carol Kutan, Ruth Ngahan, Leah Alik na Mary Diapong i traim skorim gol tasol ol Sinia White i strong tru.

Tupela tim wantaim i strong na skoa i sanap 0-0.

Insait long namba tu hap, ol sinia pilaia olsem Elly Marsipal na Helen Pokupen i kamap gutpela pilai na helpim Vagi Boga long putim wanpela gol long win.

Ol sinia i skorim wanpela gol gen i kam long Helai Puka long surikim skoa i go long 2-0.

Insait long mens gren fainel, Sinia White i salensim ol Junia. Tupela tim wanpela i nogat skoa inap long fultaim. Orait long penalti, ol Sinia i skorim tupela gol na Junio nogat.

2000 Fan Ran pulim planti man

FAN RAN HIPOT

PLANTI pipel i bin kamap long stap insait long 2000 Trukai Fan Ran we i bin kamap las wiken.

Ol senta i holim fan ran em Pot Mosbi, Lae, Mt Hagen, Goroka, Rabaul na Tabubil. Long Pot Mosbi klostu long 1500 man meri na ol pikinini i stap insait long dispela fan ran resis.

Long Pot Mosbi i gat wanpela dai i kamap long taim bilong fan ran. Bruder John Amona bilong Sen Peters Komyniti skul long Erima, i kisim hat atek na i dai.

Tasol dispela i liklik sori nius. Bikpela nius em planti ol man i amamas long stap insait long dispela fan ran.

Dispela fan ran i save kamap olgeta yia long traim helpim PNG Spots Federesen long painim mani long salim tim i go ovasis.

Nius i kam long Rabaul i soim olsem Rabaul na Kokopo i holim fan ran bilong ol yet. Ol ami i stap long Is Nu Briten i bin go pas long ol fan ran bihain long PNG Motors brens long Kokopo i sponsarim ol.

Kepten Nicholas Henry i amamas tru long larim ol soldia bilong em i stap long fan

ran. Ol dokta bilong dispela grup tu i helpim ol Sen Johns Ambulens long mekim ol wok bilong ol.

Ol plis i ripot olsem nogat trabel i kamap long dispela tupela senta. Planti ol rana i stap bek long lukim gen namel long Lae Bombers na Rabaul Guria we Guria i wilwilim ol wansait stret 20-8.

Na long Goroka, moa long 500 man meri i stap insait long dispela fan ran. Mobile skwat 12 bilong Hailens i save stap long Goroka i putim wanpela skwat na mekim ran bilong ol tu.

Kodineta bilong Fan Ran John Susuve bilong Spots Institut i tok olsem planti ol mangi i kamap bikos ol i no save go skul bikos long tisa straik.

Morris Manai i winim dispela resis, na presiden bilong PNG Atletik Tony Green i pinis namba 10 long dispela fan ran resis.

Geoffrey Base husat i save skul long Goroka Haikul i kamapim wanpela strongpela ran na pinis namba 5. Base i soim olsem em i ken kamap wanpela gutpela rana long bihain taim ya.

300 pipel kisim skul

PNG SPOT KOMISIN RIPOT

MOA long 300 spot lida insait long 22 viles insait long Mekeo long Sentral provins i sindaun long wanpela spot kos em PNG Spots Komisin yet i go pas long em.

Dispela spot kos ya i bin stat long Tunde na bai pinis tumora.

Dispela kos ya bai toktok long wok bilong administresen, kosing, referi, wok ampai long basketbal, netbal, soka, volibal na tas ragbi.

PNG Spots Komisin i salim ol opisa bilong em olsem John Hou, Scott Vavine, Winnis Tua, Sophie Kuasie, Moses Tolingling, Kila Dick na Tim Gawot i go long mekim dispela kosing woksap.

Ol ples i stap insait long dispela woksap em Amiaka, Piunga, Apianiapi, Engefa, Maipa, Inaukina, Ma'akunga, Akufa, Mounga, Ppanonogoi, loi (Not Mekeo), Aipeana, Veifa, Amoamao, Rarai, Aloivea, Inawi (Wes Mekeo), Inauabi, Eboa, Inauwaia, Iseu Vaibua na Oni (Is Mekeo).

Spots Developmen opisa bilong Sauten rijen, Tim Gawot i amamas tru long ol viles pipel bilong Mekeo long go pas long dispela spots woksap.

"Ol pipel ya i soim bikpela laik na tu ol i redi tru long dispela woksap.

"Long taim em i stap long PNG Spots Komisin, namba bilong ol pipel i bikpela tru bikos planti kos bilong em i gat pipel maki bilong ol i stap long 20 tasol ya."

"Mi no save kisim dispela kain bikpela namba long ol skul o woksap mi holim long bipo na mi guria stret ya," Gawot i tok.

Presiden bilong Not Mekeo Aloysius Binigoba i tok em i amamas tru long ol spot lida long wanwan viles i kisim dispela skul.

"Mi ting em bai gutpela long trenim ol spot lida husat i ken yusim gut save long bihain taim,

"Mekeo Volibal sempionsip bai kamap tupela wik bihain long dispela kos, na planti ol spot lida bai yusim save bilong ol long helpim tim i redi long dispela sempionsip long narapela mun," Binigoba i tok.

Em i tok bihain long dispela sempionsip, ol bai makim wanpela tim long makim Mekeo long nesenel volibal sempionsip long Pot Mosbi.


Binigoba i tok olsem wanpela olpela pilaia na nau administreta, dispela spot woksap bai helpim tru ol pipel bilong Mekeo.

WANTOK Spot i tok sore

WANTOK Spot i laik tok sore long Miriam Tannos, meri bilong wanpela bikman bilong MRDC husat i save sapotim wok bilong soka. Ripot ya i kamap long Wantok long Jun 29, 2000 we i tok meri sapota i lusim traisis na solim as na ol sapota bilong Yunivesiti i no amamas.

Ripota ya i bin stap long taim bilong asua i kamap na raitim stori tasol ripot i no tru. Sapos ripot ya i bagarapim nem bilong yu na famili bilong yu, Wantok Spots i mekim bikpela tok sori bikos em i no laik kamapim bel pen namel long ol gutpela sapota bilong soka na laik strongim wok bilong soka i kamap bikpela. Wantok Spot i sore.

Spots Edita
WANTOK Niuspepa



• Bos bilong Spots Komisin John Kambuou tu i gat taim long Fan Run.

7-pela pawa lifta go long Osenia Gems

PAWA LIFTING HIPOT

SEVENPELA pawa lifta i lusim kantri pinis long go stap insait long Osenia Pawa lifting sempionsip long Sidni, Australia.

Dispela wokabaut bilong ol i kam long gutpela lukaut bilong Trukai Industries.

Nesenel Sels menesa bilong Trukai Geoff Down i givim tiket i go long nupela presiden bilong Pawalifting Ila Geno.

Tim bilong PNG em tripela meri na 4-pela man husat bai stap long Sidni, Australia na pilai na kambek long Ogas 1.

Down i tok Trukai i amamas long sponsarim dispela spot bikos em i gat gutpela rekot

bilong pilai.

Geno i tok tenk yu long Trukai long givim dispela sapot na tiket i go long ol lain pawa lifta. Em i tok dispela ol lifta i kamap top long sempionsip olsem na ol bai makim kantri long Australia.

Tim bilong meri em Ruth Bulaige (67.5kg), Meteng Wak (75kg) na Aida Geno (75kg). Na tim bilong ol man em Eric Yameng (75kg), Livingston Sokoli (82.5kg), John Anis (100kg) na Frank Robby (100kg)

Robby em tim menesa na tu kosa semtaim.

Dispela mani bilong tiket ya i kam long sponsasip mani inap long K117,00 long

Trukai. Arapela spot em Trukai i save helpim em weiltifting na bodibilding.

PNG Spots Federesen sekretari Sir John Dawanincura i tok olsem Trukai i tromoi moa long K117,000 long tripela spot na tu i save givim ol sampela kain helpim t'siot na ol traveling beg.

Wokabaut bilong Osenia sempionsip i save kam long Trukai sponsasip na i no long Fan Ran sponsasip.

Sir John i askim ol arapela spot long traim wokim mani bilong ol tu na noken strong long sponsasip mani tasol long ol bikpela kampani olsem Trukai.



IKEN WOKIM GUTPELA SAMTING LONG YU

PNG Musik

Wod Pablising Saplimen

Kusai Studio: wantaim nupela stail

ALMA MARIMYAS i raitim

TAIM yu save lukim ol dispela musik vidio bilong Moses Tau, yu save ting husait i wokim?

Nogat man moa, em ol lain long Kusai Studio tasol. Man dispela nem em stail tru.

Kusai Studio istap long New Ireland provins na menesing dairekta bilong dispela studio em Alun Beck wantaim ol paip-pela ol enjinnia bilong em. Wantaim em bai siks-pela olgeta.

Bipo long Kusai studio i kam long Kavieng, em save stap long Rabaul. Tasol bihain long volkeno i pairap em igo long Kavieng.

Las yia tasol, Kusai Studio i stat long wokim ol prodaksen bilong em.

Mista Beck itok olsem nau yet long Papua New Guinea, musik indastri i wok long senis na ol studio imas wok hat moa yet long wokim musik igat gutpela kwaliti.

Na long dispela, na Kusai studio i wok long mekim ol kain musik we ol man-meri ken luksave olsem dispela musik em bilong dispela ban. Ol les long wokim musik, we olgeta band bai i karai wankain.

Ol enjinnia bilong Kusai Studio Brian Matale, Melton Avoke na Richard Nennek i hamamas tru long wok ol wok long wokim.

Dispela tripela man istat i gat ol ban or group bilong ol yet.

Brian Matale, save wok wantaim ol gospel grup.

Em yet igat wanpela album pinis, na narapla em rilism nau tasol. Nem bilong dispela album em, "Magit na malar".

Taim em wok olsem enjinnia emi painim wok bilong emi isi tru na em ken wokim ol gospel singsing igat gutpela moa kwaliti.

Melton Avoke na Richard Nennek igat wanpela ban, nem bilong em "Last Ireland". Na musik ol save wokim em i olsem reggae.

Tupela i hamamas tru long wokim wok enjinnia. Ol itok olsem em i gutpela wei long lainim long usim ol masin.

Olgeta man ya i hamamas tru long wok long Kusai Studio.

Kusai studio i gat ol masin we ol save usim komputa tasol.


Dispela studio ino long taim yet i rilisim ten-pela album, long ol grup olsem Crew Changes, Simply Justice na Last Ireland. Na ol wok long wok yet long siks-pela moa.

Ol man-meri save kam long olgeta hap long New Guinea ailan, na long Momase long rekodim musik bilong ol.

Long dispela yumi ken lainim olsem, musik insait long Papua New Guinea wok long senis, na Kusai Studio laik wokim bai ol ban oa grup bai gat wanwan stail bilong ol.



• Ol man husat i save mekim ol kaset long studio. Dispela em ol enjinnia bilong Kusai Studios. Mike Melton na Richie. Ol i save hait tasol han mak bilong ol i save kamap long wanem kain musik yu harim i kam long Kusai Studios.



• Alun Beck, Bik bos bilong Kusai Studio.

Hot New Hits

from **KUSAI STUDIOS**

SELECTED HITS

JUSTICE
Gospel 1998

REGGAE DANCES
KUSAI STUDIOS

Wholesale Orders
KUSAI RECORDING STUDIO
 PO Box 623, Kavieng, NIP
 Ph 9842666 Fax 9842693
 email: albeck@latitude3.com

PNG MUSIK

Wod Pablisng Saplimen

Musik indastri bilong mipela

DON NILES i raitim

TRUTRU ating wanpela naispela stori bilong wanpela bisnis we i wok long kamap gut tru insait long PNG bihain long independens em stori bilong kamap bilong musik indastri. Dispela stori em stori bilong senis we i bin kamap long hia.

Long taim PNG i no bin kisim independens yet, ol i save katim olgeta singsing bilong PNG long ovasis. Long dispela taim, ino bin gat kaset na ol i save katim ol singsing long ol rekot we yu ken pilaim long pikap. Ol kampani olsem ABC, CBS, EMI na RCA long Australia i save katim ol singsing. Sampela bilong ol ben long PNG we i bin katim ol singsing long dispela taim long 1960 i kam inap long independens taim em Gunai Mirros, Krymus, Gwadu na larowari Drifters. Tasol long ol dispela kampani, Viking, wanpela kampani bilong Nu Silan, em wanpela husat i bin wolim gutpela wok stret. Long 1968 igo inap long 1977, ol i bin wokim katim gut tru ol singsing bilong ol ben olsem Freebeats, Depaou, Kopikats, Stalemates, Young Calypso na Paramana Strangers. Sapos yu lukluk long stori bilong PNG musik we i stat long kamap, dispela ol ben em ol pas lain bilong kirapim tru musik long PNG long stail bilong ol yet na long rot we ol i bihainim ol ovasis ben.


Liklik taim bihain long independens, ol musik we i save kam long ol ovasis kantri tasol i wok long senis. Long dispela taim Kristen Kaset i bin stat long katim ol kaset bilong ol lotu singsing tasol long 1977, NBC kirap long katim ol singsing. Ol i bin stat long katim ol singsing bilong ples na ol wan-



• Namba wan rekot bilong Rising Star. Studio long Pot Mosbi.

wsan stringben na long 1978, ol katim nambawan rokot bilong wanpela ben em New Krymus. Long 20 krismas bihain, NBC na Kalang katim 450 rekot olgeta long ol ben we i kam long olgeta hap bilong PNG. Olgeta dispela i bin kamap long ol kaset. Kaset i no kos bikpela mani sapos yu skelim em wantaim ol rekot. Tu ol i isi long karim, i ken stap longpela taim na tu ol redio kaset we yu ken pilai ol kaset tu i gat kankain sais na prais.

Long stori biong kamap bilong ol lain husat i save katim ol singsing long PNG, i bin igat ol liklik kampani husat i bin katim sampela kaset na bihain ol i stop olgeta. Dispela ol kampani em ol skul, sios



• Kapa bilong Riwain. Pop musik bilong bipo. Gulf na Sentral provins.

liklik bisnis. Tupela bilong dispela em ol Paradise Recording Kampani na National Arts Skul. Taim Chin H Meen stat long katim ol kaset long 1980, ol i wokim ken kaset bilong ol Paramana Strangers na Sanguma na tu ol i wokim ol nupela kaset bilong ol Black Brothers. Chin H Meen i nambawan studio we i bin stat olsem na namba bilong ol kaset em ol katim, ol musik widio na ol komplek dis i moa yet long ol narapela kampani insait long kantri.

Narapela studio we i stat bihain long Chin H Meen long Pot Mosbi long 1981 em Walter Bay. Dispela studio i wok tasol long katim ol lotu singsing bilong ol lain long

Tasol ol studio i no bin stap long Pot Mosbi tasol long 1980. Long Rabaul, Soundstream na Kuanua studio i bin stat. Long Arawa, Lowkal studio na long Madang Santalina Studio i bin stat. Nogat wanpela bilong ol dispela kampani i stap long nau tasol long taim ol i bin stap, ol bin wokim rot bilong planti ol ben long go na katim ol kaset. Tu ol i halvim ol musik man long lainim ol kankain rot bilong katim ol kaset long bihain taim long ol narapela studio.

Bihain long Saoundstream i bin pas, narapela bikpela studio ol kolim Pacific Gold Studio i bin stat long 1983. Taim ol i stat long Rabaul, resis namel long tupela studio long Pot Mosbi na long dis-

pela nupela musik i stat. Bihain, Chin H Meen wokim wanpela studio long Rabaul na long dispela i kamap, ol musik long East Nu Briten i no isi long pairap long ol redio stesin. Tasol bihain long maunten i bin pairap long 1994 long Rabaul na ol studio long hap i pas, Tolai musik wok long sek na i go daun.

Long 1988, tumbuna Traks Studio long Madang stat long katim ol singsing long hap. Wanpela ben husat em katim kaset wantaim ol long dispela taim yet em Kales Gadagads. Sandy Gabriel, man husat i go pas long ol singsing ol singsing bilong ol long wanpela kain nek we bihain ol narapela man tu i wok long bihainim maski trangu i dai pinis.

Kain stail bilong ol Madang kirap na kisim ples we ol stail bilong ol Tolai ben i lusim bihain long volkeno bagarapim ol.

Narapela tupela studio tu em GMA (Good Music Available) long Pot Mosbi na Kumul Studio long Goroka. Tupela tu i bin stap long moa long tenpela krismas na tu i bin halvim ol musik man bilong mipela long ol ples we ol i stap long en.

Dispela senis long musik long taim we mipela i save harim ol musik bilong ol ovasis lain igo long nau we mipela i wok long harim ol musik bilong PNG yet i soim olsem moa long 90 pe sen bilong olgeta kaset em ol katim i bin kamap insait long PNG tasol. Tasol dispela namba bai i go antap yet.

Long nau yet, planti ol nupela studio i wok long kamap yet na dispela bai min olsem ol i bai resis tru wantaim ol studio we i stap pinis bipo. Kain resis pasin i gutpela long ol musik man na tu ol lain husat i save laikim PNG Musik.

PNG musik: Pastaim, nau na bihain

Ating i gat wanpela stori ol lain long pels save tokim yu long nambawan taim ol waitman i kam long viles bilong yu na rekotim singsing bilong ol tumbuna. Ating yu save laik long painim aut wanem taim Barike Bend i katim nambawan kaset bilong ol o ating yu gat wanpela asainmen long yunivesiti na tingting long painim ol ples nem bilong kankain garamut bilong Is Sepik. O ating yu tanim ol singsing bilong ol tumbuna na hau ol i save stap na yu laik putim i kam pablik long olgeta manmeri i ken harim. Ating i gat wanpela bung i kamap long ples we i no nbin kamap inap 50 krismas na dispelka em i nambawan taim na yu laik bai ol i rekotim dispela bung. Yu bai go long wanem hap tru taim yu gat dispela kain hevi. I gat wanpela ples insait long PNG we yu inap go long ol i ken stretim dispela ol wasri bilong yu. Dispela ples em long : Institute bilong Papua Niugini Stadies (IPNGS).

Dispela ples i bin kamap bipo long Independens, Musik Dipatmen bilong gavman i save helpim wantaim mani na wok bilong ol em long mekim painim aut long ol kankain musik. Bikpela hap bilong Musik Dipatmen i gat kankain, inap olsem 8700 haus bilong musik ol i rekotim. Insait ong hap i gat kankain ripot bilong we ol musik i kam na wanem mining na narapela ol samting i stap insait long soim ol manmer na rekot i bin stap i stat long

1998 taim nambawan taim ol i mekim rekot na i kam kamap long ol kaset aste tasol ol i katim long ol musik studio insait long PNG.

Ol wok manmeri long IPNGS i sekim na wok long rekotim musik i kam long olgeta provins na traim pulimaim liklik spoes i sdtap long Musik Dipatmen Bikos PNG i gat kankain musik, dispela wok bilong bungim ol musik i wok long go het yet. Long i go wantaim dispela ol musik em planti kankain musik bilong narapela hap kantri ol i bin kisim bipo na karim i go wantaim ol i nau kam stap tu. Dispela ol olupela musik i karim yet nek bilong ol man dai long taim bipo, ol singsing tu i makim sampela pasin tumbuna we i lus olgeta na yumi no save lukim moa nau. Bipo long IPNGS i kamap, i bin nogat wanpela ples, ol dispela rekot musik i bin stap long ol ovasis kantri na i no long PNG. Bikpela hatwok bilong IPNGS i lukim planti bilong dispela ol musik i kam bek pinis na a stap long PNG. Ol man husat laik painim aut moa long musik insait long PNG i save karim dispela olupela rekot i kam bek gen na givim long IPNGS i ken lukautim.

Planti tausen musik bilong mekim mani tu i bin kamap long PNG long ol yia i go pinis. Planti rekot kampani insait long kantri i putim plan ti kopi bilong dispela musik wanatim IPNGS na i stap bilong ol manmeri bihain i ken harim. Ol sampela

kaset kampani is ave askim long kisim dispela kopi bilong ol bek bikos ol i bagarapim o sampela kopi ol i holim long en i lus. Dispela ples bai luakitim wan em samting yu gat.

Long go wantaim dispela ol musik i gat ol kain buk we i tok wanem kain samting i stap long dispela rekot na mining bilong dispela ol musik. Dispela olgeta samting i mekim na sapos yu laik painim aut moa long musik insait long kantri, IPNGS i gutpela ples long go na sekim. Long planti hap i gat ol dispela kain rekot i stap longwe long narapela kantri na ol manmeri i no save tasol PNG i gat IPNGS na olgeta rekot i stap na dispela i ples i holim olgeta samting i stap na olgeta pipel bilong kantri i ken hamamas olsem ol i gat ples we kankain musik bilong kantri i stap long en.

Ating planti pipel i ting olsem IPNGS i save wari tumas long musik bilong ol tumbuna na i no ol nupela singsing na musik. Ol tumbuna musik i kisim nambawan ples insait long IPNGS tasol dispela i no min olsem ol narapela nogat. I gat planti ol kankain musik bilong PNG istap nau i stap insait long IPNGS musik Dipatmen. Ol kain musik olsem pop, rok "n" rol, popula musik, bras bend, paip bend na narapela kankain musik we i soim wanem kain laip yumi ol pipel long PNG i gat tude. Olgeta kankain lotu musik long kantri bilong yumi tu i

stap long akaiv.

Bilong kisim na rekotim dispela ol samting i wanpela bikpela samting olsem na IPNGS i laik bai ol manmeri i ken mekim yus long dispela hatwok na lainim kisim sampela helpoim long wok bilong ol, ino long dispela ol rekot i sting nating na stap long akaiv olgeta taim. Ol ikain long IPNGS i bin raitim planti liklik buk bilong toksave long ol pipel olsem dispela ol kain samting i sta IPNGS. Wanpela buk nau tasol ol i raitim long en em Reverend Andrew Midian bilong Duke of York. Rev Midian i tok olsem ol singsing na musik long ples i ken go wantaim nupela stail musik na kamapim tupela wantaim long lotu insait long Yunated Sios. Planti arapela sios insait long kantri i save yusim dispela kain musik na i gat tingting long strongim dispela kain tingting.

I gat narapela buk insait long dispela ol grup bilong buk na dispela buk i save toktok long musik na pasin bilong Kaulong pipel bilong Wes Niu Briten. Dispela em bai nambawan buk ol bai atim long dispela hap bilong provins na ol eksampol bail stgap long CD disket tu.

IPNGS i save kamapim wanpela buk long musik na danis stail bilong Pasifik ol seave kolim Kuelele. Narapela buk nau ol i raitim pinis na stretim i stap long en i gat stori bilong George Telek, Enga Musik, Australian Aboriginers Musik, sing

sing na musik bilong BRA. Narapela buk bai i gat ol pepa ol i givim long wanpela bikpela bung bilong musik long UPNG na IPNGS.

IPNGS i save wok bung wantaim Yunivesiti bilong Goroka long kamapim sampela gutpela buk we edukesen Dipatmen i yusim tude long olgeta skul insait long kantri. The Papua New Guinea Musik Collection i gat 11pela kaset wantaim wanpela buk. Dispela buk i gat eksampol na kain stail musik insait long wanwan provins bilong PNG. IPNGS i bin kamapim dispela buk na kaset bilong long ol tisa i singaut long edukesen diptmen olsem ol i nogat wanpela we long skulim ol pikinini musik bilong PNG long skul.

Narapela popula buk em long Riwain!. I gat wanpela buk na tupela kaset. Dispela ol i bilong skulim ol manmeri long pilai gita. I no olsem ol narapela buk bilong dispela kain we i save yusim ovasis melodi nabaut, dispela ol samting i save yusim kain eeksampol long ol musik bilong PNG na Pasifik olsem eksampol Olsem na yu ken lainim gita na pilai bihainim ol kain lain olsem Paramana Strangers, Waghi Hellcats, Sanguma, Molachs na planti moa.

IPNGS i wok long mekim bikpela wok long rekotim na lukautim PNG musik bilong pastaim, nau na bihain taim tu.



OFFICE OF RURAL DEVELOPMENT

Lagani 2000 district hatubua

gaukara heduru moni grant

Gavamani abia ura



Hatubua gaukara
badadia be
hegeregere

Papua New Guinea gavamani ena laloa badana gunika kahadial noho taudia edia mauri hanamoa totona, hatubua gaukaradia Grant moni dekenai durua do idia henia diba.

Rural Developmen Ofis be hadibala hereva la henia, daika ura kwalimu ore, emul gunika gabu hatubua gaukaradia totona, grant moni applikesen pepa siaidia Joint District Planning bona Budget Komiti dekenal.

Lagani 2000 ena grant moni, be gunika gabu hanamoa gaukara badadia kahanai totona.

Rural Developmen Ofis ese inal gavamani ena hatubua gaukara heduru monidia do ia naria bona la gaukaralala Papua New Guinea ena District lalonai taunimanima Ibounai Gavamani ena heduru do idia davarai, noho mauri hanamoa totona.

Ura kwalimu oreadia, emul ura umul hahedinarai local District Administrator dekenal, elava umul lao Rural Developmen Ofis dekenal.



- ✓ Sisima kamokau wafo
- ✓ Sinavai amo hanai nese
- ✓ CIS edia ruma hanamodia
- ✓ Polisi edia ruma hanamodia
- ✓ Motuka heau dala maragidia
- ✓ Aid post bona Kliniki maragidia
- ✓ Peleini maragidia edia diho gabudia
- ✓ Health gaukara taudia edia noho rumadia
- ✓ Ranu abia vareai gunika gabu dekenal
- ✓ Paua abia vareai gunika gabu ta ta lalodial
- ✓ Gavamani ena administration ruma haginidia
- ✓ Education gaukara taudia edia noho rumadia
- ✓ Natudia edia Elementary bona Primary sikuli rumadia

Oi ura diba oi abia neganai be inal taudia oi itala :

Office of Rural Development
P. O. Box 1100
WAIGANI N.C.D

Telefon : 328 8380
Fax : 328 8361

LAIPSTAIL




• Ol wokman i wok strong tru long planim flawa raunim Palamen haus long Mosbi long dispela wik. Ol i traim long pinisim wok dispela long taim PNG bai selebretim 25 yia bilong independens long kantri. *Poto: ISSAC IKUAVI.*

• Julie Akeke (lephan) wantaim Ledi Roslyn Morauta i mekim paia danis wantaim wanpela mama bilong Ketarobo wimens singsing grup. *Poto: FRANCIS BENNY PM's MEDIA.*



• Olsem wanem, inap mi kam wantaim yupela? Yu raun long wanem hap tru na ol i opim nupela klasrum long Dangsai? Em ol plikinini na mama bilong ples Platilo insait long Madang provins i amamas long lukim nupela klasrum memba bilong Sumkar Mathew Gubag i putim K20,000 long kamapim. *Poto: KIWURAM KANAKO.*

• Dokta Fabian Pok wantaim memba bilong Nawae Kennedy Wenge i bin sanap antap long nupela Sangkwep bris long ples Sampmanzing insait long Nawae ilektoret long las mun. *Poto: FRANCO NEBAS.*



• Ol mama na plikinini i bin bung long kem long ples Barapu long wetim wanem kain helpim ol bai kisim long Gavman. Dispela em long taim solwara i bin bagarapim ples bilong ol long Julai 1998.

• Ol kopi groa insait long Simbu provins i bung na sainim petisen pepa egensim toktok bilong putim kopi industri aninit long lukaut bilong Gavman. Ol i bung long Mindenge ples long Simbu provins.



Wokabaut bilong sampela Lufa pipel



BIPO long tumbuna taim. Sampela lain i bin stap long wanpela sapston kolim Uyabu long hap bilong Kami Lufa Distrik na les liklik na lusim dispela ples na go long Hogogusa long Oliguti. Dispela hap ol i stap amamas na i stap. Wanpela taim ol mumuim planti banana, taro na yam na kaikai na pulumapim sampela plet na i go putim long haus na silp.

Long biknait sampela tewel man bin kam na kaikai na pinisim olgeta kaikai na ol pulumapim planti ston long dispela plet na go pinis. Dispela ston long tokples Lufa ol kolim Sauta. Long biknait sampela lain bin pilim hangre na kirap kisim kaikai long plet na kaikai tasol tran-gu popaia ol daunim ston, na ol kra i go inap tulait i bruk.

Nau ol i tingting long lusim dispela hap na go painim narapela hap ken long i stap. Sampela ol tok long ol bai bihainim rot i go long Lufa stesen na go i stap long Haero na sampela i strong long bihainim rot i go long Kogoraipa na go i stap long Koseto.

Tok i tait na sampela bihainim rot i go long Lufa stesen na go long Haero na sampela bihainim rot i go long ogoraipa na go i stap long Koseto. Tasol long dispela hap Hogogusa ol bin lusim wanpela lapun manmeri bilong lukautim tumbuna graun. Nem bilong tupela Komane na Damaro. Dispela tupela lapun manmeri lukluk bihainim ol na singim wanpela sori singsing olsem:

*Biguasebo khailenaga kaebo (2x)
Koseto'ae lo haio yasia yasia' a haio
Biguasebo khailenaga kaebo (2x)*

*Hadosebo khailenaga kaebo (2x)
Damaro'aelo haio fulna fulna haio*

Hadesebo khailenaga kaebo (2x)

Dispela sori singsing i minim na bihainim ol lain i go long koseto na olgeta kisim bagarap long kra wantaim i go nabaut long wanem hap ol i laik long go. Ol lain tumbuna i stap long koseto em ol 4-pela tumbuna olgeta na ol i gat wanpela yangpela boi tasol. Ol 4-pela tumbuna kolim nem bilong ol olsem:

Fanikave, nanumepa, aiyonu na damaluse na yangpela boi Dote Kenni. Ol i gat wanpela tingting olsem ol i laik lusim dispela hap na go long Haguvi'ae em long hap bilong kogoraip eria long Lufa distrik yet.

Tasol dispela yangpela boi bilong ol Dote em bin hait na prenim wanpela meri i stap na ol i no save. Dispela meri em bilong Ukunupi viles. Wanpela moning ol dispela tumbuna lain redi long lusim dispela hap Koseto, tasol bikpela sori na wari i bin kisim dispela boi nogut bikos em les long lusim dispela gelpren. Tran-gu ol kirap na go wantaim na boi nogut i singim wanpela sori singsing olsem:

*Kamanae, kamanae, ukunupi, kamanae, kamanae
Ve kamata, vei kamanae, lona hagai hagai,
kamanae kamanae*

Kamane, kamanae ukunupi, kamanae kamanae (2x)

*Ukunupi kumanae, kamanae
Eyae, eyae eyaviyo eyae eyae
Eyae, eyae eyaviyo eyae eyae
Eyae, eyae eyaviyo eyae eyae
Eyae, eyae eyaviyo eyae eyae
Eyaviyo eyae eyae*

Trangau dispela yangpela boi nogut i tingim gelpren bilong em na sori i kisim em wansait olsem na em singsing sori wantaim lusim dispela ples Koseta wantaim olgeta lain na go long nupela ples kolim Haguvi'ae.

Tasol long dispela hap Koseto ol bin lusim wanpela tumbuna bilong lukautim tumbuna graun em Damaluse.

Na ol arapela lapun wantaim dispela yangpela boi bilong ol bin i stap maunten Haguvi pinis:

Avex Bega
Evigo Express
3 Kona, P.O. Box 123,
Goroka.



Nem: Pricilla Allan

Krismas: 13 meri

Adres: Primary School, P.O. Box 221, Bialla, WNBP.

Save laikim: Pop musik, go lotu, spot olsem soka, volibal, netbal, stori wantaim poro meri, lukim TV, waswas long wara. Go raun long taun, go piknik o pati, go long narapela kantri.

Nem: Philip Narina

Krismas: 23 man

Adres: Gluwato Lutheran Renewal Church, Usirampia, Marawaka District, C/o - MAF, P.O. Box 1080, Goroka, EHP.

Save laikim: Go long lotu felosip olgeta nait, i go wok long gaden, na apinun pilai spot volibal na bas-ketbal. Painim wanpela patna na maket.

Nem: Moru Mosah

Krismas: 18 man

Adres: AME, Lion School, Brafo-iaw, P. O. Box 39, Cape Coast C/R.

Save laikim: Mekim pren na ritim buks kaunting long koperesen.

Nem: Christopher Tami

Krismas: 18 man

Adres: Nilu No: 1 Village, P.O. Box 260, Maprik, ESP.

Save laikim: Go long lotu, pilai musik, stuakipa na meri rait long ol meri pren.

Nem: Dickson Danny

Krismas: 16 man

Adres: Blachiv Village, Lowan, C/o - EBC bai, P.O. Box 144, Wewak, ESP.

Save laikim: Harim musik, pilai soka, raitim pas long pen pren.

Nem: Bernard Johnson

Krismas: 25 man

Adres: P.O. Box 446, Agona Swedru - Ghana.

Save laikim: Harim musik na pilai vidio gem, laikim ol manmeri husat gat stretpela tingting.

Nem: Joseph Kwakye

Krismas: 24 meri

Adres: P.O. Box 546 Winneba - Ghana.

Save laikim: Pilai vidio gem na harim musik, laikim ol manmeri husat gat stretpela tingting.

Nem: Ringo Woram

Krismas: 17 man

Adres: C/o - P.O. Box 116, Kiunga, Western Province.

Save laikim: Go long lotu, harim na pilaim musik, mekim pren, len lokol tredisen.

Nem: Jackson Lemsy

Krismas: 16 man

Adres: Hargy Oil Palms, P.O. Box 218, Bialla, WNBP.

Save laikim: Go lotu, harim gospol musik na save raun wantaim ol poroman na serim samting wantaim.

Nem: Freedom Rims

Krismas: 20 man

Adres: P.O. Box 5722, Boroko, NCD.

Save laikim: Go long lotu, ritim baibel na harim tok bilong God na mi painim kristen meri long prenim na marit long yumi yet harim long Papua Niugini, tenkyu long harim na God i ken blesim yupela tu.

Nem: Pascarl Wulai

Krismas: 26 man

Adres: C/o - Krakembak Pit, P.O. Box 1256, Vunapope, Kokopo, ENBP, Papua New Guinea.

Save laikim: Pilai soka, lukim TV, go lotu, tok pilai wantaim ol manki, raitim pas long ol pen pren man o meri.

Nem: Richton A. Entollise

Krismas: 22 man

Adres: P.O. Box 1640, Lae, MP.

Save laikim: Watchim muvi, pilai soka, volibal, wokim pren na amamas tasol long bekim olgeta pas.



Dia LAIPLAIN,

Pastaim long mi bin bungim boi pren bilong mi, em i bin givim bel long wanpela meri. Tasol mi laikim em bikos em i no save haitim ol samting long mi.

Em i wok nau long narapela provins. I no longtaim mi harim olsem em i raun wantaim narapela meri na dispela meri tu i gat bel. Em i tokaut olsem em bai maritim mi na em i baim pe bilong mi pinis.

Mipela i bin pren longpela taim na planti lain i save long prensip bilong mitupela. Mi no laik mekim sem long papamama bilong mi o bagarapim nem bilong mi.

Taim mi stap wantaim boi pren bilong mi, em i save paitim mi na dispela i mekim mi pret. Bai mi mekim em i klia long mi olsem wanem? **NOT SURE**

Boi pren i givim bel long narapela meri

Dia PREN,

Mipela i klia olsem yu gat wari na mipela i save olsem boi pren bilong yu i no sanap strong long yu taim em i go wok long narapela provins. Ating meri husat i gat bel tu i gat bikpela wari tu. Boi pren bilong yu i save sapotim dispela meri i gat bel pastaim long em i bung yu o nogat? Tru olsem boi pren bilong yu i baim pe bilong yu pinis i soim olsem em i laik maritim yu, tasol dispela bai wanem kain marit tru? Yu tok olsem taim yutupela i stap wantaim em i save paitim yu. Dispela i no gutpela stat bilong man na meri i laik laikim na lukautim narapela.

Dispela hap toktok bilong laikim i ken gat planti as bilong en na narapela narapela manmeri i save gat tingting bilong ol yet long dispela. Insait long gutpela amamas marit dispela i sut long, "Mi gat bikpela tingting long yu. Mi laik mekim ol samting bai i mekim yu amamas. Mi no laik givim pen long yu".

Long sampela lain, laikim em, "Mi laikim yu amamasim laik bilong mi". Dispela em i no trupela laikim. Em i gridi laikim. I nogat planti amamas long dispela kain marit inap man na meri

yet i luksave olsem laikim i min olsem tupela i mas givim na stap olsem rait man na meri long narapela narapela.

Laikim i min wanem long yu? Wanem kain samting bai mekim yu amamas? Mipela i no min long ol samting bai yu baim tasol ol samting olsem sindaun toktok wantaim long ol hevi, lukautim narapela long taim bilong sik na givim sapot long mani na wanbel sapot long taim bilong hevi o sik.

Yu tok yu laik maritim em bikos yutupela i bin pren wantaim longpela taim. Yu ting bai ol arapela i tok beksait long yu sapos yu senisim tingting bilong yu na yu no laik mekim sem long papamama bilong yu. I luk olsem yu pilim wari na pret long wanem samting ol arapela bai ting long yu.

Tasol wanem samting yu tingim em i bikpela samting. Yu yet i bos long laip na disisen bilong yu. Yu bai kisim hevi taim man ya bai paitim yu moa yet. Yu bai kisim sem na wari moa yet taim man bilong yu i go het long mekim pasin nau em i wok long mekim.

Yu ting inap ol papamama bilong yu i ken kisim sem liklik taim tasol taim yu senisim tingting bilong yu? Nogut ol bai lukim

yu i wok long kisim pen na bagarap long pasin bilong man bilong yu sapos yu go het na maritim.

Yu bin tokim boi pren bilong yu tu long tingting bilong yu long ol dispela pasin bilong em, na yu save wanem as em i wok long mekim ol dispela pasin bilong em? Inap yu tokim papamama bilong yu long dispela wari bilong yu? Yu ting ol i mas amamas?

Em i gutpela long pilim liklik sem nau na tok yu senisim tingting bilong yu. I no gutpela long yu stap long bikpela pen na hat laip long bihain. Ating yu bin save long sampela stori pinis we ol papamama i save salim pe bilong meri i go bek bikos long ol sampela hevi. Sapos yu gat pasto o ol bikpela lain long famili bilong yu, yu ken toktok wantaim ol long dispela hevi bilong yu.

Tingim gut wanem as na yu laik marit. Sapos yu no mekim boi pren bilong yu i klia gut pastaim long yutupela i marit, yu i no bin traime long mekim em i senis long bihain taim. I luk olsem dispela i no man yu laik kisim olsem man bilong yu long bihain taim.



Morobe Provinsal Gavman

Morobe Provinsal Gavman em i was papa bilong Morobe Seavings na Lons Soaiti;

• Em i givim mani long Sosaiti long karimaut wok olsem:

(a) Peim ol wokmanmeri long lukautim wok bilong sosaiti.

(b) Peim Opis Rent bilong Sosaiti.

(c) Peim ol arapela ekspens bilong Sosaiti olsem ol pepa bilong opis, opis masin na ol tebol na sia.

(d) Peim wok long bringim wok bilong Sosaiti we bai i ken kamap klia long ol manmeri long asples.

(e) Gavman bai peim wok long bringim na kamap benk klostu long ol asples.

Wok kamap long Sosaiti Stat long mun Mas 99 inap Mas 2000

Namba bilong ol memba long Ssoaiti 2,526. Sea mani ol memba bungim K802,000.00

Namba long ol dinau Sosaiti givim K1,671

Hap dinau mani stap long han bilong ol memba K 457.652.00

Strong bilong mani ol memba bungim K1,013,109.00

Sosaiti tokaut long wok bilong givim dinau:

Brukim ol dinau stat long man Jan 99 i go Mas 2000

(a) Ekonomik Developmen - 1020 lons K 371,365.00

(b) Sosel Developmen 425 lons

K154,735.00. (c) Ol arapela wok- 226 lons K2,841.00

Bungim olgeta dinau Sosaiti givim long Mas 99 inap Mas 2000 K 618,941.00

Rausim bekim dinau long mun Julai 99 i go Disemba 99 (K 44,713.00)

Rausim bekim dinau long mun Januari i go Mas 2000

(K 116,576.00) Hap dinau mani stap long han bilong ol memba 457,652.00.

Morobe Seavings na Lon Sosaiti

Stia tok "A2000" na kaikai bilong tingting

Mipela ol Bod ov Dairekta bilong Morobe Seavings na Lons Sosaiti i makim pinis Edukesen Komiti. Tripela dairekta na Pablik Rilesen Opisa bilong Sosaiti i kamapim ol memba bilong dispela komiti. Dispela komiti bai mekim na karim aut wok long tok save na givim stia long ol memba. Bai o i mekim dispela wok na yusim redio, niuspepa na TV na tu ol bai yusim stia tok "2000" niuspepa bilong sosaiti long toksave na tu skulim olgeta memba na ripot long Morobe

provins.

Edukesen komiti bilong sosaiti i laik ol memba i mas kisim stretpela na gutpela tok klia long wok sosaiti i wok long mekim long dispela taim stat long Mas 1999 i kam inap long Disemba 1999. Toktok bilong stretim tu bel o tupela tingting bilong sampela manmeri i stap tu long Stia Tok pepa wantaim tingting o plen bilong ol wok bai Sosaiti laik wokim long yia 2000 na ol yia i kam bihain.

Projek na wok plen bilong yia 2000 na ol yia i kam bihain em long:

- Lukluk na bringim benk i go klostu long ol sosaiti memba isnait long ol wanwan distrik;
- Lukluk long helpim ol memba long helpim ol yet long kamapim na strongim wok long Sosel na Ekonomik Developmen long ol asples;
- Lukluk long skulim ol memba long stretpela pasin long ronim bisnis, bihainim pasin na astingt-

- ing bilong God hsuat i papa long olgeta hap graun na ol manmeri;
- Mekim moa wok long skulim ol memba long gutpela rot na stretpela pasin long kisim na bekim dinau;
- Lukluk long helpim ol Sosaiti memba long kamap gut ol Ikonmik projek bilong ol long Agrikalsa Komes na Bisnis Developmen.

Toksave long wok bilong mani long mun Januari i go Mas 2000

Mani i kam insait

Memba putim sia mani
Memba bekim dinau
Olgeta mani kam Hait
K384,540.00
K116,576.00
K501,116.00

Mani i go ausait

Memba kisim sia mani
Memba kisim dinau
Olgeta mani go ausait
K 79,572.00
K349,238.00
K428,810.00

Ol polisi bilong seavings na lons Sosaiti

Hia em haphap polisi bilong Sosaiti long helpim ol manmeri husat i laik kamap memba.

Membasip

Membasip em i op long ol manmeri i stap long Morobe na ol manmeri bilong Morobe husat i stap long ol arapela provins.

- Fi bilong kamap memba

K 2.00

• Mak bilong mani long opim nupela akaun K20.00

Toksave long Seavings

- Memba bai kisim pasbuk.
- Pe didaksen long ol wokmanmeri.

Kisim dinau long wanem as?

- Baim skul fi.
- Kago bilong tred stua.
- Baim kopra, kakao na kopi.
- Kisim pis.
- Ol samting bilong wokim haus slip.
- Ol kos bilong planim ol daiman.

- Ol kos bilong baim ol ka na trak.

- Wokim kakaruk banis.
- Ol kain samting bilong wok didiman.
- Bekim ol dinau.
- Baim meri na kos bilong marit.
- Dokta na marasin samting.

Benk bilong Papua Niugini

Benk bilong-gavman bilong Papua Niugini (Benk of PNG) em i olsem glasman bilong olgeta benk na haus mani bilong kantri. Em i bin tok orait long Morobe Seavings na Lons Ssoaiti long kamap olsem benk na haus mani bilong ol manmeri bilong Morobe provins na Lae siti benk ov PNG tu i wok long glasim (audit) ol buk na wok bilong Morobe Seavings na Lons Sosaiti na em bin helpim Sosaiti tu long taim wanpela ka bilong ol wokman long yusim na mekim wok bilong sosaiti.

Toktok bilong stretim man i gat tupela tingting

Menesmen bilong Morobe Seavings na Lons Sosaiti i stap nau long han bilong tupela ekspirens opisa husat i bin wok wantaim Benk ov PNG na tu Federesen ov Seavings na Lons Sosaiti.

Mista Basanu em i Intarim Menesa na Mista Passingan em i Maketing na Pablik Rilesen Opisa Gavman i bin luksave long tupela na makim ol long lukautim wok bilong Sosaiti, em tupela projek aninit long Komes Divisen long gavman bilong Morobe provins.

Tupela opisa i no bin menesa long ol olpela sosaiti long Morobe husat nau i slip i dai pinis. Mista Basanu i bin traim long helpim Lae Industri Seavings na Lons Sosaiti long kamap gut gen, tasol sik bilong dinau nogut i bin kilim idai olgeta wok.

Wok bilong Basanu na Pasingan long Federesen ov Seavings na Lons Sosaiti i kam inap long 1984 na 1985. Long dispela taim tupela i save glasim wok bilong ol Sosaiti insait long Papua Niugini. Wok bilong wanwan Sosaiti long PNG i bin i stap long menesmen bilong

wanwan sosaiti yet na bod ov dairektas bilong ol

Pundaun bilong ol olpela sosaiti long Morobe provins na PNG i bin i stap long han bilong menesmen bilong ol yet. Mista Basanu i bin askim Benk ov PNG long pasim olgeta sosaiti long Morobe provins long 1986, ol olpela Seavings na Lons Sosaiti long Morobe provins bai stat long yia 2001.

Dispela em bai namba tu hap bilong kirapim nupela sosaiti na stretim ol olpela sosaiti long provins. Namba wan hap bilong dispela projek em nau Morobe Seavings na Lons Sosaiti i sanap pinis na mekim wok. Olsem na ol memba bilong ol olpela sosaiti na husat i wok long i gat tu bel long kamap memba bilong Morobe Seavings na Lons Sosaiti i noken sutim nating tok long Mista Basanu na Mista Passingan long bagaram-pim wok long ol olpela sosaiti.

Ol dairekta yet na ol memba husat i no bin bekim dinau bagaram-pim wok bilong ol olpela Seavings na Lons Sosaiti.

Toktok bilong dinau

PLANTI askim na toktok i wok long kamap long pasin na we nupela Seavings na Lon Sosaiti long Morobe provins i wok long mekim. Planti i wok long amamas olsem ol i wok long pulmapim aplikesen pepa bilong kisim dinau na wan tu tasol ol i kisim mani na wokabaut i go long mekim wok bilong ol.

Ol i no save wet planti wik na mun na kisim dinau olsem ol i save mekim long ol bikpela benk. Tu ol bikpela benk i no save givim dinau long ol kastoma bilong ol sapos dinau mani ol i askim long en i wankain olsem mani ol i gat long benk.

Sampela i wok long askim long wanem taim bai Morobe Seavings na Lon Sosaiti bai apim mak bilong kisim dinau.

Ansa bai mipela givim long dispela tok piksa: I olsem: nau yet sapos memba i putim K600.00; em i ken kisim dinau long K600.00; na wanem taim bai sosaiti bai litimapim mak bilong kisim dinau; olsem Seavings i sanap long K600.00 na dinau bai sanap olsem K1,200.00 na antap moa long dispela mak long wan (1) tu wan (1).

Sosaiti i laik tok klia long ol memba na ol man na meri husat i laik kamap memba long Morobe Seavings na Lon Sosaiti, olsem:

(1) Sosaiti i wok long wokabaut yet long wok developmen o mekim ol wok long mekim na kamapim Sosaiti bai

kamap bikpela. Laip bilong dispela wok boi faipela yia, stat long dispela yia 2000 na bai i go pinis long yia 2005.

Long dispela taim Sosaiti bai lukluk na wok long lainim ol memba bilong em long luksave long gutpela pasin long kisim dinau bai famili "o" mama papa na ol pikinini bai ken kisim gutpela skul long dispela dinau mani papa "o" mama i bin kisim long sosaiti.

Sosaiti i mekim dispela tok long wanem lukluk long piksa bilong ol. Olpela sosaiti i no bin kamapim gutpela kaikai. Olgeta olpela sosaiti i bin dai pinis long wanem papa i bin save kisim dinau long laik bilong em yet na famili i no bin kisim kaikai long dispela dinau mani. Pasin nogut tu bilong dispela graun i bin pulap insait long ol dispela dinau ol memba i bin save kisim.

Long ol dispela pasin nogut bilong bipo; dispela nupela sosaiti bai glasim gut ol kain dinau ol memba i wok long kisim; insait long dispela taim bilong wok developmen.

(2) Sosaiti tu i bin lukluk long hevi bilong mani; kantri bilong yumi i wok long bungim long dispela taim.

Olsem na menesmen bilong sosaiti i no bin laik long hariap long putim mak bilong dinau i go abrusim mak bilong mani memba i putim long seavings akaun bilong em.

(3) Sosaiti menesmen i bin luksave tu; long hevi bilong ol olpela sosaiti long pasin bilong givim dinau we mak bilong dinau i bin abrusim mak bilong seavings long ol bikpela namba. Dispela pasin tasol long givim bikpela dinau long memba we seavings bilong em i no bin givim em gutpela as bilong strongim dispela dinau; i bin mekim na olgeta olpela sosaiti i bin pundaun na dai pinis.

(4) Planti memba long ol olpela sosaiti na planti moa memba long sampela bikpela sosaiti long dispela taim i wok long mekim pasin sin long ai bilong God; long kisim dinau long wokim samting olsem peim Skul Fi bilong pikinini; na ol go lusim mani long mekim narapela wok olsem "Hos Reis na pilai long Beting Shop."

Sapos sampela memba long dispela nupela sosaiti i wok long mekim dispela pasin; menesmen bilong sosaiti i mas givim yupela strongpela tok lukaut olsem God papa i wok long lukluk long pasin sin ol dispela kain memba i wok long mekim.

Dispela kain pasin sin bai brukim poket bilong ol na bai i nogat mani long bekim dinau bilong ol.

Blesing bilong God bai lusim man na meri husat i wok long giamanim wok mani bilong em yet.

Pasin bilong seavings

As wok bilong Morobe Seavings na Lons Sosaiti em long kirapim tingting na helpim yu long sevim mani. Na sapos yu wantaim famili bilong yu i bungim o painim sampela hevi, dispela mani yu sevim i ken helpim yu taim hevi i kamap. Ol kain samting olsem skul fi bilong pikinini na haus sik na ol marasin na wok bisnis o haus slip em yu laik stretim na kamapim gut.

Dispela kampani yu wok long en inap helpim yu long katim pe long olgeta insait na salim stret long sosaiti.

Ol wokmanmeri bilong sosaiti bai i ken givim yu stia na gutpela tingting long sevim gut mani bilong yu. Wanem mani yu laik putim long sosaiti em stap long laik na tingting bilong yu yet. Gutpela pasin na tingting em long redim yu yet long kairkain hevi we bai i ken kamap long yu long bihain taim.

Morobe Seavings na Lons Sosaiti em i no benk. Em i wok bung tasol bilong ol manmeri husat i memba.

Dinau

Ol memba husat i soim gutpela pasin long redim em yet, em tasol inap long kisim dinau mani long sosaiti. Hamas dinau memba i laik kisim em i wankain tasol long seavings memba yet i bungim pinis long sosaiti. I fu noken tekewe sea na seavings bilong yu. Kisim tasol dinau na bekim long mak yu ting yu inap. Larim seavings bilong yu i wok long sosaiti na yu i ken kisim dividen o win (interes) mani.

Interes o liklik pe bilong bekim dinau em wan pesen long wanwan mun. Bilong wanwan yia em i 12 pesen (12 pesen).

Nau yet Memba Seavings na Lons Sosaiti i wok long givim planti helpim i go aut long ol pipel husat i wok long kamapim ol gutpela projek long ol komyniti insait ong Morobe provins. Ol helpim olsem lukautim na kamapim ol laipatok samting olsem kakaruk na pik, helpim i go long liklik tred stua na tu saposim long kamapim wanpela skul projek.

KANAGE



Kanage i bilong Samarai na wanpela taim nil i sutim lek bilong em na em i kisim bagarap long lek na i go long haus sik. Long haus sik nes i askim olsem wanem long lek bilong Kanage. Na Kanage bekim, "ai sori, I climb one 6 inches nil".

Meri nes ya harim na em kukim lap stret long toktok bilong Kanage.

Kanage pren Mosbi

Kanage i bilong ples Peringa long hap bilong Kubalia. Wanpela apinun em wokabout i go long lukim ol opisa long Kubalia stesen. Taim em wokabout i go kamap long Turingi komyuniti skul nau sem taim ol sumatin pinis skul nau ol i wokabout i go nau ol i bungim em long rot. Na olgeta mangi ol i go pas na narapela kam bihain nau em tokim Kanage olsem, hei papa apinun. Kanage i no bekim apinun taim em harim hap tok papa na em i no wan bel. Em i go sanap tingting nogat nau em singautim ol mangi ya yupela sanap. Em go klostu long ol nau em askim husat i tok papa long mi man, nogat sem bilong yu wanem taim mi poromanim mama bilong yu na yu tok papa long mi. Narapela taim maski long tok papa yu mas tok ankol. Taim ol mangi harim olsem olgeta kirap das long ples.

Francis Fanki Wewak

Papa Kanage sik nogut tru na em i go long kemis na baim disprin na dring wantaim wara na em tingim dispela nem disprin, disprin, disprin i go insait long kemis man Kanage lukim ol yangpela resa meri Hagen ol smail long Kanage. Kanage kirap na em laik tok helo long ol resa tasol em abrus na i tok, haeluya gels. Nau ol resa meri ol lap long Kanage na pasim maus i stap Kanage i singaut long ol hei! Ol lewa bilong mi yupela i mas tok haeluya long mi tu. Samting tru em i laik tok yupela i mas tok helo long mi tu. Sem taim em lus tingting long nem disprin. Nau em kirap askim ol meri hei lewa! Mi painim dismarasin. Meri askim Kanage wanem kain dismarasin. Meri tokim Kanage. Mipela no salim long hia go long supamakem na baim dis bilong pulapim kaukau long en. Turangu Kanage kisim taim long hap na tekov i go long ples.

Kaiyo Ause Goroka

Kanage wantaim 3-pela poro bilong em i bilong Morobe. Wanpela taim Kanage kisim spak brus bipo papa bilong em i bin planim. Kanage kisim 3-pela poroman bilong em na ol i go hait long bus na stat long mekim

save long simuk. Taim simuk i pinis ol stat long pilai beng beng. Ol pilai i go na Kanage autim poro bilong em. Nogat poroman bilong em i strong na em tu i strong moa. Nau poro kirap na paitim Kanage nau tupela i mekim save i stap na lusim blut nambaut. Ol man-meri harim tupela na kam kisim ol i go long haus sik. Taim tupela i gutpela tupela lukim tupela yet na lap indai.

Gibson Rapu Madang

Kanage i bilong ples Suave insait long Simbu provins. Em i stap i go na wanpela taim em i gat tingting long go painim wanpela poroman bilong em long Madang. Na wanpela moning em pekim kago bilong em na em kalap long wanpela darek bus na em i go long Madang, em i go kamap long haus bilong poro bilong em, man poro bilong em amamas nogut tru long wanem longpela taim em i no lukim em. Em nau Kanage tu i amamas long poroman bilong em. Na ol stap i go na wanpela taim poroman i tokim Kanage yumi i go raun long wara na Kanage tok em orait yumi ken i go raun. Na Kanage i save harim nem bilong trausel olsem na em i laik lukim. Na ol i go kamap long wara na poro bilong em daiv na i kisim planti pis na bikpela tingting bilong Kanage i stap long trausel, olsem na em tokim poro bilong em glas i kam mi bai traaim. Na em kisim glas na em daiv na em lukim wanpela bikpela kuka na em i ting trausel na em i holim pas na em kisim i kam antap na wantu kuka kaikaim pinga bilong em na em i laik tromowe na nogat kuka kalap i kamdaun na kaikaim kiau bilong Kanage na em i kalap kalap na singaut nogut na ol poroman bilong em i lap i go na tudak i kamap na ol i painim we long go bek long ples.

Eilz Suamai Lae

Kanage em i wanpela grasruts man em i no save long rit na rait. Na wanpela taim meri bilong em i laik salim em i go long taun na em tok yes meri bai mi go na em i amamas tru long go, orait em i waswas pinis em dres gut stret, na meri givim bas pe, na em tokim em long widroim filim. Tasol Kanage i no save i wanem samting, olsem na taim meri bilong em i tokim em na em wokabout long rot em wok long kolim poto poto yet long rot i go, na taim em i bungim wanpela wan- tok long rot na i toktok wantaim em na i lusim tingting long tok poto na em kwik taim em tingim otometik na em tok otometik long rot na i go na bihain em kamap long taun em i no baim samting we meri bilong em tokim em.

Na em i kam bek long ples meri bilong em i soim em na i tok mi ting yu save man na mi maritim yu.

Eilz Suamai Lae

Kanage bilong Mosbi, Sentral provins. Wanpela taim Kanage wantaim pikinini bilong em Joice tupela i go wok long gaden na apinun tupela i kam bek na pikinini gel bilong em Joice i kam sanap long rot bung na ka i kilim em na em i dai pinis. Na Kanage i go pekpek arere long bus na

bihain em i kam long rot na lukim ya sore pikinini gel bilong em slip long rot pulap long blut. Kanage mekim nogat nau na em siksti i go long plis stesen na em i tok, eskus mi ol plisman ka i kam here and there and everyway kill my daughter. Em i tok olsem na ol plis i paul na askim Kanage olsem, yu save harim tok pisin o nogat. Na Kanage kirap na tok olsem, tok pisin is pea na ol askim tok motu na em tok, tok motu is pea na ol i askim Kanage gen yu save harim tok english na em kirap tok olsem english is my kaikai na ol plis ol i kilim stret long lap tasol ol i sore long Kanage na ol i go lukim ya pikinini gel bilong em i dai pinis na ol karim i go long mog.

Kumul Kera Moses Kimbe

Kanage em bilong Wes Sepik provins. Em i save stap long wanpela spesel hap kona bilong em yet. Wanpela fotnait Fraide Kanage i kalap long wanpela ka long Is Sepik dasti haiwe i go long Wewak tauns. Long taun Kanage i tokim draiva stopim mi antap long taun maket bai mi wokim soping bilong mi. Taim ka i stop antap long maket Kanage isi tasol kam daun long ka na em i tait i go long maket. Insait long maket i gat wanpela longlong meri tu i stap. Taim Kanage i kisim kona bilong haus maket em i pamim stret. Dispela longlong meri ya i kirap na tokim Kanage. O ya Kanage, mi tokim yu long holim samting na yu hangamap long tupela wil bilong mi. Taim Kanage i harim olsem em i sem nogut tru, isi tasol Kanage tainim het bilong em na kam kalap long ka na em i kam hait olgeta long ples bilong em. Kanage i no moa go long Wewak taun.

Dennis Mollx Kimbe

Kanage em bilong Kimbe Wes Nu Briten provins. Wanpela taim em i go painim poro bilong em na ol i go piknik long wara Tagi. Apinun nau ol i kam antap long piknik ples na ol i wetim ka. I no long taim wanpela bas i ron i kam. Kanage i ron i go long bas na em i tok, O ya wara holim liklik na Kanage i traaim ya. Wanpela meri antap long bas i harim olsem na em i lap nogut tru. Taim Kanage i harim olsem meri ya i lap. Kanage i kirap na tokim meri ya. O ya wara! Yu lap na I can see the meaning. Taim meri i harim olsem na em i lukluk strong long Kanage. Kanage i kirap na tokim meri ya. Wara mi save wanem kain tingting yu gat. Bihain long haus oke. Meri ya i harim olsem na em i givim ful smail. Kanage lukim olsem na em i kisim bikpela filings tru.

Dennis Mollx Kimbe

Kanage em i wanpela metere manki bilong kantri sait. Wanpela taim Kanage i pasim tok wantaim ol strit manki long i go raun long daun taun maket bilong grisim ol nambis meri. Em nau taim i kamap pinis na ol mangi i go raun long maket.

Boi nogut Kanage i kirap hariap long bik moning tru na i go waswas long wanpela spesol sop bilong ol waitman. Man, Kanage i dresap nogut tru na stailim em yet na lukluk long glas 10-pela taim na i tok, mi nogut o. Metere mangi Kanage i lukim em yet i smat nogut tru na em i kisim sotkat rot na i go pinis long maket em yet. Kanage wanpela

yet i go raun insait long maket na em i lukim wanpela smatpela meri i sanap krangi i stap long wanpela kona. Kanage i lukluk strong long-meri ya na pulim strongpela win stret. Na semtaim meri ya tu i lukluk strong long Kanage na Kanage i hariap tru wokim eksen long meri ya na em i kam bihainim Kanage. Kanage tupela meri ya i go sindaun long wanpela kona na stat long taitim stori bilong tupela yet. Tupela stori i go longpela taim nau na Kanage i kirap na tok, maski long westim long stori tumas ya. Yumi i no ol liklik pikinini bilong gret 1 na gret 2. Tasol meri ya i tokim Kanage, yu tasol olsem manki na mekim planti toi stori nabaut. Yu no man ya, yu smol boi aste tasol greduet long gret 6. Meri ya kirap lusim Kanage na das i go bek long maket ples na Kanage pilim sik na sindaun tupela aua olgeta long dispela hap inap tudak na isi tasol em wel i go long haus.

Tanda Kelly Mendi

Kanage bilong bus ples Marawaka distrik. Wanpela taim em go long lotu long Sande na em lotu pinis na kam na slip long arere long haus. Em pilim pispis kirap na go pispis pinis em i no pulim jipa go antap. Em go slip gen na em slip i dai na wanpela lang kam sindaun long hetkota bilong Kanage. Sem taim tu wanpela kakaruk kam na em i laik kaikai lang sem taim ya lang plai go na popaia bilong lang kakaruk givim stret long hetkota bilong Kanage ya em kirap nogut na meri bilong em tokim em yu singaut long wanem na em bekim tok olsem ya kakaruk kaikaim bun bilong kopi bilong yu ya.

Jetro Wayaks Kimbe

Kanage em wanpela lapun bilong ples. Em i no save wanem samting em bia. Em i save i stap long ples na lukim vedio na em i save lukim ol man dring wanpela kain wara long glas kap na spak nambaut na brukim ol samting insait long klab na paitim ol man nambaut. Trangu Kanage lukim dispela na em bel hat na em i tok wanem taim bai pikinini i salim tiket kam? I no long taim pikinini bilong em i salim tiket na em i go kisim balus i go long Pot Mosbi. Papa ya i lukim planti man na i klostu paul tasol pikinini i go holim han bilong em na kisim em i go long haus lusim Kanage na i go bek long wok. Trangu meri tambu bilong Kanage i lukim Kanage na em sori tru. Na em lukim papa ya i hot wanpela stret na tambu meri i go insait long haus opim frisa na kisim kodiol wantaim glas kap na kam givim em na putim em sindaun long sia. Taim Kanage i holim kodiol i kol stret. Em tingim tasol tete bai mi spak. Em mi holim wara bilong longlong nau ya. Nau papa ya i sindaun na apim isi isi na pilim kol i go daun long nek bilong em. I no long taim kodiol i pinis na em i go insait long haus em, olgeta samting i flai long laik. Plet, kap, sospen i bruk na flai nambaut nambaut. Trangu meri tambu i lukim na em tok ating papa ya i mas longlong ya. Em i stap pikinini bilong Kanage i pinis wok na kam. Meri ya i ron i go na tokim man bilong em. Papa ya em i kam long san na em hot olsem na mi givim em kodial long dring na kolim nek tasol papa i dring na i go bagarapim olgeta samting long haus ya. Taim pikinini bilong Kanage harim dis-

pela tok-em i sem nogut tru. Na em kisim Kanage i go arere na tokim em. Papa yu i no dring bia em kodial ya. Na Kanage i kirap bekim tok, mama Monica, em bia o kodiol yupela i no laik tok stret ah, mi spak pinis ya.

Sam Agi Lae

Paps Kanage em bilong Okapa na paps Kanage i gat 60 krismas na wanpela taim paps Kanage kisim hetpen sik na em pasim rop long het bilong em na kam long haus sik na long dispela haus sik i gat wanpela nupela pas aut nes meri i stap long em. Paps Kanage pasim rop wantaim kam stap long sia na nes meri askim paps Kanage long nem bilong em na Kanage tok paps Kanage na nes meri askim em ken long kisim sik ripot na paps Kanage tok hetpen na nes meri askim em ken long krismas bilong em paps Kanage. Na paps Kanage kirap tasol na tok 5-pela krismas na nes meri i tok paps Kanage yu no 5-pela krismas yu no pikinini yu putim go antap na paps Kanage kirap na tok 7-pela krismas na nes meri lap long paps Kanage na tok 7-pela krismas em yu toktok long liklik mangi ya. Paps yu tingting na putim i go antap paps Kanage kirap lukluk strong long nes meri ya na tok yu wokim nating long 15 na nes meri em wokim nating long 15 tasol.

Hax Yune Goroka

Kanage em hapkas mangi Nipa na Kavieng. Nau em stap wantaim 3-pela susa bilong em long Kimbe. Wanpela taim 3-pela susa bilong Kanage tok yumi go waswas long wara. San kukim em na kisim taim pinis ya na em harim ol 3-pela susa tok yumi go waswas. Hariap tru Kanage kirap na tok yumi go. Tasol wanpela samting Kanage i save tingting krangi long 3-pela susa. Taim ol go kamap long wara. 3-pela meri tokim Kanage long waswas pastaim. Na Kanage kirap tok sop long baka Kanage. Em go daun long wara na waswas. Em i ting olsem ol 3-pela susa waswas pinis na em waswas i go i go tasol. Nupela sop ya i no pinis hariap. Em i tokim ol meri yupela wetim mi tasol. Sop i no pinis yet narapela susa kirap tokim Kanage wanem hap bilong yu i no pinis yet. Kanage bekim. Samting ya yupela kolim bol bol lakiawe. 3-pela susa kilim skin long lap. Na Kanage sem pipia olgeta.

Ken Luben Kimbe

Kanage bilong wara Sepik. Wanpela taim wanpela waitman kisim Kanage bai tupela paum pukpuk long wara Sepik. Oran tupela kisim kanu na bihainim wara i go antap.

Waitman i tokim Kanage bai sindaun long porek bilong kanu na lukluk long ol pukpuk. Na waitman i singaun long baksait bilong kanu. Taim tupela pul i go, Kanage lukim wanpela hap diwai i trip i kam olsem pukpuk. Bihain em i singaut long masta, masta, masta, one pukpuk, one pukpuk. Masta sanap na lukluk. Em i no lukim wanpela pukpuk tu. Bihain masta tok long Kanage. May be you're liar. Kanage bekim masta na tok. Nogat masta, mi no bilong Lae. Masta kirap na tok long Kanage. May be you're stu-

KANAGE

"Em nau, narapela wik bilong mi ken"



• I kam long pes 25

pid. Kanage i bekim na tok, yes masta, mi bilong Sepik.

**N. Bee
Kimbe**

Kanage i no man bilong raun long taun tumas. Kanage tu em wanpela soka sta mangi. Wanpela taim Kanage go long baim soka but bilong em, em go insait long stua we ol save salim soka but long en. Baga nogut was long raun isi isi stap. Tasol i no long taim Kanage wokabaut i kam ausait long stua. Kanage i no westim taim em save olsem sapos em wokabaut isi bai ka i lusim em. Em go insait hariap long wanpela stua na wok long apim su bilong ol meri i stap. Em ting su bilong ol man bikos em mangalim spaik na kala bilong su ya. Kanage i no kliat tumas long su bilong ol meri. Baga baim su ya pinis na em tekov long ka. Ka dropim Kanage long hap bilong em long eli tru. Kanage go long haus em kaikai pinis na em tekov long fil. Baga i no westim taim em go putim su bilong ol meri pinis na em stat long wom ap long fil i stap. Samting tru Kanage ting su ya em bilong ol

man bikos su i gat wanpela spaik long bek. Baga wom ap i stap na ol boi i stat long kam aut long fil nau. Taim ol boi i lukim Kanage werim su bilong ol misis ya man ol boi ya kilim skin long lap. Taim ol boi i go insait long fil ol go tokim Kanage, ol tok Kanage su ya i no su bilong ol man em su bilong ol misis ya.

Kanage pilim sem pipia stret long laip bilong em. Dispela taim tasol Kanage givap long pilai spot.

**Namiamp Narun
Kaiapit**

Kanage em hapkas Hailans na Sepik tasol em marit long Makam long Kaiapit distrik. Wanpela taim em tokim ol lain tambu bilong em na ol i go spak. Kanage i save aisait tu long wanpela yangpela meri long ples. Tasol em save sem long toktok wantaim em taim em stap nomol. Taim ol i spak i kam nau em lukim dispela yangpela meri sanap i stap kwiktait em wokabout isi isi go klostu long em nau em tok hei when I look see you my head is spinning like a computer machine. Meri ya kirap na tok what you talking about? Kanage kirap nau em tok don't called out just keep in your mind. Meri kirap tok shame on you. Blary papa kela yu. Kanage harim olsem papa man ya em kirap em lukim manmeri ol tanim lukim das tasol long baksait yupela i no man i ron mipela ting smok balus bilong Amerika ya.

**Francis Fanki
Wewak**

Kanage i bilong ples Kakanamung long hap bilong wara Sepik, wanpela taim em go raun long Lae siti. Em i no save long ol kain kain toktok bilong siti. Wanpela apinun em go raun long Kamkumung maket.

Tupela yangpela meri sanap arere na lukim em wokabaut i go nau tupela tok. Yu rait olgeta. Man taim em harim dispela tok em putim long tingting na em wokabaut i go i no stret em sanap nau em stopim plis ka nau ol plis askim, papa yu toktok. Kanage i toktok taim ol plis askim, em tanim het tasol plis askim em gen papa yu tok man em kirap nau tok plis. Mi wokabout i go na tupela meri i tok. Yu rait olgeta.

Na mi man long ples mi no save long ol dispela toktok. Ol plisman tokim papa Kanage long kalap long ka na ol plis askim yu save long tupela?. Na em tok nogat plis ka i go stop long maket nau em tokim plis em tupela sanap stap.

Ol plis i go tokim tupela meri long kalap long ka. Tupela i no save Kanage stap insait tasol baga hogut sindaun insait olsem na tupela i no toktok.

Plis kisim tupela i go long wanpela hap rot na tok yupela go daun. Kanage wokabaut i go nau em pusim as bilong tupela meri na tok yutupela tu rait olgeta. Ol plisman ya kilim skin stret long lap.

**Francis Fanki
Wewak**

Kanage bilong Kaiapit, Kanage i no save dring tea long laip bilong em. Long 1993 wanpela bikpela trak bilong bilong karim

kago i go antap long Ramu na lodim ol suga na kam daun long Lae.

Bikpela trak abrusim Umi maket na kam kamap long Tumim ples, bilong Kanage stret, sem taim bikpela trak bilong Pagini transpot tu stop i stap. Bikpela trak ya i laik abrusim narapela trak nogat, em bamim trak bilong Pagini na kapsait. Kanage harim olsem ka i bam na kapsait, Kanage tekov long lukim. Em i go lukim nogat, suga pundaun nambaut nambaut Kanage kirap karim 2-pela bail na tekov long haus.

Bihain long moning nau Kanage wantaim poroman kisim tripela paket 500g suga, tupela bikpela gavman kap na tipot na tupela tekov long gaden bilong Kanage. Kanage kirap tokim poro bilong em long bolim i na Kanage yet bai kukim banana long paia.

Olgeta samting redi pinis na Kanage tokim poro bilong em mitupela i gat tripela suga bilong 500 gram, wanpela bai yumi dring pastaim bai mi kapsaitim 250 gram long kap bilong yu. Na 250 gram rong kap bilong mi hat wok rong tingim rong sipung, bai mitupela senisim wara tasol.

Yu save wanem Kanage na poro bilong em dring long 500 gram inap 20 raun olgeta, 10 raun long kap bilong Kanage na 10 raun long poroman bilong Kanage, em nau wanpela paket pinis na tupela kisim wanwan paket 500 gram suga na wokim olsem pastaim ol i wokim pinis, tupela kapsaitim hap hap long gavman kap bilong tupela na hap hap suga i stap, bilong neks raun o narapela de.

**Jafcleiy Fieldson
Lae**

Kanage i bilong Hauwinda viles long Leik Kopiago distrik insait long Sautien Hailans provins. Tasol em save stap long Tari. Wanpela taim em i go raun long Mendi na em i go maket long Mangani maket.

Na em i lukim wanpela meri i wokabaut i kam klostu long em na em kirap nogut na tok, a sore i no meri ya, em mas wanpela lus mit bilong Leik Kopiago ya.

Olsem na sapos yu meri Kopiago yu ken kam. Na meri ya i tok olsem. Paps antap em meri Kopiago tasol tambolo em strongpela Tari ya.

Em dabol blut ya i no singel blut olsem yu Leik Kopiago. Sore trangu paps Kanage i sem nogut tru na em tekop.


**Nelson Koyawa
Ambuli rocks**

Kanage em mangi kol pis na em marit long haus lain bilong em yet. Na tupela meri bilong em em lapun pinis wansais sot tasol. Na wanpela taim apinun tupela i kros long wanem Kanage i laik kaikai rais na besta tin pis tasol meri bilong em i kukim tapiok na kumu raun kabis.

Tupela i kros i go na Kanage i tokim meri bilong em. Yu em lapun pinis ya, bilong wanem na yu marit mi. Mi em 16 yia. Na meri bilong Kanage i tok yer, mi em mi lapun na yu wanem! Yu tu yu lapun kol pis ya, ektang yang. Na samting tru em old bom 46 simel besta, Aros bap.

Na Kanage i bekim, samting yu lukim long ai em pas long blut na noken tokaut. Em sin ya.

**Anauya Jembok
Lae**



Rifom sistem i no wok

Dia Edita,

Mi belhevi long Rifom sistem bilong Gavman. Dispela rifom i no wok gut long wanwan provins olsem na mi askim gavman bilong Praim Minista Sir Mekere Morauta na Zeming Gavman i mas rausim rifom na putim Provinsal Gavman gen long provins na givim pawa i go bek long wanwan provins larim wanwan prvins.

Yet i gat pawa long bringim

developmen i go long provins bilong ol yet na bringim sevis i go insait long wanwan eria bilong ol pipel.

Nau mipela lukim olsem rifom sistem i no wok gut long wanem provins i nogat mani. Olgeta mani em stap long hetkoto long Pot Mosbi tasol na wanwan provins hat tru long kisim mani hariap na kirapim wok long provins na long eria bilong ol provins. Olsem na mi askim gav-

man bilong Morauta na Zeming i mas rausim rifom sistem, givim pawa i go bek long wanwan provins na wanwan provins i mekim wok.

Lida bai i gat pawa long bringim developmen i go long provins na ol liklik pipel na ol eria.

**R. Gunan
Mosbi, NCD.**

Ol bikipela papa paulim ol meri

Dia Edita,

Mi laik tok tenkyu long givim spes long autim wari long pepa mi gat bikipela belhevi. Na em i go olsem mi yet meri Sumo insait long Sandaun provins na mi laik makim maus bilong olgeta mama na autim wari bilong ol.

Dispela wari em go long olgeta man bilong ol i save go raun long Jayapura taun wantaim ol meri na westim bikipela mani wantaim ol meri.

Na dispela em i tru tumas taim ol i save go ol bai kusai long ol meri na pikinini bilong ol long bai kros. Samting bilong ol tasol we nogat stret ya ol i save go slip na raun wantaim ol fri mama tasol na dispela nau i save mekim olgeta mama i save painim bikipela belhevi na wari tru.

Yes, em i tru na nau mi yet wanpela meri tu i laik sapotim olgeta maus bilong ol mama autim wari bilong ol tru na wantaim ol yet na mama bai kisim mani we na baim skul fi bilong pikinini na kaikai bilong haus.

Em nau i save mekim olgeta mama i save wari na belhavi long dispela tasol na em tasol bikipela belhevi bilong mi wantaim olgeta mama bilong Sandaun provins na tenkyu tru long givim spes long ratim belhevi bilong ol wantaim mi.

Sapos yu husat i la krait na amamas long ritim. Bai krait tasol Wantok niuspepa

**Carolyn Ryan Moynne
Sumo, Sandaun provins.**

Kamapim lo bilong salim buai long siti

Dia Edita,

Mi wanpela manki Laiagam long Wabag. Enga provns na nau mi stap long Pot Mosbi siti lukim olsem siti bagarapim long kainkain rabis long siti na i no gupela tumas.

Bilong wanem ol manmeri i no tingting gut long siti bilong yumi na tromoi rabis buai bin bagarapim ples. Na tu ol salim buai long pos bilong stua na klostu long Gavman Opis tu na planti rabis i kamap na i no luk olsem Pot Mosbi siti na i luk olsem maket ples na gavman mas lukluk gut na stapim buai maket.

Tu Gavman mas putim kain maket long 9 Mail o 8 Mail na manmeri save kaikai buai mas go long 9 Mail o 8 Mail. Na kaikai buai na lusim rabis long hap.

Planti buai bai kam long narapela provns na salim na lusim rabis long rot.

Buai kam long Kerema na Sentral provns mas salim long 9 Mail o 8 Mail tasol na maski long salim buai long siti na bagarapim ples.

Em tasol.

**Jacob T. Waiakali
Boroko, Nesenel Kapitol Siti.**

Mekim kapitol panismen

Dia Edita,

NAU i gat planti korap kamap long kantri. Gavman i gat sampela rot long daunim dispela hevi o korap na bagarapim kantri.

Plis minista bilong lo inap yu painim sampela rot long helpim PNG o nogat?

Mi harim long nius na raitim pas na planti PNG laikim dispela kapitol panismen.

Planti long maus bilong PNG mi harim gavman mas senisim lo bilong kantri na mekim hatpela lo we pipel ken surik long dispela lo.

Noken harim na lukluk tasol traim na bekim askim bilong pipel

bilong kantri pipel i makim yu na yu holim pawa na ol laikim yu gavman mas senisim lo, ol kolim kapital panismen long ol bikhel lain long kantri.

Long wol ol kolim kristen kantri nating nating na bikipela bagarap kamap long kantri.

Em tasol liklik belhevi bilong mi na sapos yu husat laik sapot o egens rait i kam long Wantok niuspepa na bai mi lukim na amamas tasol.

**Timon Batupako
Tandale Morobe
Lae, provins.**

Planti wok na liklik peritru

Dia Edita,

Mi wanpela manki Marawaka tasol nau mi stap long Wainoli plentesen. Nau em namba tu taim bilong mi long putim komplek i go long Wantok niuspepa.

Mipela ol grasrut mipela i save wokim bikipela wok long kampani na ol i save baim mipela K70.00 tasol.

Dispela mani K70.00 em i no inap long baim kaikai na ol arapela samt-

ing. Seventy-five per cent of the total mani tumas em save mekim wok bikipela de tasol. Bai kampani em samting long sapa wok long krait yet.

Wok winim na be naga? Krait maus brata o susa yu laik sapotim na kam long Wantok niuspepa.

**Tawas James
Kimbe, West Hill Boro Provins.**

Eddy Saweni mekim gutpela wok

Dia Edita,

Mi sapotim tru pas bilong brata ya, Mel Kavel bilong Madang long Wantok niuspepa pes 28 Me 11, 2000.

Yes, mi mas pastaim tok tenkyu long open memba bilong Aitape Lumi, Eddy Saweni long wok em i bin helpim long senisim gavman bilong Skate.

Olgeta toktok bilong Mel Kavel em i tru. Planti memba i stap long pati bilong Mista Pundari i no krai long pawa.

Mi ting Mista Saweni mekim wok na yusim rat patim long kaiti RN, mi ting i fit long raiti bilong Mista Pundari. Pipel bilong em mekim wok long kantri bilong em tu long West Hill Boro provins.

Long dispela yumi arapela mekim wok noken tokim wa jeana long skate long memba bilong yu long memba bilong long yia 2002. Mi ting Mista mipela i noken long wok em i bin yu, dispela basim long wok em i bin stret tru.

Tingting bilong mekim wok na olsem sabotaj long senisim papamama olsem Eddy Saweni husat i gat tingting bilong belhavi raiti.

Mi ting Mista Saweni mekim wok na i go na baim smok wanatim dispela mani. Ol papamama na narapela bikipela long famili i gat wok long mekim tasol planti i feil tru. Planti ol liklik smoka nau bai kamap gupela stilman bhain na bikhel long plis olsem nau ol i bikhel long papamama. Mi save les long lukim ol i kam baim smok na ekt olsem ol i bikipela manmeri stret na sampela save smok na pulim smok i kam aut-sait long nus bilong ol. Ol papamama laik painim aut sapos pikinini bilong yu i save smok sekim smel bilong smok long maus bilong ol pikinini sapos yu lukim olsem pikinini i save gat tles maus bilong ta long lips bilong em.

Planti i save trikim papamama na smok long papamama i wok long westim manmeri.

I nogut long konim papamama bilong gupela tasol wanpela de bai ol painim aut yet. Sapa em yu long sin yu wok long karamabing bilong noken hait hait na smok raun, yu laik mekim kam pablik na larim olgeta save olsem papamama smoka na mipela ken sponsa tu. Tenkyu.

**Judy Yakumbu.
Waigani.**

Ol Nuku lida mas wok bung

Dia Edita,

Mi laik sapotim pas bilong brata Willie Kayfond (Nuku) we i kamap long Mas 30, 2000. Brata ya i bin tok tok strong long memba bilong Nuku long developmen mas kamap na maski wokim promis nating.

Dispela em i tru. Ol pipel bilong Nuku i ridim senis, na yu memba (Kumbakor) maski givim baksait long pipel na distrik bilong yu.

Mi laik askim dispela kwesten long Mista Kumbakor. Yu save pilim olsem wanem insait long bel bilong yu

taim yu lukim ol pipel bilong narapela distrik amamas na enjoin developmen olsem long sait bilong gutpela rot, telepon sevis, pos opis na ol arapela moa? Yu save sem na tingting i go bek long ol pipel na distrik bilong yu we i stap longwe long developim tu o nogat!

Trangu ol pipel i makim yu lida bikos ol i laikim yu long makim maus bilong ol na long lukluk long wari bilong ol. Dispela i go tu long olgeta LLG raun memba bilong Nuku. Yupela ol lida mas stat nau long skelim gut

wanem as na ol pipel i makim yupela olsem lida.

Inap nau ong wok wanwan. Ol pipel bilong Nuku i stap inap pinis. Mi laik salensim yupela olgeta lida bilong Nuku long wokbung wantaim na bringim senis i go insait long distrik bilong yumi. Maski long bulsitim ol pipel na kaikai nating mani na slip.

Mi laik lukim ol lia wanbel na wok bung wantaim wnapela tingting na bringim sampela sevis o developmen i go insait long Nuku.

Em tasol na hsuat pikinini Nuku laik sapo-

tim o egensm, yu welkam.

**George Gius (Kulex)
Kimbe, WNBP.**

Sapos yu laik salim pas i kam long dispela niupepa, Salim long dispela adres:

**THE EDITOR
WANTOK Newspaper
P. O. BOX 1982
BOROKO, NCD.**

Olgeta leta i mas karim nem na adres bilong husat manmeri i salim.

Ol pikinini noken pulim smok

Dia Edita,

Mi stâp na save lukim planti liklik pikinini inap long 12, 13, 14. o 15 krismas i save pulim smok na bagarapim bodi bilong ol yet.

Ol dispela pikinini i save tanim na luk olsem ol bikipela manmeri na bai yu lukim ol karim smok paket na masis wantaim na pulim smok taun.

i go na baim smok wanatim dispela mani. Ol papamama na narapela bikipela long famili i gat wok long mekim tasol planti i feil tru.

Planti ol liklik smoka nau bai kamap gupela stilman bhain na bikhel long plis olsem nau ol i bikhel long papamama. Mi save les long lukim ol i kam baim smok na ekt olsem ol i bikipela manmeri stret na sampela save smok na pulim smok i kam aut-sait long nus bilong ol. Ol papamama laik painim aut sapos pikinini bilong yu i save smok sekim smel bilong smok long maus bilong ol pikinini sapos yu lukim olsem pikinini i save gat tles maus bilong ta long lips bilong em.

Planti i save trikim papamama na smok long papamama i wok long westim manmeri.

I nogut long konim papamama bilong gupela tasol wanpela de bai ol painim aut yet. Sapa em yu long sin yu wok long karamabing bilong noken hait hait na smok raun, yu laik mekim kam pablik na larim olgeta save olsem papamama smoka na mipela ken sponsa tu. Tenkyu.

Helt sevis long Ambunti i bagarap

Dia Edita,

Mi laik autim sampela tingting bilong mi long ol wok kamap na senis aninit long rifom progrem bilong Helt Dipatmen.

Mi lukim olsem Helt Dipatmen i i no lukluk i go longwe. Bilong wanem na mi tok olsem?

Long Ambunti Distrik stret klostu olgeta ples i gat ol ed pos bilong ol yet.

Long Ambunti Distrik o Kaunsil eria yumi, i gat ol Sab-Helt Senta long wanwan sensis divisen.

Tasol mi laik askim ol bosman bilong haus sik, inap yupela go insait long ol ples olsem Ama na May Wara?

Ol i gat kain ol sevis long hap bilong ol o nogat? I gat gavman i wari ong ol o nogat? I gat memba bilong ol o nogat? I gat Distrik Edministreta long Ambunti o nogat?

Mi bin raun long dispela sensis long dispela hap bilong eria bilong Ambunti Drekkir distrik na mi painim olsem bikipela populesen bilong Ama i pundaun pinis.

Planti manmeri na pikinini i dai bikos long nogat marasin o Helt Sevis. Ol bikipela suar bai yu lukim olsem ol brek lait bilong ka ya.

So hia mi laik askim inap Helt Dipatmen long Ambunti na Is Sepik i kirapim dispela viles helt edpos o marasin man kos insait long dispela kain ol ples?

Mi lukim ol i kirapim dispela progrem insait long ol eria we i gat ed pos na helt senta pinis tasol ol trangu husat i nidim tru dispela ol kain helpim ol i stap yet na kisim taim stret.

Mi laik askim Nesenel Memba Judah Akasim tu long visitim dispela eria na luksave long sindaun bilong pipel bilong yu long hap.

Harim gut i no memba bilong siti na bai yu stap tasol long Mosbi.

Tenkyu yu long ritim na sapos yu sapotim o egensim plis rait i kam long niuspepa tasol.

**Martin Willie
Ambunti, ESP.**

Rausim Kanage stori long Wantok Niuspepa

Dia Edita,

Mi laik sapotim tingting bilong brata Jeana Murray bilong Kainantu distrik, na brata Nogen Popi tu olsem. Inap yu memba bilong Wantok niuspepa mekim wok ong stopim stori bilong Kanage long niuspepa o nogat?

Taim mi lukluk insait long stori bilong Kanage, planti tok nogat save stap insait, na tu sampela stori i save pointim ol sios na wokman bilong ol sios tu.

Dispela pasim em i no stret long ai bilong mipela ol kristen

Plant long ol wan wan sios. Olsem wanem, ating dispela Wantok niuspepa kampani em Bilong Kanage na stori bilong kanage i save pinisim tupela na bikipela pes bilong niuspepa o olsem wanem?

Plis, yu bos bilong Wantok niuspepa, yu traim na stopim stori bilong Kanage. Kain kain wok bilong sios i save kamap long ol wan wan provns insait long kantri (PNG) tasol dispela i no save kamap long Wantok nius.

Long kisim ples bilong dispela ol sios nius em Kanage save faitaim long niuspepa long olgeta wik. Mi wanpela Luteran sios memba na mi no amamas long dispela stori bilong Kanage na mi autim wari bilong mi.

Em tasol na husat brata o susa i laik sapotim o egensim, rait tasol long Wantok niuspepa na bai mi lukim.

**Peter Bakly
Mt Hagen**

Lukautim ol turangu lain

Dia Edita,

INAP yupela givim mi spes na mi ken autim wari bilong mi. Wari bilong mi em i olsem.

Mi save raun long Lae Siti na lukim planti man aipas, han, lek nogut. Ol save sindaun long pes bilong ol stua na askim ol manmeri long mani.

Taim ol manmeri na i laik abrusim ol. Ol save suim han na askim long mani. Mi lukim dispela kain pasin i no gutpela.

Dispela ol man ol i gat ol lain bilong ol tu o nogat? Sapos i gat ol lain bilong ol i stap plis, inap yupela kisim ol i go bek long ples na lukautim ol. Long wanem taun em hat laip ya na ples. Olgeta samting em fri. Wai na yupela karim ol i kam tromoi long

taun na siti na ol sindaun na hangere na askim ol manmeri long mani. Yupela nogat strong long lukautim ol? Taim ol askim ol man long mani, yupela ol lain bilong ol, yupela save lukim na sem o nogat. I gat kain man olsem long ples bilong mi. Tasol ol famili bilong ol yet i lukautim ol na ol i stap. Ol i no bisi long karim ol i kam long taun na tromoi ol olsem pipia. Ol man ya, wankain olsem yu ya traime na yusim het bilong yupela na wokim samting.

Yumi ol man ya. Yumi i gat tewel. Yumi i no enimol.

Em tasol na tenkyu.

**Lenah P.
Nadzab, Morobe provins.**

Kabwum pipel i kisim taim

Dia Edita,

AS tingting bilong mi raitim dispela pas em long tokaut na lain-im ol planti manmeri na pikinini long Kabwum distrik bilong Morobe provins long memba bilong ol Ginson Soanu.

Dispela em namba tu tem bilong Ginson Soanu long winim ileksen long giama na tfrk pasin. Bilong wanem ol Kabwum i longlong na i no luksave long makim gutpela lida.

I kam inap nau, klostu 10-pela yia na nogat wanpela wok kamap o developmen kamap long Kabwum olsem rot na arapela bikpela projek.

Rot namel long Wasu, Kabwum, Derim, Tiptit na Konge i bagarap olgeta long wanem memba bilong Kabwum i no skelim mani i go long rot mentenens.

Ol sori na trangu pipel bilong Kabwum i olsem ol lain husat i nogat memba long palamen.

As bilong nogat wok kamap em long wanem Ginson Soanu em pret man na i no save toktok strong long Haus Palamen na wok wantaim gavman bilong nau long kisim sevis i go long ples.

Wanem taim em bai toktok na kempen long saveman bilong Kabwum long i stap long ol bodi bilong bisnis han bilong gavman promotim ol i go long kamap sinia dipatmen het, garentim lon mani long bisnis na ol hauslain bisnis grup long kisim dinau long benk na mekim wok didiman, baim stoa na arapela wok bisnis tu.

Mipela long Kabwum i bin bilip

olsem taim Praim Minista Sir Mekere Morauta i makim memba bilong Tewae-Siassi Mao Zeming olsem deputi praim minista olgeta memba bilong Morobe bai wok wantaim em long kirapim provins bilong mipela.

Ilektoet bilong Kabwum na Tewae-Siassi i stap klostu klostu na i gutpela sapos tupela memba i stap wantaim long skelim tingting, plen na wokbung wantaim long bringim sevis bilong pipel.

Tasol nogat ol memba olsem Ginson Soanu i longlong yet na kalap kalap long ol arapela politikal pati na i no amamas long wanpela Morobe lida i kisim namba tu wok long gavman long nambawan taim insait long PNG.

I no long taim i go pinis Soanu i bin tokaut olsem em bai wok wantaim Mista Zeming na arapela memba. Tasol long dispela mun em i go joinim Advens PNG Pati bilong John Pundari.

Dispela em i soim tru kala bilong Ginson Soanu olsem wanpela man husat ol arapela memba i ken trikim na mekim olsem wanpela liklik manki husat i no save long sanap strong na i stap wantaim lain em i ken kisim sevis.

Ginson Soanu em i jeles long Mao Zeming bikos em i kam longtaim long palamen we memba bilong Kabwum em i seken tem long palamen.

Taim Ginson Soanu i win long 1992 em i inapim olgeta politikal pati. Stat long pastaim em i go wantaim Pangu Pati long fomim

gavman, tasol nogat em i lusim na joinim People's Democratic Movement (PDM). PDM i givim mani na tu wanpela ka tasol em dampim PDM na tekov.

I no long taim long 1993 em i lusim PDM na joinim People's Progress Party (PPP). Sotpela taim em lusim PPP na i go wantaim People's United Party (PUP) bilong David Unagi. I no longtaim gen em i joinim Black Action Party (BAP) bilong Joseph Onguglo na i bin go wantaim long wanpela bung bilong BAP long Cairns, Australia.

Orait long 1997 jenerel ileksen Saonu i gimaan na sanap olsem independen kendidet. Taim em i gimaan ol pipel na win long 1997 em i join wantaim People's National Congress (PNC) bilong Bill Skate. I no longtaim i go pinis em tokaut long joinim PDM gen. Tasol las wik em i joinim gen APP bilong Mista Pundari.

Dispela mekim Ginson Saonu i taitol holda insait long Papua Niugini na tu wol sempon long kalap kalap na inapim olgeta politikal pati.

Long sotim olgeta toktok, mi ken tok olsem Ginson Saonu em i olsem wanpela bataflai i kalap kalap long olgeta flawa na kisim gutpela skel bilong em taim Kabwum pipel i sifa.

Ol Kabwum pipel mas blemim ol yet long hat wok nau ol painim na kisim taim i stap.

**Mungan Ori Tiemengt
Kabwum, Morobe provins.**

Rot bilong Sialum distrik i bagarap

Dia Edita,

Ml wanpela manki Sia Sulu tasol nau mi i stap long narapela siti na mi laik autim liklik wari o belhevi bilong mi long Wantok niuspepa.

Wari bilong mi em i olsem. Bikpela rot projek we i bin kik op o stat long hia 1994 i kam inap 2000.

Nogat wanpela senis i kamap long dispela rot. Stat long 1994 Nunzen i go long Sinea rot memba i kamapim na Kondo Kaitu Kapawa Butengka rot em tu na bus i karamapim.

Na nau Konali wokim nupela rot ken long Kanzarua lu Rebatu Siwea rot, na ol i no pinisim ol dispela rot yet.

Nau tingting bilong mi em i olsem i moa gutpela yumi mas rausim dispela kampani husat nau i operet long dispela ol rot projek. Na pasim wan-

pela nupela gutpela kampani long go na pinisim ol wok hariap.

Bikos dispela em i pes prairorit we mipela ol pipel i hangre tru long en. Na tu mi laik askim yupela ol dispela kampani ol kolim long Witi as osem, stat long 1994 i kam inap nau 2000 ol dispela ol mani bilong ol dispela rot projek save i kam insait long wokim wok i save i go long we? Na nau yumi laik kamap long 2002 nau.

Yupela ol dispela wokman bilong Witi as yupela harim mipela ol pipel bilong ples mipela i les long westim taim bilong mipela wantaim yupela. Mipela harim dispela em i pes projek we mipela ol pipel i krai long en.

**Magak Sele
3rd Siti, Sialum distrik.**

Noken bagarapim nem bilong Mendi Muruk

Dia Edita,

INAP yupela givim mi liklik spes bai mi autim wari bilong mi plis? Wari bilong mi i go oslem.

Mi wanpela dai hat sapota bilong Mendi Muruks olsem yu husat sapatim tim bilong yu na putim aut dispela toktok i bin kamap long Wantok niuspepa 15/06/00 pes 16 long Spot nius.

Mi no wanbel long toktok yu bin raitim na hia mi egensim dispela toktok bilong yu na i luk olsem yu bin hapim nem bilong Goroka Lahanis na daunim ol Mendi Muruks long taim ol Lahanis i go daun long Muruks long hom graun bilong ol yet.

Na tu yu bin rait na tok olsem, Mendi Muruks em wanpela long ol dispela tim husat i no bin daunim Lahanis long Goroka stat long 1990 i kam inap long yia 2000 taim ol Lahanis i no pes. Ol i save lus long Muruks planti taim na tu long ol narapela tims.

Sapos dispela em pes lus stat long yia 1990 i kam inap nau yu bin tok pinis.

Brata, ol Lahanis i gat histori na tu brukim wol rekot?

Nogat mi ting ol tu save lus long ol narapela tim olsem las wiken ol i lus long Muruks na tu ol dro wantaim Vipers 20/20. Em yu ting wanem?

Lahanis tasol bai win na ol narapela tims bai nogat! Wantok mi tokim yu, neks taim yu raitim ol spot ripot olsem, yu noken wansait long putim kain ripot long pepa, yu mas mekim pepa long ol narapela tims na kari-maut gut ripot bilong yu na ol sapatos bai laik tru long ritim gutpela ripot bilong yu.

Em tasol na sapos yu bel kaskas husat manmeri i laik sapatim o egensim plis rait i go long Wantok niuspepa na bai mi lukim na bekim.

**Ali Koremah
Mendi, Pangia.**

Gavana Agiru mekim bikpela wok

Dia Edita,

Ml laik hapim nem bilong Gavana bilong mipela Sauten Hailans provins, Anderson Agiru mekim bikpela wok long Sauten Hailans provins na planti senis kamap long provins bilong yumi.

Mi bilip olsem insait long tingting bilong em mekim Sauten Hailans provins kamap gutpela provins tasol deti politik tasol givim bel pen long em na provins i slo liklik. Mi save olsem pipel i laikim 100 pesen long em ken kontrolim Sauten Hailans provins.

Mi laik tokim ol nesanel memba na lokol memba mas wokbung wantaim, givim bikpela sapat i go long Gavana

na pipel ken kisim gutpela sindaun bilong nau na bihain tu.

Wanpela samting em lo na oda. Gavana yu mas painim gutpela rot long daunim dispela hevi na Sauten Hailans provins bai i stap klin provins.

Mi save Gavana em wanpela rait man stret em i gat 100 pesen sapat long pipel bilong em.

So Nesanel Gavman, Lokol Gavman komyuniti viles lidas, yuts mas wokbung wantaim em.

Em tasol na husat laik sapat o egens welkam tasol.

**Timon Batupako
Lae, MP.**

Kalabusim ol lain save salim buai long pablik ples

Dia Edita,

Ml laik putim sampela komplek bilong mi yet i go. Na toktok long ol lain man na meri husat i save strong tumas long salim buai raun insait long Mosbi siti.

Yupela ol dispela kain manmeri yupela mas yusim het bilong yupela na harim tok. Mi no tok long olgeta provins long PNG mi tok long yupela ol Hailans manmeri yupela tasol i save bagarapim Mosbi siti.

Mi no tok long olgeta Hailans mi tok long yupela ol manmeri long Tari yupela i no save harim tok liklik.

Traim yusim het bilong yupela. Yupela tasol i save bagarapim nem bilong mipela ol narapela Hailans manmeri. Na tu yupela ol plisman yupela i noken i go tasol na rausim buai bilong ol tasol na lusim ol na bihain yupela i save tekova. Taim yupela wokim olsem ol bai harim tok na lusim o nogat na nogat tru.

Yupela mas kisim ol stret husat man na meri i wok long salim stap long wanpela kona, kisim ol stret i go na sasim ol na tokim ol long kot fain K200 o K300. Sapos nogat salim ol i go kalabus na givim ol 6 mun o 7 mun i go antap na ol mas pilim pastaim.

Taim yupela wokim olsem ol bai pret long baim mun-o i go kalabus na ol bai lusim. Mi ken tok olsem ol dispela kain manmeri i save agensim lo na oda bilong gavman.

Olsem na maski long wantok sistem pasin na mekim save long ol na ol bai pret long bairi bikpela mani na i go kalabus tu.

Em tasol na husat man na meri yu lukim na yu laik sapat o yu laik agensim mi rait tasol i kam long Wantok niuspepa bilong yumi yet long PNG na mi ken lukim.

Tenkyu.

**Heru Anaboa
Goroka**

Jim Kas mas go

Dia Edita,

Mi wanpela man long bus bilong Madang husat i bin go pas long votim Jim Kas long kamap rijinel memba bilong Madang. Mi bin wokim olsem bilong rausim Peter Barter bikos Peter Barter i no tingim mipela ol man bilong bus bilong Madang olsem Simbai, Bundi na Teptep.

Tasol nau mi luk save olsem mi wokim bikpela rong tru long votim Jim Kas. Long dispela man Simbai tasol, nem bilong Madang i bagarap olgeta. Namba wan taim em laik bagarapim laip bilong ol man long balus na nau em i kiolim i dai wanpela man, em man Bundi bilong bus bilong Madang. Nau mipela i no save wanem samting em bai wokim gen.

Mi laik askim Gavman makim maus bilong ol Bundi pipel sapos gavman i gat pawa long pinisim long pinisim em olsem gavana bilong Madang. Em mas pinis olgeta long holim pablik opis na kot i ken painim aut long dispela samting em i bin wokim long bamim ka na man i dai.

Mipela i no laik harim nem bilong em long 2002 ileksen. Em tasol na husat laik sapat o egensim, rait tasol long Wantok niuspepa na mi lukim.

**John Marimbi Opotio
Koi Mangial Viles
Bundi.**

Plis holim raskol, kilim i dai tasol

Dia Edita,

Ml wanpela manki Gumine. Nau mi kam stap long Mosbi siti. Na mi laik sapatim toktok bilong brata ya John Topo long Desemba 23, 1999.

Brata bilong mi. Yu tok long Praim Minista long putim wanpela lo na oda long stopim dispela raskol pasin em yu tok tru. Olgeta wanwan memba ol go bung long haus palamen ol mekim dispela toktok long raskol pasin o nogat. Gavman i no putim wanpela lo.

Gavman i no save bai mi skulim yupela. Gavman mas givim plis pawa long sutim i da ol raskoi. Maski ol wokim bikpela trabel o liklik. Stii em raskol pasin.

Maski holim ol na putim ol long sel. Plis yu westim taim bilong yu. Wokim

sotkat, sutim i dai tasol.

Dispela gutpela piksa ol wokim long taun long PNGBC. Dispela pasin sampela bai lukim na suruk bek liklik. Mi ting dispela we em moa gutpela.

Sapos plis holim, kisim na putim long sel, sampela taim bai ol i kam aut hariap bikos nogat evidens na sampela taim ol save tok ol bai kaikai fri braun rais long "Haus man" (Bomana) na kam bek gen bai ol i mekim wankain pasin long stii na kilim man nating long samting bilong em yet.

Em tasol na yu husat brata o manmeri laik sapat o salens yu welkam long rait long Wantok niuspepa na mi tupa John Topo na Mike Bai ken ritim.

**Mike Bai
Mt Eriama, NCD**

DEPARTMENT OF LANDS

POFITIM OL STET LIS



Long Epril 2000 732 Stet Lis i bin kamaut o edvetais jong ol lis bilong propeti we i no baim Stet, mak long 10,000 o moa long len lis o rent. Dispela em long givim ol lain i stap long ol dispela graun fainel sans long stretim ol olpela rent bilong ol long Jun 30, 2000.

Insait long dispela toksave o edvetismen, 449 Stet Lisholda i abrus tru long kamap na stretim ol dispela samting. Olsem na long dispela as, mi nau sainim ol pepa (Instrument for forfeiture) long kamap insait long neks Nesene! Gaset long ol dispela propeti daunbilo.

Table with 16 columns: LOT, SEC, TOWN, TOTAL O/S (K). It lists land parcels across various towns including GRANVILLE, HOHOLA, BOROKO, LAE, MATIROGO, and KAVIENG, with associated lot numbers, sections, and total area in square kilometers.

Wanem askim long ol rental pemen, toktok wantaim REVENUE SEKSEN long telepon 301 3260 o 301 3199.

HON JOHN PUNDARI, MP Minista bilong Lands





Wiken Sport Drive

SP CUP 2000

P W L D F - A POINTS

RABAUl GURIAS	7 6 1 - 132 - 93 12
ENGAl MIKKS	7 5 1 1 113 - 90 11
HAGEN EAGLES	7 3 3 1 135 - 84 7
MENDI MURUKS	6 3 2 1 89 - 76 7
POM VIPERS	6 2 2 2 104 - 98 6
LAE BOMBERS	7 3 4 - 79 - 95 6
SIMBU WARRIORS	8 3 5 - 154 - 172 6
GOROKAl LAHANIS	6 1 4 1 82 - 111 3
WAgHI TUMBE	6 1 5 - 65 - 138 2

ROUND NINE (Suday July 30)

GOROKAl LAHANIS V HAGEN EAGLES	(GKA)
WAgHI TUMBE V SIMBU WARRIORS	(GKA)
LAE BOMBERS V MENDI MURUKS	(LAE)
POM VIPERS V RABAUl GURIAS	(POM)

BYE: MIKKS

COCA COLA SHIELD

Points Table Tuesday

Team	W	D	L	F/P/F/F/A	Total
Chemicals	9	1	-	- 65 31	29
PNG Motors	6	2	2	- 49 28	24
Boroko Motors	6	2	2	- 55 39	24
Fielders	6	1	3	- 58 48	23
Toba Motors	5	2	3	- 63 35	22
Tablebirds	2	-	8	- 37 66	14
Herbalife	2	-	8	- 30 60	14
Truckits	-	-	9	1 23 73	9

Wednesday

Boroko Motors	9	1	1	- 82 49	30
Electrical	7	2	1	- 60 37	26
S/Value Store	6	3	2	- 45 40	26
A/Biscuits	5	2	3	- 61 40	22
Gamoga	4	3	4	- 60 52	22
Ela Motors	3	3	5	- 62 56	20
BP (PNG) Ltd	3	-	7	1 50 73	16
C/Cola Amatil	3	-	6	1 33 63	15
L/City Council	1	-	5	5 22 63	8

KOIARI RUGBY LEAGUE

Round 3/2 (12)
Sunday July 30, 2000
Iarowari (Sogeri)

B Grade

11.00	Tigers vs Warriors
12.00	Eels vs Pukpuks
01.00	S/Choice vs Ops

A Grade

02.00	Warriors vs Tigers
03.00	Eels vs Pukpuks
04.00	S/Choice vs Ops

KOIARI DOBO NETBALL ASSOCIATION

Sunday July 30, 2000
Iarowari (Sogeri)
Round: 2/7 (14)

Court 1 - A Grade

Trekks vs Crystal
Maia vs Tigers
Sparrows vs Socom
Bye: Sisters

Court 2 - B Grade

Sparrows vs Socom
Trekks vs Crystal
Maia vs Tigers
Bye: Sifers

NATIONAL CAPITAL DISTRICT VOLLEYBALL ASSOCIATION YEAR 2000

Taurama Leisure Centre
Saturday July 29, 2000

Court 1

08.30	Hoppers vs Raukele	MAR
10.30	U-Mi Yet vs Telikom	MAR
12.30	Mixtures vs Telikom	MA
02.30	U-Mi Yet vs Hoppers	MA

Court 2

08.30	U-Mi Yet vs Telikom	WAR
10.30	Vailima vs Raukele	WAR
12.30	Mixtures vs U-Mi Yet	WA
02.30	NCDC vs Telikom	WA

PORT MORESBY SOCCER ASSOCIATION

Saturday July 29, 2000

Bisini One (1)

08:00	D2	Nisco vs M/Kayaks
09:20	D3	HLB Pom United vs R/ West
10:30	W2	SP Brewery vs Madgauns
11:45	D2	Bavaroko vs Mungkas
12:55	W1	ANZ University vs Kula
14:00	D1	Sobou vs Bao Mitas
15:00	Youth	W/Tarangau vs ANZ University
16:10	Prem	IBS PS United vs Tawala

Bisini Two (2)

08:00	Youth	Babaka vs SP Brewery
09:20	W2	Bavaroko vs Adau
10:30	D2	Eda Ranu vs WMI
11:45	D1	Verave vs Bulolo Mocs
12:55	W1	WMI vs Wikila Tarangau
14:00	W2	Orogen vs Waigani Heights
15:00	Youth	Tawala vs IBS PS United
16:00	Prem	Cosmos vs Guria

University Oval

0800	D4	Babaka vs SP Brewery
0920	Yuth	Cosmos vs Guria
1030	D4	Cosmos vs Guria
1145	D2	Rapatona vs Blue Kumuls
1255	D2	Wanzesi vs Duau
1400	D3	Aigob vs Muma

Sunday July 30, 2000

Bisini One (1)

0800	D2	Murat vs Dolos
0920	W2	YMZ vs Nomads
1030	W2	Rapatona vs Pom United
1145	W1	Cosmos vs Sobou
1255	D1	Adau vs Dobo Futz
1400	P	Tarangau vs ANZ Uni
1600	P	Babaka vs SP Brewery

Bisini Two (2)

0800	D3	Buresong vs Sunset
0920	W2	Murat vs Falcon
1030	W1	Defence vs Guria
1145	D1	Pom Utd vs Kula
1255	W1	Telikom vs IBS PS Utd
1400	P	Kurti-Andra vs Defence
1600	P	Rapatona vs Blue Kumuls

University Oval

0800	D4	Tawala vs SP Brewery
0920	Yuth	Kurti-Andra vs Defence
1030	D4	Kurti-Andra vs Defence
1145	D4	ANZ Uni vs Tarangau
1255	D3	Kutu vs Asum

COCA COLA PORT MORESBY NETBALL ASSOCIATION

Week 12
Saturday July 22, 2000

Juniors

U10 - 0800am

Pool A

C1	CP Rebels v Chevron P.
C2	L. Telstars v BB Kings
C3	LB Mermaids v TST Kempa
C4	Ted Diro v Holy Rosary

Pool B

C5	Boreboa v Holy Rosary
C6	Mase v Bavaroko
C7	Rakaone v L. Telstars

U13 - 0830am

Pool A

C1	CP. Rebels v St. Theresa
C2	Chevron P. v L. Telstars
C3	BB Kings v LB Mermaids
C4	June Valley v TST Kempa

Pool B

C5	TST Kempa v LB. Mermaids
C6	St. Peters v CP. Rebels
C7	Ted Diro v St. Pauls
C8	Hagara v St. Theresa

Pool C

C9	St Michaels v Holy Rosary
C10	Pari v Boreboa
C11	Wardstrip v Sparrows
C12	Kila Kila Pri v Bavaroko

U15 - 0900am

C9	Rakaone v Philip Aravure
C10	Tatana Pri v Mase
C11	Boreboa v Bavaroko

Pool E

C12	Sparrows v Philip Aravure
C13	Butuka v St. Pauls
C14	Holy Rosary v Hagara
C15	Pari v Kaugere

U15 - 0900am

Pool A

C1	Kila Kila Pri v CP. Rebels
C2	L. Telstars v Mase
C3	TST Kempa v LB. Mermaids
C4	June Valley v Chevron P.

Pool B

C5	June Valley v Ted Diro
C6	Wardstrip v St. Theresa
C7	CP. Rebels v St. Peters
C8	St. Pauls v Hagara

Pool A

C1	CP. Rebels v L. Telstars
C3	LB. Mermaids v Tokarara Pri
C4	Badihagwa v Chevron P.
C5	Kila Kila Sec v Hagara

Pool B

C6	Badihagwa v Hohola Youth
C7	Ted Diro v Kila Kila Pri
C8	Tokarara Pri v Luvoni
C9	Philip Aravure v LB. Mermaids

Pool C

C10	Holy Rosary v Gavuone
C11	Bavaroko v Boreboa

Bye Mase

U21 - 1200pm

Pool A

C1	Sogeri v L. Telstars
C3	Chevron P. v L. Telstars
C4	Luvoni v LB. Mermaids

Pool B

C5	LB. Mermaids v Mase
C6	Hohola Youth v Sogeri
C7	Chevron P v BB Kings

Bye TST Kempa

Seniors Golden Oldies - Court 1

1.00pm	L. Telstars v Chevron P.
2.00pm	Luvoni v TST Kempa

Bye Rakaone

Division One - Court 2

11.00pm	BB Kings v Rakaone
12.30pm	CP Sparrows v CP. Rebels
02.00pm	LB. Mermaids v L. Telstars
03.30pm	Chevron P. v TST Kempa

Division Two - Court 3

01.00pm	Chevron P. v TST Kempa
02.00pm	CP. Rebels v CP. Sparrows
03.00pm	BB. Kings v Angels
04.00pm	Raiowai v LB. Mermaids

Division Three - Court 4

01.00pm	Kawainini v CP. Sparrows
02.00pm	TST Kempa v PNGBC Kiro
03.00pm	Pelagai v Luvoni
04.00pm	L. Telstars v Imuty Lele

Division Four - Court 5

01.00pm	Logohu v Gavuone
02.00pm	Nabuaton v Warumana
03.00pm	Chevron P. v PNGBC Kiro
04.00pm	Mase v Pewaila

Division Five - Court 6

01.00pm	Kereibua v Luvoni
02.00pm	Imuty Lele v Koki Knights
03.00pm	Hall Sound v Waigani Tyres
04.00pm	Telikom v Aroma Coast

Division Six - Court 7

01.00pm	Aroma Coast v Aust High Com.
02.00pm	Hall Sound v Mase
03.00pm	Koki Knights v Pewaila
04.00pm	Vinto v Paiga Waina

Division Seven - Court 8

01.00pm	Nabuaton v Warriors
02.00pm	Rural Bank v Toba Souths
03.00pm	Kila Kila Sec v Downer Lady Birds
04.00pm	Warumana v Waigani Tyres

Division Eight - Court 9

01.00pm	Imuty Lele v Holy Rosary
02.00pm	Sea Gulls v Downer Lady Birds
03.00pm	ABO Warriors v Toba Souths





WANTOK SPOT



Lahanis, Warriors na Tumbe nogat sans

HENRY MORABANG i raitim

SP KAP RIPOT

TRIPLELA tim Goroka Lahanis, Kundiawa Warriors na Waghi Tumbe i nogat sans long pilai insait long SP Kap inta siti fainels long dispela ya.

Ol tim ya i sindaun daunbilo tru long as bilong poin lata. Tripela moa raun i stap yet, na ol tim nau i taitim bun tru long holim posisen bilong ol.

Lae Bombers tu i gat liklik sans bikos em i gat tripela gem i stap.

Vipers i gat sans tasol sapos em i lusim tupela gem ating em bai aut. Nau yet em i gat 4-pela gem i stap yet long winim sans long pilai insait long SP Kap fainel.

Rabaul Guria, Enga Mioks, Mt Hagen Eagles na Mendi Muruks i gat sans tasol ol i mas strongim sans na winim ol las tripela gem.

Vipers i gat 4-pela gem long winim fainel spot. Em bai salensim Rabaul Guria, Lae Bombers, Mt Hagen Eagles na Rabaul Guria.

Dispela gem long wiken egensim Rabaul Guria, Vipers i mas soim strong olsem em i ken pilai long fainel. Guria i wok long nekim ol turis tim long Rabaul wansait, na em bai namba wan taim ol i lusim Rabaul na kam pilai long Pot Mosbi.

Rabaul Guria i gat sans long surikim skoa i go long moa sapos ol i win. Mioks i gat tripela gem i stap yet. Ol i bai long dispela wiken na long las wiken bilong sisen propa, ol bai bai gen.

Mt Hagen Eagles i gat tripela gem tu. Ol i mas winim tripela gem long holim yet wanpela ples long senta.

Ol boi long Sauten Hailens tu i wankain. Muruks i gat foapela gem i stap na sapos ol i laik stap long fainel, orait ol i mas traim na winim tripela long strongim posisen bilong ol long dispela wiken.

Mendi Muruks bai salensim Lae

Bombers long Lae. Muruks i gat nem long kamapim gutpela na strongpela gem long traim ol i lusim asples.

Lae Bombers i no laki tumas long Rabaul na bai tingting strong long mekim save long Muruks long winim spes long fainel.


Waghi Tumbe i laik strongim sait bilong em. Olsem na ol tim i go pas i mas was gut long Tumbe. Dispela wiken, ol bai bungim gen Kundiawa Warriors long Goroka.

Goroka bai holim tupela gem, na sapos Goroka Lahanis i laik soim pes i mas win.

Nau yet Lahanis i nogat sans tru long difendim dispela Kap. Olgeta sans bilong em i pinis tasol ol i ken bagarapim sans bilong Mt Hagen Eagles.

Tupela tim ya, Kange na ol Apo bai skelim strong long Goroka.

Poin lata nau i sanap olsem Rabaul Guria 12, Enga Mioks 11, Hagen Eagles 7, Mendi Muruks 7, POM Vipers 6, Lae Bombers 6, Simbu Warriors 6, Goroka Lahanis 3 na Waghi Tumbe 2.



• Huka bilong Waghi Tumbe Samuel Kiap i sapatim pilaia em egensim Kundiawa Warriors las wiken long Kundiawa. Tumbe win 25-22. Foto: PNGRFL opis.

Ragbi yunion saspendingim tupela Brothers pilaia

POM YUNION RIPOT

POT MOSBI Ragbi Yunion i saspendingim tupela pilaia bilong Brothers tim long 6-pela wik olgeta, na mekim strongpela tok lukaut long klab, sapos em i mekim trabel ol bai aut long kompetisen.

Dispela em wanpela rot we Pot Mosbi Ragbi Yunion i laik stapim ol kain bikhet pasin i wok long traim kamapim long ragbi yunion oval.

Judiseri Komiti i givim dispela gem i go long Telikom na askim Brothers klab long raitim wanpela pas insait long 7-pela de i go long referi Charles Yamanson na tok sori long em.

Dispela asua i kamap taim Yamanson i rausim wanpela pilaia bilong Brothers na bikpela kros i bin kamap na ol i stapim gem.

Insait long ol gem i kamap las wik, 1RPIR

Taurama Bareks i autim biknem Yunivesiti 16-15.

Ol boi ami i pilai strong tru na stapim na bagarapim sans bilong ol lain sumatin long skoa. Nau yet ol boi Taurama i wok long kamapim gutpela pilai na traim stap yet wantaim ol arapela biknem tim long A gret kompetisen.

1RPIR i winim pinis sampela ol biknem tim olsem Finpack, Royals Yunivesiti na ol i dro wantaim Wanderers.

I tru ol i no kliia tumas long sampela kain teknik bilong pilai, ol boi ami i kamapim strongpela pilai egensim Yunivesiti.

Eddie Dala bilong Tauraman i brukim kiau taim

em i tepim bal insait long 10 mita bilong Yunivesiti na karim ol biklain i go skoa.

Dala i kisim gutpela sapat pilai i kam long Oscar Oksap na i wok long mekim ol studen i tromoi baul namba. Bikpela fowat i mekim na ol lain Yunivesiti i opsait na Vincent Kilori i kikim skoa na poin i sanap 1RPIR 8 na Yunivesiti 0.

Tasol Yuni i no wari. Gabriel Tika, Michael Bal na Nick Frazwe i kamap gutpela gem long traim bringim bek sampela laip long tim. Ol i kisim sampela strong i kam long fulbek Yauieb na Daniel Narakobi.

Bipo long haptaim, Jerry Lingling i brukim difens bilong Yuni na skorim wanpela gutpela tra na go pas long skoa 15-13.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.